

水云村稿

刘
壘

文硕阁

wenshuoge.com

目录

关于我们 3

总目 5

卷一 8

卷二 14

卷三 17

卷四 26

卷五 29

卷六 35

卷七 40

卷八 55

卷九 69

卷十 81

卷十一 90

卷十二 101

卷十三 103

卷十四 109

卷十五 113

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

总目

钦定四库全书 集部五

水云村藁总目 别集类四【元】

卷一

赋

卷二

碑

卷三

记

卷四

传

卷五

序

卷六

赞

卷七

题跋

卷八

墓表志铭

卷九

啓

卷十

啓

卷十一

书翰

卷十二

祭文

卷十三

杂着

卷十四

公牋

卷十五

表牋

臣等谨案水云村藁十五卷元刘埙撰埙字起潜南丰人水云村其所居地名因以自号生於宋嘉熙庚子咸淳庚午本郡试第一入元以荐为延平教授延佑六年卒年八十所着隐居通议颇淹博可取已别着於録其文集旧有二本一曰水云村泯稿乃明洪武间孙瑛所手抄大抵杂采隐居通议中语缀辑成编其文亦皆与此本相复一即此本乃其裔孙凝收拾遗佚别加排次者所收各体较为详备惟原目二十卷而今本祇存十五卷其十六卷以下已阙当由传抄者失之特按原目此五卷所载本青词祝文无关体要之作则其存佚亦无足重轻也埙才力雄放尤长於四六绮丽之制集中所载诸啓劄大都皆在宋世所作考隐居通议自述其得意之笔如代吴浚谢建阃表吊吴浚文代赵必昂谢庙堂啓通丁应奎啓今皆不见於集则其散佚者亦自不少然即所存者观之下笔铸词亦复颇见精采埙尝自言赵必昂称其能以散文为四六正是片段议论非若世俗抽黄对白而血脉不贯者虽不无夸诩之词而生平得力所在其甘苦固有能自道者矣至其他古文则入元後所作为多灑灑流转亦殊有清隽之气而间以俳句绮语搀杂其间颇乖典则不免稍逊一筹特宋末元初遗闻轶事时见一二亦足以资考据云乾隆四十五年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

水云村稟卷一

元 刘埙 撰

赋

汉高帝庙赋【有引】

丰西山水隈曲处多汉帝庙庙像多古雅里俗岁时致祭乞灵以为常按汉史帝生于丰起于沛战于河南都于秦雍师行所至多循江北暮年以来出师仅至于蕲则大江以西帝之马足固未尝辱其後庙祀相望无亦仁义公恕四百年默有以深入人心者故世祀而弗忍忘与吁三代而降政多以譎而不正庶几无愧者高帝尔盛德必百世祀固宜抑帝也仁明英武度越後王风起云飞威扬海内千秋万岁後黍离麦秀其遂栖神深山之孤庙受野老只鷄豚蹠之祭耶则千古英雄之志有触目而可悲者矣乃引而为之赋曰

陟山曲之坡陀兮有古松之蟠屈积楮槲之纷披兮见庙貌之突兀蛛虫络兮齷齪龙蛇绘兮败壁旒旒俨乎帝王顾劔佩之侍侧始欲谗其何神沆莫覩夫扁额则见瓦砾飘风阶除落照樵牧三五偃蹇言笑遂前询夫故老曰此汉高帝之庙也於赫高皇神武天毓韬光振采美石韞玉已乃起丰沛王巴蜀战河南入函谷眇西江之僻左未尝辱夫马足顾遗祠之何多徧山隈与水曲将非汉德深厚汉泽悠长皇天后土鉴约法之三章除苛解娆宜万代蒸尝之不忘嗟夫芒砀二界瑞采成龙泗上一亭天开帝宫挥青萍于酒後夺威斗于月中时则霆迅电掣雾滃风从山石为泐草木失容集士马兮云黑列旗帜兮天红声撼河朔势赫川东羣狡衆黠束手鞠躬开炎祀之四百後三十世而勿穷其威灵可谓甚雄矣哉方其定都咸秦控引伊洛函关巩固陇蜀盘错观阙苕崑黼扆燁烁万方球珙一统正朔宴未央朝长乐千官舞蹈六师罗络大常奏乐上公执爵祝帝壽之无疆谓与天而相若日月几何山川寂寥长陵无树烟雨萧萧彼寒食松楸之馁竟无人兮为浇则迺栖神古庙慰我黎兆乘彼白云去来缥缈盖星弁牢落而受农夫蚕妇之拜奠象貌凄凉而飧斗酒豚蹠之祭醺何昔盛而今衰俛仰悲歌不觉为之失笑也秋清兮木雕屋老兮瓦飘石炉烬兮烟断土像齷兮榻摇日色薄兮岚雾冥鸱鸢鸣兮风怒号忆翦嬴而蹶项气盖世而凌霄噫而今果安在哉令人魂断而意消或曰有隆有替从古然矣未烦博采陈编泛引前事姑以近於汉者言之则前有始皇二世後有备权操懿莫不奋威逞角力鬪智或豪举而席卷或交争而鼎峙极意气于一快骋诡秘以万计第求子孙帝王之业不悟世变轮回之数始焉肩摩毂击云扰波沸已而声销景没缩首丧志雄心斂于片木霸气沈于九地盖石火之晷乎易灭也槿华之飘乎易坠也其横骛絶出耸动华夏生平之夸豪竟不多史官数叶之纸信自古莫不皆然徒以增志伤情于一喟繇是观之威力气势排山倒海穷贪极暴讥讟诃然而莫能当数十年寒暑之鍛链日月之消磨虽合古今帝

王之杰特无奈此元化之密移何琼宫瑶台荡为浮烟飞埃矣恩浅惠薄岂复有遗庙之嵯峨其仰视高帝弥足增感彼英灵有觉兮宁不心慙而神瘥乎天道人事终有止汔倪盛极而不反则必递迁而周匝惟道德之迓续延洪胜智勇之震聳凌压使当百僚朝会之赫奕而坐念千秋庙祀之毁残知兴废之靡常歛威力而勿殫委历数于代谢置生灵于安闲虽不幸运去物改祚移鼎迁抑感恩怀德终讴思而永叹荒祠野祭正以着人心之腾欢而仁深泽厚廼於是乎可观则覩斯庙也且将庄敬思慕之不暇尚忍讥其裸荐之酸寒乎重凄慨而兴怀爰作赋以矢志请无非其深文期昭垂於永世

壽文堂賦

大元革命初兵祸频仍士学都废往往易节独刘水村翁确守素业如平时故扁其读书之室曰壽文喜其文之犹壽也

两仪肇判三才以分爰有精粹融而成文盖鍾秀於海岳宜交瑞於乾坤其在天也星宿罗络燿灵輝煥雾湛烟霏之炳映云光霞采之绚烂其在地也机杼纵横锦绣川原峯峦之丹碧峙丽江湖之漪縠沦涟其在人也精神志气经天纬地大则纲常建立礼乐粲贲宫庙朝市之位官班?爵之制下至州邑以及闾里莫不仪物黼黻等威堂陛有尊有卑有都有鄙有钜有细有纲有纪施诸政刑秩然条理郁郁彬彬立厥统体次则制诏坦明号令传宣出丝纶而章日月走风雷而动山川悍将流涕而向化癯老扶杖而争先又其次则奇人秀士忘餐失寐雕镂才情讨论经史或赓歌以诵太平或哀吟而慨兴废或争先圣之教於衰微或着书以俟百世其尤下者塲屋声华音调委靡猎科名钩富贵是区区者最不足齿然苟为之则亦斯文之一利也顛辛以前存而勿论盖自放勲登极之岁暨乎德佑移鼎之年以历计凡三千六百三十有三矣文脉未始一日而不传噫河洛聿啓世变运殊元化粹精久矣发舒天矜其凿欲壽以愚尔廼刊落其华燿蹙迫其紆徐翳黯其昭明芜蕝其芳腴举数年之所尝发挥至是摧剥而焦枯於是泊然反素归於太虚意者犹六月之息将复开斯文之初乎盘桓康食几十载而余诸君其思非天壽吾文而何如或者夙修日寡新习改化典籍寇讎仁义土苴彼有怀跼心而术孔业立可家崇愷而位王谢息我天黥解我天劓若夫沈痼书癖天阙文气惟吾中年之朋侶屈指东南而有几岁推月移磨灭谁继则飞走同归卉木接趾斯白日之行屍而黄泉之愚鬼也文且弗灵壽乃在是譬犹游方之士志求登僊周行万里出入霞烟神气瓠落足力茧穿觉其丧失之已多乃块守乎泉石之间遗形骸而精固收视听而神全翛然羽化壽也後天呜乎天不忍斯文之丧是以开壽域而演真詮予悟而喜揭扁于楣登斯堂者为予绎之

观雨赋【有引】

某岁夏旱愆焚不可奈一日步江皋纳晚凉乃忽风云交作雷雨踵至予喜谛观因叹化机转旋在呼吸间一何易也将纪以诗客曰诗不如赋赋亦古诗之流且昔人未有因观雨而作赋者盍试为焉予曰诺作观雨赋

鶉火序次祝融涨氛垤鹳沈声畴龟露文暑浸肌兮若蒸气塞膺兮如醺予意愤愤散策江村

冀受晚凉消此黄昏则见水涵沙壅炎熇顽洞睨千林以招风嘅纤埃之不动予益愤愤而眊
瞢矣盘薄顷之西望高山微云冉冉出如稊烟蔽亏斜日荡漾澌天俄如萦缕广袤敷布又如
车轮径南以去而南山之南亦见奇峰腾骧蜿蜒如虬如龙又径东以之北忽蕢末之生风俄
而风威渐劲云气弥黑浓淡砌叠如冈峦之横出倒景晃耀映天地而碧色尔乃排空如城倏
忽流铃海光摇闪卷水南溟陰风雄号牛马悲鸣撼枯木扬飞尘彼有浴川登岸如鳬雁乱羣
拽衣挟巾狂走兀唐似挥刃之欲逼亟投家而鼠窜予方徐登野亭冯阑倚檻观霏?与汹涌何
瞬息而晦冥乃见疏林低枝声战败屋其着地者有如飞鏃风益健而疾呼云挟雨於欲垂列
缺挥霍霹雳轰飞俄而风力寢息西南转值乎云薄则网密如线至若云屯正厚建瓴决堰又
如水帘与飞练是雨也横嶂沿堤循山?谿方直或似乎屏障穹环又类乎罍罍惟驟雨乃始若
是盖浮云有以幻之瞻彼远山白雾吐洒飘风霏薄与雨上下眩奇呈秀 变忽化天巧所到
虽妙笔而不能画雨沾衣单冰凝露寒於愤愤以顿清忽翛翛而欲僊则咏曰此天下之奇观
也余尝喜登峯以观雪月喜卧石以观云雾尤喜伊何临江观雨尝试思之风雨云雷交战并
集神怪掀舞魑魅为泣衆骇?而无人色我乃浩乎太虚以独立正於此观天地之变又何嫌乎
好奇之癖心志激壮精神飞翮劒槊舞钲鼓喧如见乎赤壁走操澌水歼坚唐兵破夹寨之日
周师捷高平之年山开石渤河倾海翻将非奇观之尤杰然者耶嗟夫天地焦枯金石俱靡陂
泽欲竭黍苗已悴斯人旦暮已矣而昊旻至仁忍遂涸弃骄阳化霖旱虐一洗然则神工之转
旋其易特反掌耳海宇之大黎庶之繁一亭毒於苍冥宁俾喝死于是间盖穷则变通大易之
义岂惟造化之仁将亦理之所必至吾因观雨而悟夫天道陰阳之机世道升降之际则恍然
而起曰如斯而已乎一反掌之转移亦甚易也

养生赋

至元庚寅岁秋暑炽甚予患痢疾良苦既小瘳作养生赋以自警

维炎歊之侵薄兮幸苟免夫陨坠委瘦骨於一席兮亘中宵而不寐展转乏力吐纳短气盖五
脏六腑之郁积实九窍百骸之腴膩穷日之力挾而去之故虽有存焉者寡矣情思眇绵支体
废捐惟百念之顿清见一真之湛然则反而思之曰羣生赋形危浅脆弱外而皮肤内而筋膜
非金非石易腴易削肺肝有似乎羽轻肠胃何殊乎纸薄偶一息之不续不崇朝臭腐而销铄
嗟夫幻躯若是其不足恃耶而以此当天地之迁变亦甚岌岌而不觉雪风堕指霜硝裂齿百
川凝冰陰毒入髓其酷暑也太空流火山木焦燎污沱沸波六合烘窑吁可畏已乃以危浅脆
弱之质敌此毒烈惨酷之气孰胜孰负可惊可悸矧夫思虑纠结忧乐摧折嗷呼损肝劳苦伤
骨或疾鞭其神魂或颠荡其气血乃若醇醪沈酣冶容斲丧极口腹之无厌竭精髓於一畅是
殆逃生於毒鴆血肉之中寄命於猛虎齿牙之上也寒暑迭冲情欲夹攻曾人生所息之几何
乃欲以应夫无穷将见如电光之闪忽曷不为老氏之守中天地生化父母保毓盖至贵者人
身难得者壽年安忍以其至贵难得者弃之空缘乎予既疾而获痊抚弱质而凜然愿清淨以
养生庶永壽而或僊

剪韭赋

病瘞以後榛莽纷糾間步荒畦猶見殘韭命老圃以荷鋤見隴塋之如旧則乃除其蔽翳芟其老丑加灌溉於既枯不崇朝而吐秀時雨適至生意滋茂萬綠翠數千枝玉?乃剪取而熟之映水瓷之滑溜既愜予心尤利荐酒於是澤以醪醢佐以老?凡調和其滋味益助發其甘芳蓋松脆而適口復潔淨而清腸更易饌而生療亦旨美之可嘗時則腹疾新蘇靈府通疏方戒茹葷惟許擷蔬凜百物之多忌惟一韭之是需生意續而不斷物性溫而無虞每嚙之而適暢復何異乎膏腴憶杜陵之夜雨炊黃粱而與俱嗟夫非此韭風味之足嗜者乎彼以二十七品而讥庾郎者又奚恤於此徒

延平新郡賦【有引】

延平閩喉襟郡也上則建安汀邵順流而趨下則興福漳泉溯流而會古為鎮以延平名厥後鎮陞為路至南唐始以劍名至宋又謂西川有劍州加南以別之其得名之初蓋曰晋雷華為建安從事佩其父煥所得丰城劍經延平津劍躍入水華募善沒者求之不見劍而見双龙焉遂指為張華所失之劍亦會於此而証以神物終合之說然而非也昔張茂先仕西晋誅死于洛終其身未嘗至閩劍何由合今則諉曰華禍將作劍倏飛去非誕妄傳會而然耶或謂双谿所匯狀類交劍此說近是而郡人則相傳謂劍非美名也其字之偏傍从刃从兩口三人此名大為不祥往歲嘗易置郡扁甫揭于譙而市人忽鬪斃刃下者三乃撤扁迄今弗敢署民實病之至大皇慶間同知郡事赤盞公显忠來訝鼓樓无郡扁詢諸耆老耆老以實告且曰厥今時平兵息愿去南劍名復名延平于以避俗忌从民欲可乎於是郡佐盞公以聞於上司上司以聞于朝廷延佑初元三月十有九日显允信陽韩国保前已授南劍路总管矣郡佐盞公時相以為言改授延平路总管八月佩新符牧雄藩差谷布宣封部丕聳方將葺旧譙揭新扁用欽承天子之明命以肅邦人之觀聽郡文學掾吁南刘垞賦以美之曰

於皇大元有赫厥声嘉惠远藩申锡美名猗与盛哉允宜扬休命而彰威灵者也眷惟延津形胜天成据七聚之要冲控八閩之纵横衍山峙秀笔峯凝清东望则谿滩石涧势若蛇萦万桨顺流拥泊福城西望则叠嶂层峦螺髻引绳远瞰樵川倚如坐屏南望则千山奔马溯流欲升亘乎三华界彼临汀北望则芒芒坦涂间以茂林驂传旁午会于建宁既提封之广袤亦生聚之繁兴临以三品之总府卫以万卒之连营闐闐罗星车马喧霆垂杨?乎康庄长桥跨乎清泠寺钟楼鼓朝莫铿鍤此非昔日陈侯海创辟於荒翳张侯鬻扞患於纷纭者乎毓人之英由地之灵则有续道统阐圣学如诸贤之屹山岳又有树名节摅忠鯁如诸老之炳丹青魁儒秀士肤使名卿前引後随佩玉振纓独怪夫郡额之弗称致啓乎羣喙之讥评何以言之夫树屏建侯职重宅生万姓之所具瞻一扁詎容或轻固宜寓公正寬平之意副休养生息之情奈何点画意象之间乃露锋刃斩刻之形杀机隐隐羣心兢兢至驟起胥戕之兆而占者谓字体之宜更也彼西川以劍名者乃其銛峯峻壁之克肖而是邦亦名以劍且祖夫晋说之不经若尔则为世道虑为生民矜可不顺衆志思小惩乎爰有郡佐披襟建明闻于台司达于彤庭乃出纶綍命钧衡其以南劍易以延平於是置邮传命一札万里导迎圣恩滌濯俗忌时则显允韩侯诞膺眷倚指是邦而集牧候临遣於殿陛奉異命以啓行佩金印而戾止仲秋之月玉宇澄霽差谷旦以宣藩出新令而布治胥吏罗拜僚属环跪箫鼓喧迎旌戟拥卫府寺改观山川助喜风动乎五色云封乎四履而又延平之名方新适与延佑之元相比无亦气数之前定匪由人

谋之拟议耶嗟夫名则美矣实亦宜尔儆敷政之失中虽易名而何谓故乃玩平之字绎平之义其於政化大哉关系盖尝青灯继晷考诸汉史吴公之为河南贤守也曰治平第一宣帝之称良二千石也曰政平讼理固知古人治郡惟平则美毋谓名已改而实可弃也且权衡不平则轻重穀波澜不平则舟楫废况夫千里宅牧之权五马金章之贵据案执笔生民命脉所寄者乎是宜守醇闷敦简易酌柔刚戒偏滯勿私喜怒勿违律例吏胥当戢也弗戢则舞文弄法而平者陂豪猾当惩也弗惩则弱肉强食而平者蹶谗谄当察也弗察则变白易黑而平者圯矣故聽讼主乎平则无理者不敢以货餌折狱主乎平则无辜者不至於冤死一平广布万善斯备万善所感诸福毕萃由是而贯幽明息沴戾雨阳和调黍稌丰峙斯时也渤海之牛犊勤耕颍川之凤凰呈瑞政绩着闻重加褒玺詎止为公为卿宜孙宜子且邦本所关国祚亦受祉矣儆或昧持平之道亏和平之味私蔽乎公以非易是虐用鞭笞弗饬簠簋华村多吠夜之犬石壕有捉人之吏将见不平其鸣喁喁沸沸勃郁哽塞乖气召沴则否德而殃咎奚避是故因颂进规式警有位为政不陂太平万岁

迎春赋

仰天运之周流兮殆有似乎环循怅残腊之垂尽兮又将迈夫新春千山积雪八荒屯云正寒气之侵肌俄洪造之转钧岁千易而逢卯月律转而建寅尔乃丹凤颁历土牛祀神盖四时之更端而万象之维新若夫风日酣美燕莺娇媚亭馆欢声畦陇生意园林粲其锦铺笙箫喧而鼎沸此则游人之乐自迎春始也东作届期犁鋤如市夫耕妇饁儿嬉女侍社鼓冬冬秧歌娓娓此则农人之乐自迎春始也晨曦初升春诵勤止坐对圣贤心醉经史讲明政化之原沈酣义理之味此则士学之乐自迎春始也嗟夫一岁之首四德之元芒芒大化旋转乾坤极而必反寒而必温世俗徒见夫时序之改君子独惜夫日月之奔此所以有感于迎而为之销魂也与援笔成赋孰识其故春风已知入我窗户

閱武賦

缥缈浩荡灏气凄爽千骑翼而外围万卒聚而内向牝牡互列方圆殊状神旗豹尾崇牙虎帐戈甲明銳旌戟鲜强傍罗偏裨中立大将部勒既定沈声息响飞一骑之传呼纷诸军而勇往乃左乃右或下或上试攻伐击刺之技严坐作进退之象陈法合乎孙武陰谋本乎吕望纪律严整气色激壮俄申令而校艺乃拔尤而行赏矢欲破的槊欲穿强或挥刃而略陈或说劍而抵掌莫不骁勇矜奋趨捷纵放炮飞空而星流旗莽野而尘涨风云回合乌鸟悲怆歟飞镞之命中翹万首而齐仰已乃卷旆鸣钲解严休兵奏角兮振扬杀气伐鼓兮激畅军声步骑序行按甲归营我士无譁惟闻马鸣喧市人而拥观羡军容之精明恭天命以征讨必靖乱而致平客有诲予者曰子之谭戎讲武伟矣抑尝思右武之流弊否乎大凡备不设奔胜贵能持天道恶杀国宜畜威倘佳兵而不已必生灵之难支故当軫荆棘凶年之戒宜勿犯不仁焦烂之讥且子独不见夫迹日江乡之苦兵者乎一闻过师麇奔鸿飞踰冈越巘窜伏颠隲荷甌釜而负衣橐攜幼穉而扶老羸或风雨而雪霜竞号唬於寒饥井竈无烟况闻犬鷄盖其引避之不亟则虏略淫污而罔遗悍卒纷其肆暴主将伪为不知分甘是务谁恤创痍故乃粟空于廩鱼竭于池或不幸而相遭必执缚而鞭笞其遇敌也率夺气而怯战其贼民也反攘臂而怒驰逮军

行而民还则生业之已堕既尽坏其器具且不存於门篱岁如此者数四叹虽生其奚为斯穷黷之貽害虽传闻而已悲嗟夫仁以为城义以爲池循吏布於郡国良将镇乎边陲轻刑薄歛除暴禁非四民乐业五兵何施是以归马华山而天下一干羽两阶而有苗归至是则春秋之閱武特以示弛兵忘战之危而道德礼乐之化自可固子孙帝王之基天子有道守在四夷老子曰兵者不祥之器不得已而用之

云间赋

吉士萧子来盱丰托云间以自表而徵词于水云村之病翁翁爲之言曰夫云也者天地间神化之尤者也而其气生于坎宫出于山川行乎太空翕忽聚散缥缈郁蓊其发舒也肤寸而满六合其变幻也苍白而异始终其附乎日则晃漾远迩其乘乎风则飞扬西东凝而雨露则万物资以润泽藏乎穴洞则窅然莫覩其踪为庆爲祥匪电匪虹云之神化若此也而子寓意于云之间得非慕昔者之陆士龙乎抑予闻之士龙之为士龙一云间也僧住半间云半间亦云之间也子将奚从以予观子闲静守默如云之未离乎崆峒杰出卓立如云之特见乎奇峯留情於诗云态悠悠寄兴于琴云意溶溶是将养其资成其德从龙於云中矣宜足当云间二字之封若予也固乐与云相从但其荒村浅水游氛薄霭又安望云间之下风虽然有一于此子方壮吾且老各安其分尔又何计乎穷通方将蜕吾形凝吾神飘然上溯太清之蒙蒙斯时也子其云间乎我其云间乎同乎异乎盍应之曰将无同然则孰究其所终姑举弦而挥之目云边之飞鸿

水云村稟卷一

卷二

钦定四库全书

水云村藁卷二

元 刘埙 撰

碑

参政陇西公平寇碑

大元运神武以制六合任仁贤以福诸道江南既平阅十有七载南北一家烟火万里海澱岳静风恬日熙彼有负险阻萃渊藪啸呼萑苻或一二见不旋踵而釜?以平机隍以宁由皇威丕畅遐迩率服厥亦惟蕃得人绥靖有方方式克至于今日休至元二十有五年畚寇锺明亮起临汀拥衆十万声摇数郡江闽广交病焉猱健豕突草萎木枯血肉填谿谷子女充巢穴有旨进讨辄僞降以欸我师明年邱元起广昌与明亮犄角弥漫浸淫遂及我丰丰民素弗贰顾力不克拒则有被胁而从者焉势张甚又明年春贼大至陈河田陈九陂又陈小莱锋交焰炽势益张遂犯州州南门实阨江贼乘桥攻门是时诸军甫集出营黄原城戍单弱蕃垣荡夷事且急乃断桥以拒之守兵飞矢露刃州民撻瓦投石适雨暴江涨贼阻深引退既退势犹张焚戮村落亡虚日州惟闭关自保云沈雨凄官民惴危老穉悲戚救我者谁一日陰霾划开天宇澄霁则参政李公来号令新和气回军声壮风采肃乃啓城关乃发仓粟乃寛刑辟乃缓商征政有便民者罔弗举民始有生意贼亦望风鸟兽散於是责官吏以招来分师旅以讨捕悔过宥之负固诛之州境毕清则率诸将搗邱元之巢歼其渠离其党辑绥其流亡振旅还州州人香旗欢迎感极且泣曰生我者父母全我者参政也自邱元败而明亮孤不数月贼悉平呜呼公之功伟矣公端人也其仁如春其清如水其诛赏公平如权衡其在军中手不释卷虽羽檄纷驰犹崇学校修祭礼非其本领正识虑明曷克若是昔公先太保武愍公来救吁吁民尝刻碑府门今丰之危视吁弥甚而公之德视武愍有光焉是宜碑顾碑亦未足以彰公之德也陵谷迁易此德不磨日月晦冥此德不掩肉腐而骨骨朽而土此德不忘屹两碑以相輝垂千载而有永姑借是以寄邦人之思公名世安号龙川家世河西徙居燕为江西等处行中书省参知政事有年矣勲名著闻新膺特旨因任云颂之以诗曰维元受命诞扬厥武有伟混一卓越旷古东洋西崑北漠南溟星拱云从畴敢弗庭蠹彼汀畬乃作疥癬虬撼不量虺毒肆吮暴骨成邱流血成川浸淫吁丰衅积兵连寇环于疆孤城岌岌幙燕釜鱼孰紆其急德人惠来遂活吾丰其人谓谁参政李公威惠翕孚谋断兼足国手雍容立整败局昔公未来民与死期公既来止和气春熙昔公未来啸阻篁竹公既来止妖氛夜肃功成而东舟载月明父老太息孰如公清公恩弗替人思弗已纪德于碑名父名子丰峯峻极吁水深长我土我民千载靡忘

丰郡三皇庙碑

鸿蒙分天地位贞元絪縕之气旁薄郁积而无所泄有圣兴焉是为大皞氏逮夫停蘊寢久贞元复会即有火土之瑞者出焉是为炎帝又为有虞氏世俗第稔闻璧合珠聯口诵习熟谓伏羲神农黄帝实接武以相继逮考古志乃世之相後先殊远由黄帝溯神农中间相去已三百余年又溯而上之盖不可知亦悠远芒芴之极矣而三神人者或显卦画辨陰阳以露神机或尝百草品药性以开医道又或着医经制鍼法以救民生俱能壽斯人欲絕之脉补造化不及之功世咸尊称之曰三皇三皇於江南故未有庙至元混一令郡邑俱建医学始立庙南丰縣陞州二十载犹未庙也春秋祭朔望拜率侨寓于馆驿于佛堂金曰弗称顾卒无念及者太守陇西公之来也谓此弗祀非所以承诏令尊圣神得故主簿厅废址於州东北隅卜之食洙茅运甓募匠市材捐已俸率医人致助大德庚子春始构创中为正殿旁为两庑外为医学门又外为棊星门明年庙成卫以桂栢环以垂杨甃砌洁整丹堊明焕三皇塑像南向四正绘像东西向公常躬程课无倦意月朔望公常躬奠谒无废事命医官诸生审究脉病证治交暢互闡雍雍于于又明年公政成衆慮其久而忘也请纪诸碑予尝叹流俗浅识类目医为技术乃未知医之济世功配天地何也天地生人而不能使人之无疾人而疾吁天天漠如也叩地地默如也疾弗瘳则必反而求诸医医得人焉则痿痺蟬痛者止羸瘠者盛壯而垂絕者不死也曰功配天地非邪厥亦惟三神人者发天之机啓医之教然後雷扁和缓仲景华陀叔和思邈之流与凡历代名医得以继作迭兴极神圣工巧之用救虚实冷热之偏脉有诀药有方十三科有传亿兆生灵之命有赖家祀祭而户尸祝礼亦宜之侯邦实司民命可不祀乎是故太守倡义勗建按令式严祀典于医道有光於礼亦宜余尝获从公陪祭清晓班庭中月星朗耀栢桷翬飞觀殿上烛光摇曳灵风肃然献官盛服端笏降登裸荐如礼羣执事无不恪恭就位讫燔瘞罔敢惰余叹曰盛哉祀繇庙兴庙由公兴顾未有表显之者今诸君慨然碑焉益盛已因语之曰庙存祀存即公名常存抑未也继公者心公之心修完繕饰俾勿有坏庙存祀存亦与公之名俱存诸生曰然其述此以志不朽乎遂书以授之李公名彝字宪甫安次人尝金浙西宪事今以奉直大夫知州事云系以诗曰

三皇圣神开天建极肇基医道跻世壽域洗痾濯痼植仆膏萎造化同功万国祀之自丰曰州医未兴学贤侯涖止新庙是作广殿崇陞威顔凜如生徒在庠时讲方书庙千万年名与俱久勒诗坚珉式克劝後

大田广佑王庙碑

广佑王发灵樵郡之西乾其庙于盱江之鲤湖嘉禾之聿水之大田则支分者也王欧阳其姓佑其名隋时为温陵太守受代归舟次大乾而溺因葬焉地人遂奉之为神受王封列祀典世传其溺时事特异余不能述述今事而已大田之祀盖自鲁氏始旱涝寇疫禱辄应往绍定己丑岁暨至元丙子岁着灵尤伟妖氛以清生聚以完赖王之佑且数十年顾祠弗建羣心郁焉鲁之族協谋由马鞍山迁祠于村心富者捐貲粟贫者输力役经始于丙子之某月落成于某年某月里中士侯君在复为之加丹雘峙閭墉犹以为未愜也谒余文记其事余惟圣门家怪力乱神不语余亦安知夫世有降灵附语帕首曲踊遂号之为神者余独证诸实理即传有聪明正直依人而行之说在曰神矣无形体无声臭也陰房鬼火古木鸦声昼歛杳冥默若响答者何居曰人耳人而神则神也又何居曰心耳是谓神舍是谓灵府豚蹄孟饭俛伏咕囁叩若

应视若临庸非吾方寸妙用实为之而荒庭古屋绘形象偶直其寄也今夫大田之地不接于西乾王之马足不践于兹土乃肸鬻着明之若是无亦人赖神而安神因人而灵人心信奉之弗替即庙祀亦千载勿替可也大田之人勉乎哉若夫侈神之灵有贡士侯君舜举之述在余故不书特为赋乐神之诗使岁时歌以祀云诗曰

大田之山兮青青大田之水兮泠泠神其来兮驾西乾之云息兵兮殄疫时雨阳兮多稼无蠹
螭有永千秋兮于兹庙食鼓坎坎兮舞蹲蹲希鞶鞠兮罗荐芳馨神人相依兮百世是承

贞元万壽宫碑

道观僊宫有甲于南丰者曰贞元万壽盖故灵都观也其初则魏真人元吉祀玄女肇建观号贞元於宋治平中改赐额号灵都於今则大德庚子岁陞观为宫仍灵都贞元之号而加万壽焉兹其建置沿革之大略也其址则据州治之东挹江山倚闌闌夷旷轩豁爲诸观宗其派则支分於桑田而建观者号长生又分於石谿而建观者号栖真甲终乙继咸祖灵都兹其始基与析派之大略也慨思往昔观阙迢嶢像设俨肃徒侣无虚寮而经诵罕暇日盛哉久矣孰知夫丙子劫运南北兵交金文玉字还于大罗月地云阶幻为焦土仅存者寥阳一殿尔环顾阒寂惟觉景之异心之悲则有陇西冲真师出而拯之当榛磔荒残中鞅掌仪图誓复旧观愿力感夫神灵诚意动夫檀信由至元戊寅迄大德戊戌是营是度弗完弗已卒能俾修庀翼如端门屹如三元殿羣道寮整如即今之碧甃丹楹雕珉藻悦昔之断础荒烟磷蜃栖息者也今之昏钟晓鼓香薰烬輝昔之空庭日永人物罕景者也兹其兴衰复古之大略也师服勤至矣乃思长生为观实我同原顾積靡弗修久即益圯於是欲加葺完而命其徒李以观嗣焉复念栖真煨烬则命其徒谢庭芝起废焉一宫二观鼎峙崇隆论者无不多师之功余亦谓师诚有功也一日其徒来前曰吾师之功信然矣後千载孰有知其然者乎干文施垂不朽以观壽也敢请吾闻圣经有曰人能弘道又曰苟非其人道不虚行然则人其道枢矣乎非宫曷阐是道非人曷兴是宫吾故为师着之复作诗以侈之师名逢庆字冲真历本郡道正今提举本宫为道教首诗曰溟滓寥廓大道之原其宏也人昭哲天渊於皇玄元教衍亿世弥久弥昌惟其有继晔奕真宫诞镇吾丰昔何靡靡今何崇崇门阙穹华径涂坦辟璇题干霄金铺耀日僊真列班天丁卫闔威凤盘旋驹虞徼巡西掖专祠玄女吕祖两庑分祀百灵疏附瑶坛整洁琪树鬱苍人静月明笙鹤来翔霞服星冠朝真礼斗磬挟风清鼓腾靄吼谁克登兹惟冲真师劫运际逢身翼卫之啓後光前流輝着誉繇师愿力威神协助恢衍遗?长生栖真由师指授缮饰咸新衆庶罔功帝德天覆老臣稽首永祝圣壽

水云村藁卷二

卷三

钦定四库全书

水云村藁卷三

元 刘埙 撰

记

南丰州鼓角楼记

至元二十有一年甲申岁冬十月南丰州新作谯门成书始也始陞州也丰故壮邑甲江右岁值壬午隆以州权专决直达与吁抚等邦侯超尔自山东来开藩是时阻江初息磔壤莽苍官寺仅完门观弗峙土垣柴扉过者平视侯曰嘻崇闳丽谯所以存制度耸观瞻也邑皆然州顾若是宁不轻政令而褻等威於是储俸节费致木与石公私丕应楼是以成杰栋巍檐疏棂坚檻云山拱映采堊华焕其下则中通瓮门旁峻石壁壮扉巨键目耀心惕入者鞠躬罔不兴叹何昔卑隘今雄丽也礼诸侯门阿观阙隆杀有经僭侈不可俭陋亦不可郡国视古诸侯侯今能是是谓知礼抑非曰徒以为观美也夫伉门列戟以威远迩鸣角伐鼓以警昏昕有官守者盍思焉凡蚤作而聽断莫休而宴息闻声深省仁声得无未徧四封者乎识察得无未极高明者乎闻闾阡亩得无未安於兴寝者乎奔驰赴愬得无扞门禁而未通者乎因斯楼动斯念殆凜然若不能以终日观美云乎哉侯涖州垂六年政绩着闻诏俾传袭行且入覲矣邦人士念侯经始之难请刻文以记故书至元二十有五年四月朔日记

观空堂记

乡先生桂谿佑诗名满江湖而肥遯万山中筑室三间藏书千卷窗明几净将以逸老扁之曰观空诗友刘埙为之记曰空矣奚观观空云者瞿昙氏说也愚不熟贝多语请以意言夫空非无因而得名由不空乃始有空即空与实对矣彼不观实惟空是观将亦厌夫实之不足恃故移其观於空邪顾未悟乎空者正乃实为之尝试求诸一身有五官四体有五藏六腑焉尝试求诸一家有田宅池馆有器用财贿与凡旦莫取具以养生者焉尝试求诸一国与天下有宗庙社稷有朝廷百官有土地人民兵甲府库焉夫焉往而非凿凿精实者日月几何死生兴替往往毛骨皮肉化为抔土乱山寒云嘯鸟夕阳牧豎樵翁相与长吁而太息而其华榱雕梁或後嗣之弗克守或倾颓而灰烬焉南亩东臯岁入佗姓家所藏蓄散落人间其在上者则秦城之金人晋陌之铜驼运去祚移鼎迁物换虎豹九关玉帛万国而秋风禾黍遗老呻吟虽万乘九州之权曾莫能留观於晷刻悲夫实不足恃乃若此也彼有畏其为吾累者始欲观夫空矣由是言之空由实生实互形而空乃名诡曰观空孰非观实朝莫四三吾累均耳令吾有以药之请无观空而空其观何如且人以实为空非也吾视空实等亦非也其眩於两端若是者将非观为之邪而能颓然释然遗尔形收尔视泊乎反其初无观即无空乃莫吾累矣苟未能废

所观而曰空也者虽阒立旷野洞视太虚然心目所及宇宙之内触景皆实物游氛幻色亦足点滓将指何者以为空而又何观斯堂扁以观空达矣又由是而空其观乃真空也已瞿昙氏之说未也先生然愚言请以是为记不然请示吾以空

崇觉报慈禅院修造记

崇觉南丰古刹也在唐名禅祖其易名自宋绍圣二年始历五季摧毁其复兴自曾氏始曾於是邦为望宋初大师密国公致尧首捐货新佛殿其後南丰先生文定公巩堂封兹山中有司按令甲禁樵牧自是崇护惟谨又其後文肃公布登政府援故事请以为功德院祠其先有旨赐今额崇护加谨又其後参政公渊子帅江西其季刑部公冲子守南安过家上冢展敬先祠当是时旌戟列隧前官吏走道上崇护愈益谨而院亦滋燿矣故虽田入不丰徒衆不蕃而上下三百年间获与名山巨刹齿骚人之所咏歌游宦之所赏称岂无自也初景德壬戌岁主席弗胜任院几废曾之胄玉局公钰与其宗人高询谋於衆选僧於佗院得定亨者使领之亨为人介且勤谓宏教法饬敝事吾责也苦淡节约恳恻祈懇时则玉局公与高为之新其法堂焉桑海俄更方袍蠹銳鲜不弃本务而逐世好亨独坚确匪懈惟兹院是营命其徒贵聪题募远迩时则有衆缘为之貌诸天构钟楼焉僧寮之创则亨自力也檐楹宿云垩绘燿日鼓喧钟鐃薰芬炷燁亨方益思以侈饬其教伤哉逝矣聪也闵乃师兴植之劳惧久且忘谒记於予予考元丰类纂诸志铭书曾氏兆域率曰从周乡之原头从周则今昌後耆原头则院所都也慨思是宗之显荣翕赫时其福兹院也宜甚厚鼎迁物改之余保固宰邱寅奉祠像视昔崇护罔敢替盖院以曾氏兴曾之冢祠以院存勤菑而丰获茂施而裕报理也而亦有惑焉数百年汉唐仁义之泽酣润融浹昭天漏泉宁无一丝髮之足系百世者樊崇温韬辈顾忍之秋风陵树金椀人闲乃弗获下比於兹院之所封植则又理之所不可推何也余数游兹院爱其岚翠葱鬱金碧华焕或时摩挲荒碑睨梁题岁月辄油油然徘徊思古凄楚伤怀为之动无穷之悲而亨能主此以不负曾氏聪能念此以不负其师信可书也为记之且勉之曰尚其善继乃师之志亨萧氏子繇宝峰住兹山凡十有九年而寂徒二人长聪也次贵慈大德四年庚子六月日记

州城隍庙记

大德三年春燕山李公彝以前宪臣来守嘉禾郡甫数月威惠流畅四履丕耸则因事之废坠者补饬之而城隍之祠以新盖故祠毁未复二纪矣斗室名存颓垣败壁间断烟寒鐙幽隘寂阒数议修畏陰阳拘忌之说公曰嘻有是哉城隍有神列祀典关政体其非淫厉之谓即废弗祠将无以妥神灵福民物吾守臣何敢慢复何拘忌之畏捐已俸以倡协衆力以助选里望以分任曰邓端汝其督修正殿曰李定汝其督修香亭曰陈拱曰朱敬汝其督修庑与门咸捐货赴令惟谨耆老率州民致助益谨明年庙成又明年正月丁巳迓神以居崇阁飞檐文砌博础圭袞中峙劒佩傍侍裸荐丰洁妖厉伏息州民大和会蕲余记之按周典以吉礼事邦国之神城隍有祠其殆始此又按史吴以赤乌元年修芜湖城隍祠至高齐慕容俨梁武陵王纪俱祀城隍其祠之寢盛又如此而山陰陆氏谓唐始祠城隍误矣惟南丰徙邑自开元始其祠城隍疑自兹始古志谓故宰游侯茂洪功德在民民祠以为城隍之神余不敢知余独以为画城郭浚沟池建官府聚民庶诛赏於是歌哭於是孕育长养於是地载神气安可无精爽以至神明

而又安可无栖神之宫尸祝之庭邪况是神也实与官府分职事共理民物吾有司涖政而无所聚居而无宇则其心将惕然不能以终日彼聪明正直依人而行以扞御患菑一郡寄命乃风雨薄之土草蚀之王仪虚而民志郁踰二十年曾无一为之惕然者独何心邪惟公破羣疑蒐坠典构创一新而民不知役继今官无废祀之讥民有报祈之地神安民亦安是宜书也故书抑是役也非其僚友和谋虑一徵肆牵沮其独无倦乎盖主其议者有长官巴延彻尔而协议者有佐贰杨泽常泰也故并书若其規制广狭之宜支费多寡之目与夫用不足而取给於四提督者刻於碑陰故不书

莲社万缘堂记

佛教入中土繇东汉始溢为莲教由东晋始分为丰郡万缘堂则由至元己卯岁始也远公开莲社更十数代历十数百年远矣而寢盛南北混一盛益加焉历都过邑无不有所谓白莲堂者聚徒多至千百少不下百人更少犹数十栋宇宏丽像设严整乃至与梵宫道殿匹敌盖诚盛矣斯堂特其一焉尔初州东之偏有胜地曰万家冈南城吴氏世业也有乡民曰觉全君莲社道人也断荤血持经法五世矣堂未建觉全期建堂偏走於有力者吴某於是首捐地沿旧冈名更曰万缘已而有过用昭者捐赀以市材有吴文容者捐田以贍衆堂之成久矣记未作觉全来求记余闻毗卢遮那之为佛祖也一清淨法身而已世有嗣佛教者亦惟清淨其身而已种莲结社其非取清淨也乎余特未知嗣之者果能是否夫落须髮释冠巾絶人道弃世务澹寂凝固泊然於无为之境佛之教也有室庐适其温凉有饮食饱其朝莫外无饥寒之忧内得以专一清淨之学力到机熟心华自发宝月自见入妙悟成正觉佛之意也余益未知居斯堂者果能是否嗟夫彼其须髮荡然冠巾弛然吾犹未见其能然过此以往滋可惧已羣聚而裕处苦志而勤修一席之安至末也一餐之饫至微也顾清淨之学不可惰白莲之名不可玷也人何为而人佛何为而佛其知之乎未也则有吾六经圣贤之训在又将为汝陈说焉

南安路学大成殿记

王者之祀古惟以庙故易曰王假有庙诗曰清庙祀文王殿则未闻也唐祀夫子亦惟曰庙宁非谓殿统於庙不复专称欤乃若安灵以殿名殿以大成焕乎宸奎之昭回则肇於宋迄於今何其盛也永惟庆历诏下凡郡邑无不有学学无不有大成殿栝桷罍鼐比隆治朝闾閭桎梏俪美輶道又何盛也横浦古佳郡盛儒风读苏公一记旧亦知南安学为重矣大成有殿屡修屡圯逮迨岁圯益甚荐修完复蠹腐欲圯适符离王侯至暨教授永嘉张君梦桂谋新之徵费於学市材於山募役於佣期岁而殿成堂阁门庑因旧加葺焉建昌郡博士胡君长孺记之久矣推官孙侯来南丰求余作後记余辄因名殿之义谥诸生曰自尧至夫子七圣人者天下之大圣也独称夫子曰大成岂前数圣未溃於成耶尧舜禹汤文王以大圣而为君周公以大圣而为相据崇高享富贵而行其道於礼乐刑政间润泽浹生民声光赫当时夫子泊然一匹夫尔挟其聪明睿知之资与凡经天纬地尊主庇民之学今日鲁卫也明日陈蔡也位不高道不行其曷曰大成然而识者曰贤於尧舜矣生民以来未有矣如仞墙如日月如天之不可阶而升二三子之取譬若是也何居无亦曰身都万乘福泽仅周乎一时道在六经功德可垂於万世二帝不再帝三王不再王当时巍煌直如一点浮云过太虚而今安在哉吾祖述尧舜宪章

文武載諸經籍者百世師用百世之唐虞三代也千萬世師用千萬世之唐虞三代也其孰不曰大成士而游於學也詎止朔望釋菜春秋釋奠而已興俛折旋乎殿庭間印首觀焉名殿之旨如之何弗思而況十行新播二字增封所以翼扶章顯者益至又如之何弗思對溫厲恭安之容而想夫金之聲玉之振神游千古與聖同符節雖未識其大成亦豈不可為成人也乎張拱闊步虛氣高談心不存道行不副言上焉者以詞章誦說為儒者之極功下焉者蟲鼠其態虺蜴其志甚至有不可勝道者登斯殿者吾夫子有靈其誅之矣夫子不汝誅也聞斯言而不悛則身存而心死心死天誅之也即夫子誅之也余恨不獲俛伏殿下與其為士者評之孫侯宜因吾記轉以勉之可也王侯名虎翼今移鎮撫州其在南安也多嘉績皆可書而知修學為先務宜特書孫侯名萬鑑由推官擢南豐知州乃不忘舊治而求以表章之知所重也宜并書

南豐州重修東岳行宮記

南豐東岳祠壯麗甲東南四方觀者有是言久矣若稽古志祠創於宋嘉佑中時劉宰令先尸其事營度廣袤規制宏深繼以治平宣和之充擴又繼以紹興之繕飾繇是寔完美故侍宸王真人文鄉應詔歸里題於祠曰景物繁麗頗類深宮誠哉是言今僊墨猶存可驗也逮淳佑辛亥復修而咸淳戊辰水蕩之聖朝至元庚辰又修而弗克終之比歲詔書崇祀岳瀆東岱復加大生之號其修理也宜益謹顧猶缺焉大德丙午歲前元侯正努與少尹李侯質數詣祠下觀其濕漏墮圯壁頽像仆謂非所以承上意尊大神也謀一新之捐俸以倡前郡守聂侯從政郡倅于侯時咸捐俸致助屬吏州氓亦如之選干敏者董其役而元侯躬涖焉經始於大德丁未之五月落成於至大戊申之三月葺帝後殿構疏妝樓敞端峩崑兩庑因旧而加蓋覆塗墍者為屋凡一百五十餘間鼎新創造者凡五十有五間塑像因旧而增飾者帝后而下凡五十有一從新雕塑者帝像暨諸像凡二百丹堊輝華整砌潔其或未備則今郡侯綽哈實足成之是祠也視嘉佑為有光而壯麗誠為東南甲矣州人屬予記之余聞先王制禮諸侯祭封內山川今岱宗峙於齊魯之境其祀也宜無越其封也後世廟祀乃徧郡邑得無與禮經戾與善為之解者曰東方生氣也民物所資生也宜祀以禍福恐動者曰泰山主生死也益宜祀斯言也非愚所敢知然而樂為之記者有以也凡祠廟興廢系乎時爾聖主如堯舜宇清泰豐雖徧州落萬山間而天幸際樂歲官無苛征民無轉徙乃得以崇幽靈之宮顯升平之象非時也乎耄穉士女瓣香拜庭褻回笑語第以資游觀之娛而誰知時和歲豐民安神樂皆上之福澤涵濡以致此也倘如佗州異邑旱蝗頻仍流徙迸溢即民有環堵且弗保有司議賑救且弗暇而暇及神祠哉於傳有之先成民而後致力於神信矣吾人生此州逢此時觀此事遂得為太平幸民其為此記也非徒侈祠廟之修亦以賀世道之泰云是役之初鎮守總管林侯應春亦助費而提督某某助尤多若諸鄉人戶題助者別刻石以紀名至大二年己酉歲某月日記

水云村記

余家南豐之西里距治特數十步而近夜聆譙鼓聲冬冬如在枕邊而深巷無鄰幽華疏竹蕭閑淡雅俗氛市聲所不到或竟日門無轍迹居然類村落間出門數武吁江橫陳江外南山孤聳綠水環洲渚白云生洞穴客因名以水云村予亦自謂水云村嘗有寇至去之寓吁城八載乃歸歸而海桑變人民非獨村中水云依然竊以為吾之於世也流蕩惟所東西飛揚安限南

北哉故复自称水云村客亦谓予水云村盖尝酒余书暇散策村中抚水波云气而叹曰人间世孰非水与云邪今夫聚则形散则气倏贵倏贱之楚之秦甫笑语之团栾俄声景之磨灭即有身一水云尔邸第俨乎鼎盛烟草忽其荒寒部曲传呼而烝尝乏人阡陌弥望而後昆丐食即有家一水云尔光景如流生聚易散葱蒨畅茂而槁乾焉富强雄盛而衰谢焉即天事一水云尔水乎云乎名吾村乎谿曲浮波滔汨昼夜山椒游气变灭须臾乃万事万物亦一水云而天地一大村也悲夫水底东流人不知白衣改变为苍狗顾以彼之不可羈而停不可执而玩者恃为长且久千古达观殆将一笑吾於是乎有感矣故笔之为水云村记

水竹佳处记

繇州东门外沿吁水而下二十里其地为梅潭繇梅潭絕江而南其地为查谿濒谿有隐者居焉其人为月潭曾君余尝过其庐乃在翛然水竹间清漪沦涟翠玉丛郁余絕喜之为名曰水竹佳处君徵余记余语君曰竞利名者趋市朝适兴趣者乐山水山水之佳视市朝不大胜乎尝试即君所居而求之韶景冲融桑麻杳靄耕犁如云江鳞游泳春之佳处也梅林诸波舸舰衔尾龙儿解箨禽语宫商夏之佳处也秋之佳处山眉洗黛月浸澱江蕢蓼映而鸥鹭飞冬之佳处疏林枯梢琼田玉界行客稀而渔舟沸佳矣哉四时乎且也庭宇深明琴书横陈有舞莱子之彩於堂前者有斟安仁之觴於膝下者则佳处不在水竹而在君之家庭犹未也忠厚培福壽诗礼淑子孙动而不与物忤静而与天者游则佳处不在家庭而在君之方寸间繇方寸推焉善积而庆长其佳处正浩浩乎无涯也余亦居近吁滨庭有疏竹顾倚市而多囂乃不能如君得佳处余甚羨君矣虽然幸共一江相距且不大远君如许我则酒余书暇乘兴扁舟将时一诣君焉佳处未必不容分半席也君曰诺其为我歌乃歌曰眇清吁兮紫纁森綠竹兮绕庐谁宅其间兮日月潭翁之攸居俨独据夫佳处兮吾欲绘而为图庭多兰玉兮家富诗书里称善人兮神明翕扶吾祝君以福壽兮君宜懋德以自娱吾欲分席兮君毋笑曰尔何其愚至大庚戌岁嘉平月记

西林院修造记

至大辛亥秋予延平官期至有司给驿促就道西林熔师倏来前曰将为山门干檀施记繕修未遑也而记可乎予曰然师顰蹙亟取幅纸疏颠未见授曰行兹亟需暇为老僧记可乎予曰诺明年春予与诸生接会适小休视幅纸故在因省前诺之不可负也为之记曰吾丰北出揖僊门外有支径繇支径西复北数十武有精蓝其名西林其题扁唐牛丞相笔其竹木深閤有幽趣其檐栋隐映苍翠间有远意至其构创次第则绍定己丑岁成正殿者圆公也宝佑甲寅岁成法堂与钟楼者然坚二公也暨咸淳壬申岁成毘卢藏者淙公也其大略如此而熔则嗣淙者也尝独怅然曰佛殿古矣洊圯洊修圯弥甚吾安得不图新藏殿未古也卑湿朽腐将亦圯吾安得不议徙吾老矣当吾世弗修後将谁修於是持愿力感衆心时则有张某首为之新宝殿饰塑像有邹某继为之徙法轮剏西殿若钟楼则又张某葺焉兴役於大德丙午岁落成於戊申己酉间垔輝而采焕犹神运而鬼输也师勤矣哉西林蕞尔室无寸田可粒无拳土可薪晨昏钟鱼取给饶梵信凄索不易堪矣师清苦所格天龙陰驱仆者起蠹者新继自今当复可支百年亡虑矣乃有名山钜刹匹敌封君而罕克为师所为者非以饱甘鲜侈肥轻即以畜

姝丽广孳育於彼法中此輩当墮何狱顾且魁岸倨肆自矜丰泰曾不悟业由此积罪由此炽故曰师勤矣哉予与师为方外友六十年见师沈朴静严壮老弗贰用医术售恬不自私惟兴造是急犹常曰是何足以见吾志邪将澄寂内照勇彻妙悟期超絕乎尘事经营之外乃或可藉手对吾瞿昙氏也予曰师志乃及是乎即法云地笔藏海皆师佗日到处而予亦志是也久矣空劫有家愿分半席因备载师与予素论如右而刻之石

陆文安公祠堂记

延佑某年六月甲子泉南伟特士李君肇建陆文安公祠堂成使友来告於文学掾刘垞曰不肖志圣贤之学勤矣初宗建无所得宗江西洒然若有得也因辟家塾揭绘像日与诸生严事之未有记也敢请予竦立曰言何易邪事关道统予安得而易言之也友重请弗置则举昔所闻於师以复曰鸿蒙未分道涵太极太极既判道属於羣圣贤自尧舜累传而达乎孔孟自孟氏失传而埃夫宋儒故有周张二程濬其原而周则成始者也有朱张吕陆承其流而陆则成终者也脉理贯通心境融彻殆天地重开而河洛复泄也道之统绪略见是矣中原远难具言言其近则朱文公起於闽张宣公振於湘吕成公奋於浙莫不昭回峻极砰轰动荡时则文安公拔起西江而与之齐其志气神其识趣卓其学宗孟而直指本心其稟天得而匪繇师授劈析义利则疾雷破山剖别儒释则明镜照日抉人情之矫伪则飞矢中的破俗学之偏蔽则刚风扫云以至该体用之全壹天人之正探象数之奥究政化之原专涵养之功尚务内之学超笈传之錙戒躐等之非诲人读书必指枢要而示以入圣之户庭勉人立志必如镌凿而聽者至为之感泣告君必以唐虞三代为準则治郡必以正俗慎罚为先务凡平昔提警学者恳惻英发无非鞭辟近里复其性初救末俗之支离还太极之全体非盖代英豪千龄间气也夫象峰中天百世稽首朱文公尝曰江南未有人如子静八字着脚曰安得如子静堂堂自在曰子静实高伯恭安得似曰子静平日自任正欲身率学者一於天理不以一豪人欲杂其间至閱公奏篇则曰规模广大原流深远所造深所养厚文公斯言盖天下之公言而私诟病者类曰惟务超悟也曰惟尚径捷也分门护党之风炽随声接响之弊滋而卒之盲瞽有不睹天外之光霁者矣嗟夫终日如愚而曰似禅浴沂咏归而曰似僊彼亲承元圣单传正宗议者犹斷斷他奚怪焉抑文安公之训曰宇宙即是吾心吾心即是宇宙千百世之前有圣人出焉同此心同此理也千百世之後有圣人出焉同此心同此理也东海有圣人出焉同此心同此理也南北西海有圣人出焉同此心同此理也此其寥廓高朗会万归一彼此尚同异者不媿死哉李君之洒然有得独异于是吾故书曰泉南伟特士盖褒笔也宏斋包先生尝言文安之学深造自得本之孟氏孟氏之後至是而始一明荆谿吴先生曰贯羣圣贤之旨可以合一身心之妙充一身心之妙可以补羣圣贤之遗合朱张吕陆之说溯而约之周张二程合周张二程之说溯而约之顏曾思孟合顏曾思孟之说溯而约之孔子则孔子之道即尧舜禹汤文武之道孔子之学即臯益伊仲傅箕周召之学百圣而一人万世而一时孰为异孰为同哉味斯言也事既久而论宜定矣若犹未也则又有正心胡氏之说在曰江西之学如取日虞渊洗光咸池太白残月何敢争耀愚不佞敢诵此以成李君之志谨记

方寸地记

存方寸地与子孙耕古贤明训也延平隐士闻君取以名其堂杏林使君为之题其扁予因为之衍其意曰深乎哉君之寄意也方寸地云者诚言耶借喻乎夫人中两间而立为万物之灵其步趋圣贤其建立勋绩其宰制事物其光裕云仍壹是皆以此地为本律以人间世常理即尺可约步亩可推区区方寸奚适於用惟其隐於中局似若促狭而离娄弗能视公输弗能度盖荡乎无畦廓乎无垠前无始而後无终也日朗月辉吾地能融云敷雨沛吾地能通天渊飞跃古今代谢吾地能统宗宇宙在此方寸中不过太虚浮云尔抑斯地也人共有之鲜克存之略举古隐逸如马少游欲使乡里称善人有意於存者也如龐德公遗子孙以安有意於存者也吾故曰深乎哉君之寄意也君姿端雅而学富贍翛然高隐涕唾浮荣乡论无不推德人吉士少游德公其匹与所居地与庠宫邻其堂足容数十客乃跪曰方寸地者岂固有美於金张之第王谢之宅而为是反说约邪噫君意深矣顾君甫中年尔继今壽九齡即九齡存此地壽百岁即百岁存此地匪直斯今??百世宜永存也愚敢以是为君颂则又授君治地之法曰洁清以洒之母污以喜怒之尘泥坦夷以辟之母隘以深险之谿奔正大直方以藩维之母堆以利欲之粪壤是固君所优为又加勉焉则此方寸者非地也天也愚敢以是为君规君名济时字几安先世自广信徒延平因家焉延佑三年丙辰岁华朝记

积善堂记

繇延平津而东六十里曰吉谿溯谿而上十里曰芷陂乃輿地胜处有宅兆焉曰游氏墓阡游居吉谿有尚义者曰和中居士其存也爱芷陂之胜将卜墓焉歿诸子以葬于是既葬构创其傍曰积善堂居士长子仲安谒予记予曰昔固未尝履斯地登斯堂也子而欲记为我言之对曰言其岁年乎遵治命而窆於兹者皇庆三年之冬也葺治完美迺曰甫讫役者继以二年之力也言其形胜乎则有时贤品题之什咏在先生其为我着之予曰美哉子之名堂乎善之为义宏矣若之何易言之昔者圣人作六经贍万代揭世教辅民彝无不以善为训傍出如诸子百家之说贝多云笈之文亦无不以善为第一义意者彻蟠际贯幽显莫大乎善凡其壽富而安逸位尊隆而宗蕃衍又无不由此乎出也抑世固有知为善之足贵者罕有如子知积善之为贵者噫子何其敏悟邪夫物之积也不丰则其用也不裕譬取帑廩焉财贿日积则帑常充否则易以匱黍稷岁积则廩常实否则易以虚积善犹夫是也子而知所以积则必由一念一事之善至于无一念无一事之非善故纯乎仁爱善乃积间以惨虐非矣纯乎忠厚善乃积杂以刻剗非矣纯乎廉取而优与善乃积参以贪吝非矣予闻易为六经首乾坤为易经首其辞曰积善之家必有余庆积不善之家必有余殃必之为言垂戒峻切凜如科条之不可犯遵之者昌背之者亡善贵乎积盖如此也吾又闻务积善之益宜先除贼善之病病安在利是已利尝与善对始也勇於积善终也流为不善则利心贼之也骨肉财产之争鄉邻疆界之竞商贾物直之计校一迷其心万善俱丧夫焉有所积孟子曰欲知舜与跖之分利与善之间也舜跖相距何翅天壤而其分歧止在利善两字吁可畏已亦可戒已子归而与昆弟兄侄会於堂其以吾言告之他日予获登斯堂又当为精言之仲安名以仁弟仲和名以礼而仲安以文学进今为小学训导云

重修学记

南丰为江右文献邦郡有学旧矣毁於至元丙子重剏乙酉距今仅三纪岁月未大远风霜未大逼也柱石犹完牢而采甕犹章明也吾意更百年将亦足以搆柱乃延佑丙辰岁仲秋夜半礼殿压焉霆轰山崩声动远迩咸曰噫异哉诘朝聚观则殿西虹梁遽折为二栋桡瓦解狼籍委地衆骇视博询迺知昔之构剏也责成欲速弗暇择材故今之倾圯也閱岁未深已致蠹朽又咸曰噫宜哉无足异矣当是时南昌辛公方蒞讲席帑竭廩虚欲得议修顾役鉅费侈趣办无所以舒是忧会东鲁王侯甫领郡政化新风声耸崇文礼士槐芹德色一日语公曰毋徒忧共图所以舒是忧分乃稽簿书蒐遗余有曾贡元梯已庄者故学田也比岁指为贡士庄者谬误也租不入学而有司封贮者两易岁也公谓昔之家居待次也尝闻而愤之誓以隶职之日必复侵疆今其时邪即白侯侯喜遂由州及儒司勘验是实以闻於省遄繇省以下於州匪直捐租乃郅謹皆复侯益喜命发廩易楮焉以定计者踰百儒之助者又什二繇是市良材运巨甍匠资於官丁取於佃侯日诣学忘寒暑指授规画督励工程辛公则早暮从侯竭蹶服劳已而腐者坚缺者全翳黯者光鲜层构飞檐度越於前且复饰衮冕像新棣星门华焕雄峙中外交暎州人谓昔未覩部使者亦谓他州罕及也公语余曰幸哉吾志遂吾忧释矣永惟葺殿宇复田租太守功也今掾蒙太守赐也吾不忘也郡士友弥不忘也惟是学未有记今虽不忘者久或忘之盍记诸余曰诺因是思郡国不可以无贤牧守也而贤牧守不可以不知学余闻侯尝从乡先生野斋李公游其海也勤其悟也敏其言论风旨有习闻而默识故於吾学校尽瘁而於南丰先生遗祠复缮饰焉侯之知学可见也已吁僖公之修泮歌於诗文翁之兴学着於史揆今準昔可书也故书曰延佑四年八月奉议大夫南丰州知州王着重修学殿成学正辛泰来相之是为记若夫协谋集事则达嚕噶齐奉直公巴延彻尔同知州事务孙公好直判官从事周公吉俱有功於是役者也宜并记之

南丰州紫霄华阳岩三茅真君祠记

僊道行世无远还有人焉慕尚崇信之弗懈即远者迹矣江左有郡曰金陵金陵属邑有山曰三茅盖茅僊兄弟成道之地道书所谓华阳洞天者也吾州僻左无知者知亦憚远无游者延佑甲寅岁里善士谿济川懺慨慕元虚始独造焉帆重湖航大江一往复凡三千里受经籙於宗坛分炉薰於灵琐严奉以归归而谋卜地以祀未获也其里之紫霄观侧古称道人岩者临流絶险岁久榛芜而地幽尘清堪驻僊馭观主张惟善啓之济川是之廼铲廼芟廼辟廼鑿乘夷旷而祠三像于中构别馆而祀鍾吕于後苍翠环合风露萧爽咸稽首曰茅僊乃在是何其近也济川徵予记顾予自幼服习孔氏书於老庄氏懵未有闻其何以记则取其所纪载者为述曰姬周公之嗣封于茅後因以为氏秦皇时有讳蒙字初成者隐华山师鬼谷得道冲举传四世而三真出焉长曰盈字叔申生汉景帝时初入恒山学长生遇总真王君方平授大霄隐书九转还丹爰句曲山谓为真洞僊馆也南渡居之哀帝元壽二年叔申年一百四十有五後遇神人授以僊职一日乘鹄去次日固字季伟幼曰衷字思和仕汉并为郡守高年弃官从兄得道亦僊去邑人为建坛宇祠祀光武献金於庙明帝敕修由晋迄唐帝咸受经籙於茅山逮至前宋崇敬尤谨僊书宸翰輝煌日星鹤帔星冠罗栖岩岫其颐神葆真之士依灵佑而获度世者逮今无虚岁也嗟夫万事万理一方寸尔志所笃向即丹邱玄圃十洲三岛且不远矣济川之於道也专且勤故履危涉险而无倦心道远费侈而无靳色卒能使江左僊真之祀延逮乡邦使一方寡闻之民翕加礼敬茅峯烟霞歟其在目岂吾徒儒迂不化者能及是邪是宜记

初三真封号已穹厥今运启圣明弥加崇信於是妙道冲虚圣佑增真应至道冲靖德佑增妙应微妙冲慧仁佑增神应云宜并记延佑四年岁在丁巳十有一月吉日记

一斋记

丰有水村翁者浸老且惫矣犹沈痼书癖不自疗为达人所笑曰尔躬之弗恤而学之是务乎犹石田也有孙曰深弱冠嗜学颇类翁屏处斗室中案书整严研墨精洁癖好亦类翁辨色而兴深更而寐忘寒暑饥渴诵读达於卧内或时妨老人睡翁亦自笑一日语深曰我之沈痼不疗者竟传染至汝邪虽然妨睡事小志学事大吾不以此易彼也吾平生辱交名卿显人魁儒望士济济满朝野当吾齿壮气雄狎玩短景岂识世境之有海田人命之为露电直谓清时常春白日常午也而大化销熔一体归尽曾几何年有不存若敖之祀者有不反湘累之魂者有不归先轸之元而不掩张进之骸者朱门县薄故墟鞠草宗强胄贵苟贱资身令人感念兴替哽塞摧伤已不胜怀旧之悲况使望爽鸠氏之居经田成子之国雍门之叹梁父之吟川原莽苍蛩螿惨戚将有俛仰千载至於流涕者矣今吾陋巷幽栖诗书十世虽疎钟斜月残梦悠扬而昼窗萧闲夜鐙青荧犹获与汝谈经析理抚慨荒凉宁非祖孙之所甚幸又何爱片言不以成汝志也深汝来前今汝少也而志於学似矣抑未省此志壮老如一否凡志贵一一故有成吾惧汝之未达此也故扁汝读书之室曰一斋汝其日对之日思之尝试求其义其知一乎曰未也吾与汝谈一一未易窥而亦未易测也尔充其用即浩乎其无津廓乎其无涯肫肫乎其纯浑浑乎其真天地之所以清且宁以是尧舜禹之传心汤之协德文之纯孔之贯以是不惟是也下至於技若秋之奕牙之琴郢人之斤由基纪昌之射与夫锤王顔柳之书僧繇熙筌道子辈之画凡盖代而絶伦擅名而致利亦以是也深勉乎哉夫并敌乃能杀将多岐必至亡羊宇宙以来人物何限孰非有志者有志孰无成者顾或不溃於成即其志有不一尔盖一则无暴寒而功力完一则无杂悖而精神聚寸念之烈盖天盖地将何事之不可成二焉三焉始銳者或终懦乐此者复羨彼中道废晚节变杂念纷飞而幸其有成也愚已深勉乎哉昔者汝祖尝志学如汝矣惟其志有不一也故知道义之足贵有时而重事功知博记玩丧之为非有时而溺语言文字知此心尝在腔子里之为妙有时如游骑之四出知圣门学术之为正涂有时而纵谈僊佛知建学之为足尚有时而心慕江西知科举利禄之不足道有时而欣羨乎荣名若此皆不一之病也驯至於老而无得焉有由矣深勉乎哉谓予不信质诸周子有问周子曰圣可学乎曰可问何以学曰要在一鸣呼微矣因书之以记既擿笔覩案间陆子书有曰我这里刀锯鼎镬底学问斯语也吾伟之并书以坚汝志延佑己未孟秋水村翁记

水云村藁卷三

卷四

<集部,别集类,金至元,水云村藁>

钦定四库全书

水云村藁卷四

元 刘埙 撰

传

赵抚州传

宋抚州使君姓赵氏讳戊岳字次山濮安懿王九世孙也建炎南渡由汴徙南丰父崇嶠嘉定进士官大宗正丞忠谠文华搢绅左次有白云谏藁行于时使君蚤慧善属文年甫十七奏名礼部擢淳佑甲辰第授袁州万载县主簿需次服父母丧居闲十数年博通经史声实鬯茂邓大监垫为广西经略安抚辟宾州司法调福建提刑司检法官会儉人陈仁玉为其长使君耻不赴官景定初诸道争辟历江西转运司建宁府节制司福建安抚司皆干官以举者改秩知零都大庾两县着能声江西安抚使曾侍郎渊子才之辟主管机宜文字安抚归朝荐于上得提辖行在文思院通判临安府咸淳十年也贾似道窃柄误国长江失守朝廷急择江浙守臣擢使君知抚州措置守御德佑元年春至郡政绩着闻诏加干办行在诸军审计司又迁太府寺主簿以重其任时江西湖南已罹蹂践流溃迸溢警报日夜急剽寇纵横使君诛赏愜当抚人德之江西制置使黄万石弃隆兴退驻抚名勤王实为遁降计颇嫉使君修守备数媒孽于朝使君不自安累丐罢九月除大理寺主簿既解郡竟归里十二月建昌失守遂奔赣州明年二月江西提刑杨玠以赣降使君迁避宁都县五月朔景炎帝即位福州密诏吴直院浚为江西制置招讨使使君为参议官兼江西运判协谋兴复六月吴即广昌使君即宁都各建治所宣诏反正纠合吁赣诸邑义勇八月制司兵次南丰遇敌而溃使君遣其属以兵攻赣距城六十里与北兵战破之俘其千户乘胜逐北至城下城中兵大出我师失利引退丧失良多九月制司奔汀州十月使君捐重赏募峒丁廖陈六等进取而北来兵益衆使君亦入汀明年春知汀州黄去疾以城降使君解兵隐迹出畚中发疾卒就殡焉使君皇宗世宦而介然无纨袴习清苦问学勤於寒素词翰政绩卓伟可称既遭时艰志克复事不克就闻者悲之所学尤邃於易有易解十卷吟藁八卷

赞曰何代无才顾时相遇不偶耳彼有器能自表着誉流馨岂其缪巧致通显哉天与以时然也抚州之才际逢昌时宁不足以为治平之州牧敏博之词臣宋历永终黯翳沦谢至弗获正邱首力田不如逢年信夫後二十年其旧幕属赵孟滢始购募走汀畚归其遗骨葬里中嗣竟絶呜呼悲夫

词人吴用章传

吴用章名康南丰人生宋绍兴间敏博逸羣课举子业擅能名而试不利乃留情乐府以舒愤郁当是时去南渡未远汴都正音教坊遗曲犹流播江南用章博采精探悟彻音律单词短韵字徵协谐性爱梅为赋词自访梅至结实凡十有二阕自红梅至蜡梅凡六阕又取古人梅咏可命题者自南枝先暖至粉薄香残凡四十四阕总为六十有二乡寓公僊源赵学士师有为名之曰雪香絶唱且亟称其红梅之句曰试问海棠健否海棠虽似减清香又称其蜡梅之句曰凌空蠡翼逴香来惊破蜜房幽梦闻者以赵为知言乾道丁亥岁用章携以见刘季高侍郎岑侍郎负重名靳许可特为之序而称其意密词清上达古人用心未到处夷陵尉胡舜良梦赓文士也又序其词为有所感而发盖亦见用章浮沉困厄托之词咏往往借梅自况尔其赋此也年踰强仕矣不知又踰几年而终子孙无述焉悲哉用章殁词盛行于时不惟伶工歌妓以为首唱士大夫风流文雅者酒酣兴发辄歌之由是与姜尧章之暗香疎影李汉老之汉宫春刘行简之夜行船并喧竞丽者殆百十年至咸淳永嘉戏曲出泼少年化之而後淫哇盛正音歇然州里遗老犹歌用章词不置也其苦心盖无负矣用章善谗尝坐系得释或询以狱中风景用章恍然曰种种不便闻者絶倒因是里人祖以为俚语至今云词集久磨灭惟余手钞一本幸存

赞曰韵人胜士刻斲陶冶岂不冀千载之传曾几何年扫空澌泯宇宙间若此何限可为永慨也用章词笔居然罕俦苟不怜其才加褒藏焉谁复知南丰有词人哉用章同时同里有玉壶彭氏亦赋梅花百咏其半则自作其半则集句宝佑中陈文定公宗礼典中秘书下部使者移乡郡钞其诗藏秘府追记其自作有曰一谿烟月无人共吹落梨花晓梦初兴寄远矣里有刊本余尝蓄此寇毁失之故老凋零不惟无有存其诗者乃亦无有知其名者益可悲夫

义犬传

永嘉江心寺长老祖杰闽人也累任僧录挟资豪恣会僧选罢营求钜利得主席江心有知识陈某者家城中薄有资产州县利其富而懦数因户役困苦之积不堪与妻谋捐田入寺依杰势苟活请於杰杰欣诺遂弃里居徙家近寺而身任库院之职杰频造其庐窥其妻始犹间往不常久则輿至方丈或累日弥旬乃反妻每怒骂夫曰初为避官府谋庇身今反失身如此汝为人夫甘忍辱邪其夫固恨乃密谋远徙适获房宇於别岛屿屿濒海大聚落也地有巡检司又有一佛阁竟浮家宵遁近阁而居杰闻其逸大怒访知所在厚募恶少年十有四人饫以丰饌饵以重赏使往屠之曰截取妇人双乳来为证恶少年如命夜舟径造尽杀其家七口怀其双乳而还纷扰中俄冲晓恶少年怵窘疾趋舟鼓棹去独一人追逐弗及旁皇失措潜登佛阁隐壁间巡检闻变亟领卒掩捕茫无踪踪留连佛阁前里社役首进饭见事主家一犬跳噪左右不已叱去复来噪愈厉巡检举餐则又跳噪大跃至冲散其台盘酒食衆怒击犬复不去巡检起犬又隨後衔其衣襟引至佛阁仰而噪若欲言者巡检乃惊讶曰是岂有异乎领卒登阁周视则壁角微有衣露迫之见一夫怀刃立即禽下拶出双乳鞫问备言杰长老主谋因悉捕其党送县引问具伏上於府初府有同知与杰交暇日尝絶江访杰杰辞以出同知还至半途遇总管亦往访同知请无往总管曰我往彼必纳也邀同知偕往因复絶江同入寺杰果接待

置酒而还同知由此衔杰及事露同知即议移檄万户府遣兵围寺杰出迎曰吾既能作事岂不能当事官姑少寬我容入房收衣鉢行矣许之杰囊橐充斥既裒金宝钞货凡四擎授其徒令疾赴都求内援又取所蓄玉器满案置堂上语人曰此固吾所爱者事已至此复何用举杖一挥墮地尽碎既就逮至有司引伏械送总管犹欲全之故缓其事待京报未几果闻懿旨召杰同知令狱卒曰僧奸良人妇又谋杀七人可恕乎汝速处置明当赏汝卒入狱命杰醉饱起立县枷梢於梁囊沙置脑後其气遂死人皆快之既死而旨至无及矣同知以是得名省台交称焉延佑甲寅春予往延平延平总管韩君玉国宝之子邦彦从予学一日有所厚泉州教授林南谷来访韩南谷永嘉平阳人而总管前仕浙东与林旧是以来也予从坐间屡闻二公谈杰长老不已顾不知其端乃详叩二公具述如上且谓当日非此犬则失此贼七人衔冤无诉矣故传其事以愧世人之不如犬者

赞曰传为义犬作也然因是而思斯人避官府虐害而谋迁迁非其所而蹈祸乃至一家絕祀死刃下者七蔓延奸僧恶少死於官者十有五推祸原皆当时官吏驱之入死地也人孰不欲安土而乐生非困於虐政必不逃不逃则奸僧之谋必不启谋不启则羣衆必可不死哀哉天道无知则已诚有知者则彼官吏者伏冥诛祸後嗣决矣

水云村藁卷四

卷五

钦定四库全书

水云村藁卷五

元 刘埙 撰

序

陈文定公奏议序

故资政殿学士守签书枢密院事兼权参知政事致仕赠开府仪同三司諡文定陈公讳宗礼字立之初试淳佑殿庭时理皇在御二十年颇事酣宴公对策极言人主不当徇逸乐忘忧勤上嘉剴切擢真魁三厥後历学馆陞郎闾屡以忠鯁闻逮事度皇由宪府琐闥以至履班弹劾封驳风采凛凛晚登二府甫两月薨於位公之出处本末如此公自韦布即以名节自厉严介絶俗授徒自给外杜门萧然不轻以一武诣人盖冻饥自守如后山静重难合如了翁也进列贵仕则素履靡渝丹心弥壮其有德有言者欵予阅公谏藁尽卷率醇洁劲正严整条畅而原流经术通达国体莫不利害洞悉词理俱到有撻鳞逆耳之旨拊心疾呼之辞忠君爱国油然而其味者也尝闻先哲士大夫之言曰近世论谏惟公为冠予亦窃比之包孝肃刘元城辈人斯论殆不可易公之仕在淳佑甲辰至宝佑戊午间是时右相丁大全狂戾恣肆威炎薰灼世以风子目之无敢婴触然特推敬公召为尚书郎兼丞相掾意将引以自重公进朝乃首疏之其曰凤隐麟潜蛇蟠蚓结者指丁也且以四大愿请於上天顔开纳而丁盛怒喉台劾斥归田方大全威胁朝野百喙俱暗惟公奋不避祸白发其奸缙绅欢传以为朝阳之鸣盖自是直声着矣明年而浒黄渡武昌围诏窜大全贵州以死公遂登用识不识咸曰此当时正人也而责春秋之备者且曰公素尚风节层关铁壁晚轻一出白璧微瑕抑不思大贤为国出处以道咸淳中贾似道久柄国国势岌岌矣仇视端直寄命儉回校风丁无大异常独憚公方严居然礼敬公多远引高卧每以不能致公自歉一旦闻公翻然治任语两浙部使者赵德茂以公出故喜动顔面其钦重若此也天假公年共政而久处摩厉规正之似道必为公动则救败局回危机将宗社生灵实嘉赖焉不然公平生清约高简浮云利禄闲居埽地焚香而坐顾以七十日居政府为足以浼公过矣过矣公所着诗文甚富今某独裒其奏议若干卷将刊以行世知所先也俾予序之昔李序韩苏序欧皆其门人予公门下士也故述其大略焉欲观公者是集见之公家南丰之千绥学者尊称曰千峯先生云

朱陆合辙序

有宋乾道淳熙间金世宗仁厚不用兵复修旧好故大定二十九年东南赖以休息国家闲暇文事事兴儒先森聚理学炳明衿佩云从接关洛而通洙泗则东莱吕成公兴於浙南轩张宣公起於湘建安朱子金谿陆子则角立杰出号大宗师者也朱陆之学本领实同门户小异故

陆学主於超卓直指本心而晦翁以近禪为疑朱学主於着书由下学以造上达而象山翁又以支离少之门分户别伐异党同末流乃至交排互诋譁竞如仇敌遂令千古圣学之意滋郁弗彰矣当是时克堂包公崛起盱江出入二宗师门下其子枢密宏斋先生亲侍讲贯每谓二家宗旨券契龠合流俗自相矛盾至哉言乎顾踵袭成俗趋附贬驳或者高朱而抑陆私心迷繆寢失和平同里云卧吴先生汝一病之考朱子书凡言论旨趣与陆子同者为一编题曰筦天销磨党偏掀抉瞽瞍学者各宗其说门户虽小异本领无不同也夫人惟一心心惟一理羣圣相授继天立极开物成务何莫由斯孔子曰性相近也孟子曰先圣後圣若合符节岂至於学能独异乎追怀景定辛酉岁亲炙云卧先生得闻梗槩咸淳丙寅岁宏翁以尚书造朝约予与诸老往辞先生进予坐侧警海娓娓亦及兹事抉去藩篱少正卑滯当时驰心科举文字之间弗克叩击及今科举文字念絕思见鸿硕考德问业诸老亦既弃浊世而游太虚先哲弗作晚节无闻为之惆悵自悼不聰乃取象翁文集手钞焉且复取晦翁语录摘其推尊文安者着於篇端以诏来世会而通之水中之月即天上之月也蜀日越雪何为者故更名其集曰朱陆合辙云

禁題絕句序

有律诗而後有絕句絕句至宋而後尚禁体其法以不露题字为工以能融题意为妙盖举子业之余习也世之以文会友者或用此以验才思工拙谓之义试诗其为说曰体物精切者诗家一艺也於是搢幽抉秘穷极锻链其天巧所到精工敏妙有令人赏好不倦者真文人乐事也坎旧时编萃至多乱离之後颇多散逸乃日随所有遴其佳者时课一题以训吾儿由是精思儻能触类而长则通一毕万宁不愈於饱食终日无所用心者邪夫束字二十有八而景色彰表律吕協和局於模拟而能超疲於締构而能灵殆亦难矣虽然是特儿童小技而非诗之极致也賡歌昉於舜廷至三百篇以来跨汉魏历晋唐以迄於宋以诗名家者亡慮千百其正派单传上接风雅下逮汉唐宋惟涪翁集厥大成冠冕千古而渊深广博自成一家呜呼至是而後可言诗之极致矣善乎刘玉渊之言曰渊明诗之佛太白诗之僊少陵僊佛备山谷可僊可佛而俨然以六经礼乐临之盖论诗之极致矣学诗不以杜黄为宗岂所谓识其大者且惧吾儿溺於末俗之浅陋以为极致也故因槩举大者使进焉甲申夏五序

新编七言律诗序

七言近体肇基盛唐应虞韶协汉律不传之妙风韵掩映千古花萼夹城汉文有道病中送客秦地山河等篇意旨高骞音节適丽宋三百年理学接洙泗文章追秦汉视此若不屑为然桃李春风弓刀行色犹堪并轡分鑣近世诗宗数大家拔出风尘各擅体致皆自出机轴则工古有人工絕句有人而桂舟谿氏律体尤精咸谓唐律中兴焉故知此道在天地间未易能亦未尝絕夫律圣人制作之初测陰阳定清浊应高下和神人一累黍不中不曰律诗亦如之彼范围五十六字尔清丽或病格力之卑浮沈郁类困语言之钩棘亦一累黍不中不曰律故虽未尝絕亦未易能然熟读妙品自有悟入选古今律诗若干首置几案间日取讽咏之悦私我百年或有见优孟意是叔敖复生未可知也分前後卷前卷俱古人首以唐贤後卷俱今人首以桂舟氏吁蜀之日越之雪定乎未定也逮时久论定矣乃复有如杜刘许李真诗人者出而兴

恨不同时之言然惜不令封德彝辈见之耳丁亥暮春序【时公年四十八】

新编絕句序

诗至律难矣至絕句尤难矣至五言絕句又大难矣辞弥寡意弥深格弥严味弥远岂比夫大篇长歌可以浩荡纵横衍之而多者唐人翻空幻奇首变律絕独步一时广寒霓裳节拍余韵飘落人间犹挟青冥浩邈之响後世乃以社鼓渔榔欲追僊韵千古吟魂应为之窃笑矣诗至於唐光岳英灵之气为之汇聚发为风雅殆千年一瑞世为律为絕又为五言絕去唐愈远而光景如新欧苏黄陈诸大家不以不古废其篇什品诣殆未易言世俗士下此数百级乃或卑之昔人天然秀发得独自高仆学诗数十年心地汗马媿无一语髣髴唐见其愈简而愈难也选絕句若干首置几案间日取柴门静掩天风独清老鹤梳翎晴花迎露等篇一讽诵之楚冠南音翁倡儿和想千古吟魂亦复为之窃笑於地下闻诗声而问予何所得者则将应之曰一洲芦荻残风月自作深林不语僧丁亥季春序

青山文集序

陈君南翁归自庐陵之州庠示余文一帙题曰青山初藁盖吉士赵君仪可所着也赵君往以举文鸣於世虽心久知君独未识君於是阅其记文序跋数十篇往日所鯁戛未能言君乃尽言之欣然有会於予心天表云际想见其人虽未识也更深於识之矣手自钞竟南翁俾序谕之夫今世无所谓工於文章者然文章未始絕於今世视昔第甚少耳惟甚少故能工之也即如往日右文天宇开霁穷阎之子垂巷之士挟典册从师略解会率竞拈摘拾翦裁扬扬里间自谓能文信甚蕃也工者几何今是事校昔固寥絕矣间有工者往往霜摧雪剥鼎烹鑪鍛之余羈困穷愁槁顶枯须且坚忍清苦翛然神情自谓上帝所赋予者独厚盖所得甚艰且特甚贵异也诚不忍弃其灵明卓犖与一时琐琐相驰骛宁甘澹泊非人所堪絕无怨尤固守古道力争斯文於衰微而着先王之所以宗传照耀羣疑冰雪衆醉若人者天之景星卿云地之醴泉芝草老氏之飞僊释氏之昙华非坎故曰惟甚少故能工之也予读赵君之文甚工而鲜俚以此盖君所着体裁丰茂新意川赴抚事感怆时有千古之愤故其意绪潜藏旨趣沈郁予尝评其风味在近世絕似江古心先生真可志韩欧溯班马是语正未必可君意顾予能无厚望哉文也将坠地矣盟坛荒寒谁执牛耳宋文章之盛欧曾王苏四大家名天下独苏出眉山余三子皆吾江西人则文脉之系江西也重盛则必衰将奈何赵君与予俱家江西将能无感乎愿与南翁商之君名文字仪可尝试成均为天下所推重今退隐庐陵云己丑岁六月序【时公年五十】

雪崖吟藁序

今世虽合百千人与之友往往挟巧竞诈貌敬背憎其知心而相得者弗常有也诚有之又或风镫水泓意长日短睽离沦歿继之自予少壮取友四方老矣知心而相得者不乏天地为鑪销熔就尽仅存如雪崖易君与予定交久号知心相得年小於我逝乃先我使思心成结壹郁而谁语不悲伤得邪君家南城之竹田辛卯秋约予度谿赏桂因共载山行历访盱城耆旧冲

雾入云穿幽透深竟日如行画屏中是游也极欢将别则为盟曰幸俱萧闲岁一会聚若是绸缪也今年夏君归自洪复约予城北论文甫半月婴疾仅数日而卒悲夫交游缘也此会乃为此别乎君未病时授予近吟曰为我料简可存者作辛卯壬辰诗序未及序而君死虽死安忍忘之君将家景胄也磊落英发勇决迁善其於朋友诚以义合有所匡正辞意竭尽其论古今成败南北离合援引辨驳议论特出卓卓超人意至其诗则能抑而入理醇雅圆熟一不作怪宕豪险语蔼然风人趣味也其为文章充畅閎遂即汉魏气骨晋宋风度唐宋格法当奄有之以集大成惜哉不逮矣忆尝与君登峯远眺竹树晚凉星河夜横君索予说诗予为言杜黄音响又为言陶柳风味又为溯江沲汝瀆之旧生民瓜瓞之遗又为极论天地根原生人性情语未竟君叹曰旨哉敢不勉噫方将与君独立事外终其说践其言今已矣良友沦谢白髮茆然宁复有知心如斯人者良用凄怆云辛卯集料简共五十四首词一阙壬辰岁十五首其和平山翁盖絕笔也君讳仲信号雪崖仕宋为武节大夫【时公年五十三】

重题雪崖吟藁序

雪崖俾序时尝有言曰毋徒序吾诗序吾父子交情庶有考也今既序其诗於前矣忍不述吾乔梓交情之本末君骁卫大将军士英子也初将军以戎功入仕勲立江淮名动蜀广意气倾一时士无不愿登龙者及得见少傅又无不意满君固蚤有誉闻继其家声咸淳间予避地吁城一日於故人赵抚州坐上识将军将军顾予论时事一语契慳谓予有当世志良喜诘朝亟邀予共论滋喜特为知已不繇绍介予感将军意良深也将军之入城府也必访予或约予细语忼慨家国神会意合率夜分不能休特相亲重盖定交始此其後将军金陵之卒予哭焉葬於松原予又哭焉海枯尘扬冰雪断道俊杰之士多不复为时出予方韬閤掩抑常恐声影落人间不相闻问亦既久矣会庚寅春寇起汀畬支党漫溢遂震惊我丰今宰相龙川公来讨贼君以客从予岌岌危惧闷不自聊兵前遇君执手欢甚君入则陪帅出则诣吾庐围棋赋诗历历谈世事又谈世外事遂相与游石僊礼冷真踰月解兵乃散去其复密又始此君乔梓交情本末盖如此也呜呼已矣序成而君不复见矣自伐木停云之不歌而友道薄君独笃金兰之雅乃复止於此已矣又何言因志其意

金刚经解序

金刚经佛书骨髓也达摩西来始传中土训释凡数百家而浅者滞卑近不契经意深者鹜高虚适负经旨其有如普觉如纯阳诸大宗师卓卓超诣盖寡乃复有一种葛藤话屋下架屋牀上叠牀井底窥天牕外窥景使覽者惘然滋益障碍瞿昙氏梯航羣迷愿人人作佛意不孤邪吁不自通人孰祛其蔽吾州里有居士曰静庵刘君元璋以儒会释根器不凡隐处云蔼苍翠间澹寂妙悟直证本心尝曰西方圣人说法救世本自正大本自明白注家或以奇奥泥之多背真乘不见实相於是考核古今训释采其与佛意合者而削其不合者参以己意别为直解一日示予徵序予读焉句分字析刃游缕解持正见执中道浅不卑近深不高虚八牕玲珑见者开悟其出新意处虽间用举子言议而大纲领则与经意无异且复总以一语曰离相明心见本有性呜呼尽矣傥遂梓行广布三千大千界中远传百万亿劫後咸见本地风光超升正觉此功德应如经中所说传於身命七宝布施恒河沙界者可敬也已可敬也已予自幼知读

孔氏书未知学佛年且踰五日汨客尘往往詎六如为真实了不觉流浪之可哀君独精悟如此足敌生死予不惟自羞且自悼乃堪为君作序邪抑予闻别传宗旨贵在性命双圆则身外生身亲为佛子曰性君已得之显露经注曰命未必不得也能如是显露否二圭四真重关密意君如不秘我请面参岁在丁酉弥陀生日南丰水云村散人序【时公年五十八】

无名先生藏山诗藁序

先生无姓氏亦莫知何许人或曰世家徐避乱徙江南年孰乡之西里所居浅村中委巷菰芦面江背市得水云胜处花竹夹径萧闲无营劝之仕不应询其志则笑曰吾将俟时者闲为诗诗不求甚工亦不示人顾时时不辍手曰诗以吟咏性情非以求时人知也曩常所吟诗数十叶鐫寘山窠幽絕处藏焉曰陵谷变迁诗出乃当有知我者衆笑其迂尝得良金刀及汉之大刚卯佩之人莫测其旨又以土为器类锤然熏以火和以笛闲吹之则村中草树禽鸟皆摇曳飞舞曰是谓黄锺动而万物潜起者矣果自以其窍鸣倡和者莫不求之人亦终莫测後转徙无常居不定处仅仅故老相传如此国朝右文诏郡国购遗书适有野人耕山中得所函诗上之下博士校论编次篇目由是其诗始大行於世然以莫得其人之姓氏爵里故题曰无名先生藏山诗藁云

赠黄道人序

樵郡黄道人以地理术名自吁造吾门予奇之为瀹茗谈龙穴大旨未竟一丹士自外至再瀹茗细语移晷颇及烧炼点化事丹士不应予卒然问风水事有之乎丹士曰山中若有王侯地何不归家葬祖宗道人凝然又问点化事有之乎丹士曰道人若有烧金术何不烧金养自身於是道人奋然大言曰噫误矣未论风水点化事安得言无予曰何如道人曰我十有七岁即知此今四十有七矣顷侍舅氏出入贾平章门下目击方士造作曰句庚曰点茆曰浇淋曰樛制贾公面试无不成予窃学亦无不成顾利有多寡术有真伪耳安得言无予曰多寡之数真伪之辨可得闻乎道人曰句庚利博点茆次之浇淋本三而利一或不及一樛制勿复道此多寡之数也真术不传邂逅至人得之者深秘而自养间有宿缘契遇即传而不售售即非真也神化秘诀造化妙用岂若百工技艺可轻传市区货物可求售邪是殆江湖骗局耳请言情状彼有平日知其人之好奇也则先结一同志者游谈诱致佯若效忠名曰布水及诱之而中也则先试其术之半以取信然後徼其重赂卜日传授曰我元传亦若是也名曰整本则又倾银以为母厚贐以市药炉炭器具酒馔缣帛日费不可胜计及其效则或有首而无尾或屡作而辄败日引月长产荡家破矣可怜哉予近寓吁城日见十数辈羣来如狂竞谈烧炼亦有知吾之能此而乞传者饮以酒饵以财予窃鄙笑是何言之易也而吁之人有乍学未精相承繆种急於取偿及用整本布水之策焉张机设阱人不少若是者天刑人祸所不贷甚可惧也我则异於是虽能此不传也苟得人可传邪以心传不以利传也此真伪之辨也予起拜曰道人语真实不愧天不误人可敬已请序其言以表道人之德道人又曰世间常业自足致财顾命何如耳毋拘烧炼劳且费又多败阙命苟应富商贾贸易利更广也呜呼斯言尤真实矣故并序之彼有以鑪火诱利而人者闻之宜愧死也已宜愧死也已

水云村稟卷五

卷六

钦定四库全书

水云村藁卷六

元 刘埙 撰

赞铭

前朝遗像赞

元气妙运有时醞停天地将泰圣神乃生五季靡溃天厌腥秽龙翔汴洛始识真帝马营红光
陈桥黄袍不杀之誓昭彻盖高踰三百年传十六圣日角凤姿采眉隆準际天其仁何罪至斯
遗民哀哀无穷之思陵阙久荒图绘是贵稽首威顔如在其世

自赞【咸淳年中 时公年三十余】

眸不炯炯貌不堂堂勲业未建鬓毛已苍其卓乎有立以胸中粗识大道理其未能免俗以笔
下间为小文章斯人也使展其霖雨之手固当忠君父而泽民物而着之水云之村亦能咏风
月而歌沧浪虽然此犹其小者也若其方寸之耿耿终不以死生而存亡

又

谓为似邪吾固无可谓不似邪亦无不可要忽而癡浮云景过更後三数十年我亦不知其为
我

故人真赞【吴浚也字允文】

名张都督之名字虞舍人之讳裁缝云雾之文采照映日月之忠义语时艰则流涕沾襟愤仇
敌则怒目裂眦空券兴师誓雪国耻运去祚移功不酬志君子以为有补於世教小人议其无
救於时事使东南镇戍皆然则宗社亦何至此呜呼斯人晚节已矣其初心终足以媿天下之
乱臣贼子

谿隐图赞

青林蔽屋白云满谿高隐者谁勿过桥西

巴山龙赞

鳞族之宗宜宅海宫胡为乎巴峰扬鬣奋爪霆奔云从撼动坤轴作霖兆丰孰能貌其真昔惟所翁此画与同人亦曰所翁之龙

四禽赞【田巵】

似慵非慵跷足谿东勿叹无鱼有时会逢

二【鸛鹄】

藏头入羽莫作人语若学鸛?被人笼取

三【雪姑】

汝名雪姑谁为汝夫确守贞白休入画图

四【翡翠】

何怨於人以翎累身怀璧者谁见之伤神

哑子观音赞

篮鱼休卖瓔珞休带若以色见误人罪大且离相明心观自在

渡海罗汉赞

平步海水漫不会底我识得汝是个影子

又

足踏海浪不沈不荡逞大神通弄小伎俩和尚和尚画形聊可娱人成佛直须离相

扫心图赞【有引】

少读水心文集有扫心图一诗莫谕其旨後於一贵家见小轴绘一人青巾黄衣手提扫帚而有百十心字环绕其身繇是始悟水心公所题殆为此邪回首四五十年矣为追赞之

杂念纷飞与粪壤等随扫随有弗淨弗莹何以止之无思而定云散天空放却帚柄

观我赞

我既是我观者是谁骑牛寻牛笑倒牧儿

观心赞

心观万物又谁观心牀上疊牀向何处寻

朱光禄阴德图赞【有引】

记儿时行郭西门外有木合抱蔽翳江濱片版书朱光禄阴德树六字数见之未省也长而闻诸老先生道光禄公捐金救人事粗知其槩又长而閱图志观阴德记始得其详不知何年岸崩木拔每经行辄追思嗟惜不置非惜是树惜树之所以名而名不传也天昌善庆乃令闻孙秀出绍绪貌而图之展开眼明如见当日何其慰人意邪予因是图以垂世戒揭以赞曰

赋命自天天德好生体天活人福报川增为善在我我岂希报形动影随自然天造谓吾廷汝视光禄公公活人命心与天通公心伊何为善弗贰忍贫倾赀救死於縊彼富或靳吾贫安行阴功孰知太虚神明森其阶兰执珪鸣玉种勤获丰冥报何速彩侍官游真行地僊上寿之褒大哉王言施及云来铮铮楚楚貌入丹青宛其若睹善积庆长岁二百余忍人薄夫愧此画图

河西宪使寿容赞

眉宇如神襟度如春激清闽海庆会风云岂非应上元甲子之会而辅皇极太平之君者乎一幅丹青千载麒麟真宰相器大福德人

指书心经赞【有引】

古厓饶生能用指头蘸墨写心经而不用笔求赞语

经以心名盖由心出字以指书亦心所役心不好书指何所为汝识心否在运指时体认要真勿作字看波罗密多此已得半

聋哑翁赞【为盱江童耆卿作】

弗听而已遽曰聋弗语而已遽曰哑神明内充寓言外假避世知几随波上下嗟夫使其挹後元贞观之风囿庆历元佑之化未必不倾耳以聆咸韶哆口而谈王霸退然木鸡是曰智者虽然犹未免夫有迹也并聋哑之名而空之始造夫淨僂僂而赤洒洒

寿昌院钟铭【有引 时公年五十六】

元贞元年夏四月南丰州壽昌院新铸大钟县诸层楼将以节昏昕警迷聵也为之铭曰

惟大觉尊矜哀羣蒙何以牖之爰有洪钟考击以时耳闻心通迺眷寿昌范此新镛层构鉅钮法音随风为彼闻者破其昏聩缘声而觉万境悉空衆生成佛繫钟之功

州狱钟铭【有引 时公年六十八】

大德十有一年岁在丁未暮春之月南丰郡铸洪钟以严奉州狱士师之神所以昭神功答阴贶也为之铭曰

赫赫士师万世神灵作福於丰尤大彰明阴驱猾囚民冤底平何以报之有钟在庭朝昏考击闻者皆兴丕显神功永扬厥声

陈氏琴铭【琴名吹万】

灵音自然妙在无弦一已多何万言

益斋铭【有引】

古洪熊文卿取鲁论三益之义以名其斋嘉禾刘埙参以大易益卦之象而为之铭将以广文卿之志也夫直谅多闻益之自外者也迁善改过益之自内者也内外相养缺一不可文卿勉乎哉交阡互畅笃志力行其益无疆矣然予则媿之因斯铭也且以自警焉

人有五伦友与其一以友辅仁允资尔益益有卦象维风及雷以谕进德勇决勿回斋以益名文卿雅志我广其说宜该仁义尔求尔友直谅多闻匡救夹持日陶以薰尔迁尔善飚驰霆迅与天同功日新以进内外交养其益洋洋真积力久有大辉光顾我未能常觉日损赋此铭诗因警老钝

小朱砚铭【有引 时公年七十四】

宋宝佑癸丑岁予年甫十有四获一小砚於同舍友谭伯玉砚鄱陶也修广三指许盖以渍朱胶而备点校者复有一盖以掩尘亦陶也与予相从一周甲子矣晨窗夕鐙考经史作文章未尝不吾俱也欣喜忧悲酬接宴息未尝不吾俱也迺至遭罹革命避锋镝窜林藪亦未尝不吾俱也其盖尝堕地毁为二遄补完之今更毁为三不堪补又强补之书曰器非求旧固也其不忍与瓦砾槌者以其从吾久耳夫物无情人安得而无情一或无情焉充是心以往即窃位苟禄者一旦临难而君可弃也父母困老病子弟倦奉养而亲可弃也亲迎成礼偕老相期及其色衰而爱弛则妻可弃也嗟夫一砚微矣三纲寓焉人安可无耐久情乎既完之复铭之

砚以受丹其细三指盖以掩尘伤哉屡毁毁使复全用终吾年久要忍忘寄吾情焉旁观谓予成败勿顾子且朽矣情牵徒苦高天厚地犹有坏时任运自然舟行岸移

傅生墨铭【有引】

昔盱江士大夫评墨竞推傅云心制作精实色黦而光莹云既归岫墨难复得乃不知秘传胶法已付其宗人某矣顷予仕闽是子囊所制求售好事竞市谓胜云心予时欲为作铭弗果也村居小暇辄予之铭

谁琢元玉繄云心翁翁去子来杵制弥工贡蓬莱宫定有赏识挥洒玉牋一点如漆

水云村藁卷六

卷七

<集部,别集类,金至元,水云村藁>

钦定四库全书

水云村藁卷七

元 刘埙 撰

题跋

家藏太宗御书赐卢多逊

太宗皇帝御书敦朴为天下先六字遒劲醞藉虽工书者莫及且立国之初便以敦朴为务盖知所先後矣宗社命脉由此出彼卢多逊何足以知之

度皇御批

令旨付藏一所有陈世崇诗文藁都好可再简几首来在来日定要千万千万

四月五日辰初批付陈藏一 御押

恭惟度宗皇帝圣学缉熙垂衣而治为咸淳太平天子者十年此其在东宫时令旨也盛年潜跃无园囿狗马博塞之娱独汲汲斯文岂汉唐末世昏主所及盖列圣相承以古文为家法然尔宸毫飞动?墙如见万世其永宝之惜也不遇园绮羽翼乃下访藏一父子之卑陋不遇伊吕周召为辅乃仰成於亡国之似道呜呼悲夫跋安子文丙杨子渊巨源诛吴曦矫诏

诏曰敕门下惟干戈省厥躬朕既昧圣贤之戒虽犬马识其主尔乃甘仇敌之臣邦有常刑罪在弗赦太尉昭信军节度使利州西路安抚使兴州驻劄御前诸军都统制四川宣抚使兼陕西河东路招抚使吴曦早冯世禄久缀朝班以其为三朝忠孝之家必无反侧故授以四川宣招之柄俾?设施乃阴结於敌人遂窃窥於神器将土成功而吝赏搢绅献议而弗从委弃四州焚烧积聚迫胁多士列置官僚僭名号以自居裂衣冠而不耻既挟干戈而背君父且盗疆土以予寇讐静言思之孰可忍也彼敢效敬瑄刘豫之作朕宁无絛侯曲逆之臣自奏报之忽来即寝食之俱废痛心疾首拊髀噬脐不图家贼之难防遂使萧墙之遗患尚赖祖宗德泽之未泯与夫军民心志之未离况今江南诸军已着平淮之勲业眷兹坤维列郡宁无思汉之讴吟想皆左袒以为刘咸思举笏而击泚随军转运安丙可特权四川宣抚使陕西河东路招抚使招集义士诛戮叛臣有能仗义以奋呼即与旌忠而显擢王封节钺次第褒嘉库藏金帛尽皆锡予於戏赵奢之有赵括犹止杀身霍光之有霍云岂期灭族慨叹勲庸之後尚存涵爱之仁

吴曦一门凡附於逆党者并皆诛戮其余胁从置之不问除已命帅分兵西讨外故兹密诏想宜知悉

右安丙杨巨源诛逆曦矫诏也建绍中兴二吴有大功於蜀蜀赖以存者百余年曦以世将坠厥勲名是时朝廷无事边隅解兵遽闻警报俱失措巨源益昌人以右选为忠州管下合江之仓官密与丙谋举义此诏盖彭子申所草【或曰白某】竟用合江仓印诛翦逆俦再造四蜀庙堂方议西讨而捷书至矣朝野动色夸颂隽功丙由是擅勲名极富贵以终其身此举实自巨源发之乃遄为谗疾所杀然区区一仓官能作如许事信奇特哉细读此诏至今凛凛有生气

题李翰林像

锦袍玉色神游八极真崑阆蓬瀛中人落月照梁诚非虚语醉眼一视殊有傲睨万物态似是金銮洒墨命力士脱靴时貌也

跋顏平原帖

鲁公笔法妙千古戏作草楷俱自成妍今观此帖凛有生意岂忠义梗梗散入翰墨故与天地相长久邪其怒笔处令人毛髮俱竦想见呵叱李希烈临死不屈时气象

题干禄字书

晋以前字书醇朴至右军首出新意尽变古体如神龙骏马超妙入神故千载而下以王书为第一历六朝而为隋唐书学日靡穠纖竞胜鲁公出而救之尽本古意一变至道如纯金美玉见者贵尚故千载而下又以顏书配王书俱为第一书家谓数百年之间质文相救惟此二贤而已然鲁公之屋漏?即右军之锥画沙同出一法各极其工是故欲学王请自顏入

跋石洲诗卷

余尝从耕桑陇上见耄穉追随熙熙然鼓腹以游又尝经丛市别村遇元宵鐙火鼓吹歌舞每恨真趣佳景无能摸写今閱石洲诗卷风味何甚似也富哉诗乎石洲不自李杜更求赠言余生几年犹未知学诗也何言抑尝闻之师曰诗不易作亦不可苟作且当使胸中有数百卷书韵度不俗乃可下笔子归试取六经子史精读之又取诸传记百家杂说博读之又取骚选陶韦柳与李杜盛唐诸作国朝黄陈诸作熟读之山谷先生所谓用一事如军中之令置一字如关门之键涵泳变化优孟似叔敖矣子若然吾言士别三日更当刮目否则请谢曰卿自用卿法云【景定甲子 时公年二十五】

九皋苍山诗选後

九皋苍山两诗翁生同时学同志吟同调者也皋之诗少於山而工过之其清峻不尘大略相似而风骨劲峭兴味沈郁则龙翁铁笛似胜湘灵鼓瑟知音试其评何如

跋阮子良孤岚集

流水村中秋风落木无聊赖时读阮君孤岚絕句如初月出云新篁解箨明润不尘可与言诗已矣由是而之焉铁四灵軋半山并唐人无难也余尤爱其集中句如中秋云今年看月依前好一片清光总属谁闻莺云清吟不改平生调似笑南人学北音呜呼是又未易与俗言可为痛哭流涕者此也甲申仲秋跋【时公年四十五】

题古心文後

古心先生江文忠公文章名节重前朝淳佑中弹击风生号真御史今读其文想其人正自凛然故吏部侍郎矩斋曾公尝语予昔丞都昌日公新擢第授池阳教授归里识之轩然魁硕气盖一时尝广坐剧饮大醉吐卧茵席上已而醒醒复引满纵谈也曾公称子远豪士豪士噫是固伟然者而今已矣予幼独酷好公时文每见一篇熟玩不释梦寐犹记今见公古文尤喜手钞焉要之万世不朽者不在是乙亥番?公谊不辱自投池以死远近忠之盖近年进士为宰相能守节作全人者二人焉浩然清流而不污者公也毅然朔庭而不屈者文山公也安得聯二公之文而题之曰宋朝大忠集丙戌八月十有八日谨题【时公年四十七】

书南居陈君丁亥集後

天地为鑪金石并流时南居诗伯以丁亥集示展读觉清风徐来恍然坐我水僊府也风雅宗旨古今世变君皆探蹟造微妙入樞域故为古为律愈多愈工独尝以用兵观诗淮阴汉大将以背水一战传公瑾江东豪杰以赤壁一捷传谢安石风流宰相以淮淝一胜传传者不以多也中其肯綮以是收名定价有余若项羽之百战百胜陈庆之之四十七战皆捷?其所就视前二三子何如衆皆美君之诗多而工仆独愿见君之诗工而少也世有识者当曰雍之言然

题曾厚可咏春集

摆脱江湖窠臼接续大历元和气脉前十数篇无可拟议近後间有涉俗境者恐当删去使少而精乃善昔云舍桂舟论诗时仆尝得周旋其间当日二公若见此编亦当与君分席

雪笠诗跋

雪笠翁曾元伯诗精丽妥帖各当其体而乐府尤工琢句如长吉熔意如飞卿殆駸駸逼籍建校今同社夫谁与敌辄为料简令儿辈钞焉而元伯方徵予评其诗予曰古体乎唐律乎抑乐府乎古也律也予虽不武犹能出偏师陈平原为鱼丽鹅鹳之势与君相当否则短兵接战未知鹿死谁手乐府也予有深沟高垒偃旗仆鼓而已君当上马掀髯摇手曰不战而屈人兵矣

因相与一笑而还其帙

南居五志跋

日予观南居四志美其诗工且多别财半年又观五志则弥工弥多弥可美予自别君埃氛翳结清趣枯落强吟不上十数篇甚矣吾衰也抑君航南浦帆螺川皋比鹭洲水竹间江云送迎山霏映罩宜诗思如百川之赴海若予者乃且龟缩蓬茨下日惟见咫尺天与熟面谿山草树顾吟思何许得来因念史记一部在天下名山大川非诞妄也韩将军多多益办彼不过能将十万者非特美尔且将媿之卷锦以还敬志岁月己丑五晦【时公年五十】

李梅谿燕台吟跋【潭州人】

梅谿诗秀句层出不染尘土更竖风骨使沈着痛快味深以长则骚坛百级人人左次让先登矣然其人极高谊怜才居然有湖海襟度虽微诗犹将使人爱重之不已况吟笔如许哉今客燕云弥使人远想竟日

月厓吟月橐跋

月厓范君去非被服宝璐云行太虚俊颖胜特宛若晋宋间人宏斋包公尝称其精神如鸾鹤风韵如飞僊与予为文字友十余年死别且二十余年思其人味其诗古体肖古唐体逼唐清丽圆活言言冰雪今世以诗鸣者喧啾聒耳何曾有似吾故人者噫茫茫九原爱莫起之岁在癸巳孟陬月归自鍾陵杜门谢客因閱吟月橐书之犹想玉立翛然如在其左右【时公年五十四】

跋朱梅边西湖欸乃集

日落云昏西窗翦烛玩梅边欸乃集正似出涌金门行湖光山色间柔风媚日画船细柳开元事分明在眼展转三复情致流丽句律妥熟奕奕有富贵气非三家村中夫子语盖治世之音如此视唐人挑野菜摘山柴气味万万独惜未见夔州以後作也噫此士落江湖熟思令人瘦

琴泉诗橐跋

扁舟载愁寒水四碧予昼卧白云堆中正恨无可人共语临川邓德光以琴泉集来意特快甚客谓德光洒落人也喜接四方豪俊?尾三尺云根一泓日陶写得天趣宜其诗和平无暴气清醇无险语悦更振纓濯尘入悟境夺活机世间好语尽当奄有少陵曰读书破万卷下笔如有神天风雁翎新句频寄

画梅跋

寒梢冻蕊居然夺真华光补之复生不能敌也一客从外来徵予判断予曰形神俱妙只欠香耳客笑曰此语虽痴此画妙矣

象山语类题辞

象山先生陆文安公语录一册遗训二册门弟子各为编次语多复出幼几为仿晦翁语类分门钞纂然後复出者乃尽见而删之始稍可观顷三肃而叹曰先生真天人也单辞片语洗凡破陋其英悟超卓足与孟配顾其学不如朱学之盛行者盖先生不壽文公则高年先生简易不着书文公则多述作先生门人不大显朱门则多达官羽翼其教是以若不逮而?其实则天高日精千古独步文公有言江南未有人如陆子静八字着脚诚哉是言今世道更时好泯公论且定矣陆氏之学将大明於世彼蕤头书册寻行数墨尚袭故说以诋先哲则蚍蜉撼树井蛙观天者尔呜呼悲夫

题曾留远作陈遂初墓志後

管幼安避汉末之乱渡海居辽东三十七年乃归归而隐於田庐不受魏命年八十四而歿史称之遂初陈公亦避乱安南竟客死不得归哀哉公为太常寺主簿时轮对一疏讥切当国贾似道恶之弃官去当时已称重名节曾公虽与之俱避地然大节殊不及殆似老韩同传

题赵大年小景

此大年赵氏所作小景也秋芦鴈集雪柳鹊栖虽缣素故暗野意依然天家公子多才艺可爱哉玩斯画怀斯人想斯时为之凄然废卷

刘春谷行橐跋

读春谷文贍蔚中奇崛错出如陈列平原鱼丽偃月部勒严整乃时出奇兵张两翼绕出匈奴後读春谷诗新意凑集而气脉端正上接风雅如钧天广乐故是僊家节拍至八音谐处真可令凤仪而兽舞予幸三年宫槐泮藻间日常快读读竟予辄谢曰退三舍服矣其行也索予评予就徵所未见君出行橐使读且笑曰卖菜乎求多也予曰不然旌节吾自有之直要长安本色因复一笑而书之大德壬寅菊节跋【时公年六十三】

题杨妃齿痛图

昭阳殿里一齿痛马嵬坡下一身痛渔阳鼙鼓天下痛昔人以此评太真齿痛予爱其语俊拈出共赏良工善丹青者能并後二痛总作一图垂鑒万世即此图不朽

题懒绣图

昼长院静孤倚绣牀放下金鍼支颐似病此画手堪入妙品抑予尝宝一图曰伏女授书孟母断机又一图曰木兰代戍凝妻断臂今亡矣未知校此孰胜也客谓予毋多言且为此图赋诗手托香腮倚绣牀一庭绿荫映红牕停鍼脉脉知何意欲刺鸾凰怕见双

屯田员外郎刘公敕黄後跋

中书门下牒

乡贡进士刘嘏

牒奉

敕宜赐同学?出身牒至准

敕故牒

景佑五年三月 日牒

工部侍郎参知政事李右谏议大夫参知政事王尚书左丞参知政事程户部侍郎平章事张门下侍郎兼兵部尚书平章事张

七世族祖屯田员外郎廿四府君嘏江楼居士八府君次子也景佑五年三月仁皇御殿亲试举人赐吕溱等及第出身公在其中宋制士人登科即授敕牒以厚黄纸书之名曰敕黄然後赴部铨注给诰授官自是脱韦布而列簪绅矣昭陵以乾兴元年壬戌岁二月即位明年改元天圣至是年戊寅距登极甫十有六年宋极治时也公於是时擢科入仕荣庆可知范蜀公镇是岁为礼部第一人殿廷赐第在七十九名实第二甲尤为一榜之重是月也王陈二相【随尧佐】罢政押敕者首相张邓公【士逊】章郇公【得象】也三参政不可考程疑诤琳是年十一月庚戌帝郊见天地改元宝元而元昊僭号西事蝟兴自此为康定为庆历皇佑为至和嘉佑虽韩范杜富进用而扰扰多故不得如景佑太平时矣中渠宗人十一兄世藏此牒踰二百年虽敝弗失此家宝也出以示坝辄加补完而归之追想盛时宛转凄断大德癸卯孟春谨跋【时公年六十四】

宣德郎致仕刘公转通直郎诰跋

宣德郎致仕刘况

右可特授通直郎致仕

敕朝散大夫致仕李书等天以八宝颺朕使增重社稷宗庙而为神民主故恭受於正月之吉

又推天貺以敷錫百工迺自九品以上进秩一等虽仕而告老者亦与焉惟率德厉行俾里人有所矜式以助朕风化则予汝嘉尚其懋哉可依前件

大观二年十月四日

中书令阙

中书侍郎臣林摠宣奉

中书舍人臣俞?行

奉

敕如右牒到奉行

大观二年十月五日

侍中阙

太师兼门下侍郎京

门下侍郎【执中】

给事中密

十月六日戌时都事康继隆受

尚书令阙

尚书左仆射京

尚书右仆射阙

尚书左丞深

尚书右丞阙

告通直郎致仕刘况奉

敕如右符到奉行

左司郎中亮

大观二年十月七日下午

屯田公四子长曰六府君溉不仕次曰八府君湜皇佑五年癸巳岁三月郑獬榜进士仕为南劍州都曹又次曰二十府君洵终儒林郎新建县主簿幼曰廿一府君况通直公也元佑六年马涓榜授颍州文学八年为宁德县簿尉崇宁中为泰宁县主簿久之诰授宁德县令以宣德郎致仕大观二年徽皇恭受八宝敷恩四海转通直郎致仕此其诰也中渠宗人七一兄於通直公为七世孙藏其家宝洊历世变不失殊可喜诰绫高阔八寸长近七尺白色小花纹精莹如新字画印色亦犹焕然背以皮纸护以褐绫有脱落处为粘缀而归之通直公父子兄弟聯翩禄仕可想当时门户之盛昔尝拜其遗像朱衣象简凜凜如生葬于中渠堂封犹突兀盖昔所谓南庄者也因并志之大德癸卯孟春谨跋以示我宗盟之後来者

又跋

宋制中书造命门下审驳尚书奉行故中书省有舍人主书黄行告词苟命有不当即不书谓之缴黄舍人书行矣然後过门下省有给事中主读黄苟命有不当虽已书亦缴驳谓之留黄盖以维持纪纲杜絶僥滥也故今诰中有三节初曰造命则书名皆中书省官次日过中则书名皆门下省官又次日告行则书名皆尚书省官至是乃为成命其付出者左司郎中郎尚书省属官犹古之丞相掾也其时又有三省同奉圣旨之法此则命出即行无复论驳意谓三省官同在榻前事有难行一时议定矣因閱此诰并记旧家典故如此宣德郎後改宣教郎盖论者谓汴都有宣德门臣子宜避故易之

题友人诗橐

凡作诗天分穎脱加以笃学无不超然与古人并君资质既不凡又自六经以来至诸子百家昼研覃夜钞纂融?通畅宜下笔有神如此若仆则老且病卷旗囊弓久矣君盛年壮志其亟进师筑三受降城使凡学者投戈面缚仆虽惫犹思洗濯團华旧袍提偏师从大将旗鼓後君如许我即贾余勇期折馘摩垒否则三揖而退曰朔方老将风流在不取河西石堡城

送法帖与曾原青就跋

法帖五帙颇古雅或曰绛也景定中龙兴通守云洞赵公时奚以献矩斋侍郎曾公赵盖虚斋端明以夫之子精字学有古风卷中朱字其亲笔也侍郎公知予嗜古帖转以见畀藏之四十年今以授其侄孙原青得所归矣君家所有更赠君其永宝之连城璧勿换也

跋平远棹橐

寒云愁惨中掩关拥鑪闻剥啄亟倒屣一客下马气吐如虹乃吾宗平远翁以樗櫟示快展疾读如玉壶冰露不受纖尘如千峰峭立云光霞采绚烂五色最妙处摆脱窠臼自作标致江西诗国不为兄筑将坛乎前辈有识诗人於库务中者今亦宁无顾郁郁不愜飘然弃去自此诗当大进深入理窟异日寄示续橐仆应反走兄应一笑曰季咸已被壶邱压倒矣大德甲辰仲冬聊记岁月且当云萍【时公年六十有五】

题盗马图

右盗马图盗者七人马十有五匹追者四人人骑马一匹人马态度俱精妙有意惜不着何人笔尔沙场渺莽千蹄踉跄何可迹此媮儿善夺而去若素所控驭无一逸者奇已然不知追袭踵至又不知描画诒羞至今也其絜之摔之迫而坠之情状皇窘正似可怜而亦无足念者世有乘骏拥驹魁岸贵倨而有为亦若是眡此卷将无同安得名笔出新意作神品曰媮儿在此

再题【代】

黄云白草间追风瞥电之状居然飞动心目其袭逐搏执处意态更活岂画师前生尝在其队伍中故神会天得落笔迫真邪虽然昔有劝人勿习画马者谓恐堕驴胎马腹中去况盗乃三戒之首可留情乎若见斯人当唤醒曰急须改艺休误他生

南丰朱氏家谱跋

南丰故多文献家曾朱为盛曾自沂密至文定公叔季下逮金谿一派贵胄蝉联如昔韩吕朱亦笔橐□节赫奕明世虽视曾差劣其在於今朱氏云来犹习诗书别利善如近世道山翁耆艾典刑为里模楷其子德升更秀立杰出世其家声闾所着世家本末志在光昭足以动孝子慈孙之念名家望族流润遗芳有不在乎禄爵田宅而清风古气自有一种令人贵重者岂光禄公种德深长故贤子孙弥远弥不乏欵嗟夫光禄公以二十五百之钱而能易数代之富贵又能易代代之贤子孙朱文公云天人之际不隔毫厘诚哉是言记予少时行郭西门外见巨木一株蔽芾江浒好事者版书钉之曰朱光禄阴德树正其捐貲活命之地而海桑既易树久不存每过其所未尝不裴回想叹以寄无穷之思而仰朱氏之世德也因并志以补阙大德乙巳岁日南至【时公年六十有六】

跋王清观所画姚玉像并词【景定间公年仅廿余所赋花间僊集今亦不存】

王郎妙人貌丽质填新腔为姚华出色诸才子敲金戛玉从之天风何来醒我病目便如坐花前听檀板因忆景定间老照为吁城诸名伎写真成轴号花间僊集予时年少与秋潭月观月厓月林共赋焉今非用此故事乎观猎心情笔翩翩复欲下顾夕阳在山慨然而废未能免俗聊附氏名寄语王郎幸勿笑曰汝非西州皇甫规何为耻不入党大德丁未夏五【时公年六十八】

跋王清观题洞宾醉桃源像

邯鄲梦里武陵谿春色醉冥迷花压帽檐欹谩贏得紅塵滿衣
青蛇飛起黃龍喝住才是酒醒時和露飲刀圭待月滿長空鶴歸【太常引】

此詞斷冰積雪不翅如自回僊口中出王郎真妙筆也持此見解亦可學僊

題五忠侯禮文後

予里世事五忠侯甚謹然莫詳所始也相傳侯發靈於南安之五昌峰初有義兄弟五人剛正
雄勇俱以忠死死有靈邦人祠於古樟下稱曰樟槎五郎又或稱曰五殤南丰古未有廟宋庆
厯間邑宰周公燮家所嚴事為建廟於河東之張公岩時未受封泛稱曰五昌威烈侯靈响赫
奕常見虎迹淳熙乙酉秋旱邑宰陳公隆禮迎侯至公庭雨四日周浹為新其祠邑士彭紀為
文刻碑焉其後又分靈於西理坊之江濱嘉定中始賜廟額曰靈顯久之始頒五忠之封又久
之始加五昭之封開慶己未歲先舅揭公明叔客南安拜其祖廟錄封誥以歸然後知五侯俱
有姓名有姓周名安邦者有姓劉名安世者於今不記其全矣咸淳戊辰歲五月洪水決堤西
理之祠濱江漂蕩壬申癸酉間徙祠於安禪寺之右今祠是也歲以六月十九日為忠嘉侯生
辰咸修慶典而文詞缺州有禮佛會嘗邀五侯為監壇會友吳居士以予居密迩求予文莊嚴
予侵尋稀年才盡筆弱既不能發揚明神之威烈又懼無以副居士之盛心勉綴芻詞為一章
命吾兒麟瑞書以授居士佛會千載而不廢廟祀百世而永存斯文與之相長久矣又記丙子
年為侯作籤五十首以應士民之卜祝屢經世變籤不復存里人欲予修理而未能何里人汲
汲於此乎并載於此以寄一嘆大德丁未六月十有八日書於水村道院【時公年六十八】

跋戴松牛

戴牛品入神妙然世遠難得真此卷縑素故暗四牛二童几不可辨及凝視遠覽居然有趣似
春林煙霧冥蒙無限意度殆真蹟邪昧者病其深晦乃不知此畫天趣正在蒼茫杳靄中可以
神會難與俗言也謂予不信請質之九方皋大德丁未歲為傅君跋所藏卷末系以詩曰誰貌
春欄鰕觥閑饒糊難認色犁斑庖丁成佛田單老飽卧輕烟薄霧間【時公年六十八】

羅季文詩跋

北窗秋靜發故篋得蔡忠襄字書一幅明潤婉熟筆意可人正愛玩不忍置忽季文以吟藁示
亟讀盡卷亦明潤婉熟趣味甚似此日何日乃二美適相遭如此明日閱書評又見書家最重
屋漏痕鐵鉤鎖推為顏筋柳骨即君謨筆意未是止泊處噫此特學書法耳而以語為文則將
曰吾於解牛得養生焉

傅庭茂詩跋

庭茂诗和平醞藉云闲霭润虽未渍於成而已识雅人深致评者俱谓乃祖通守公六义正传流芳至此信哉忆咸淳间从矩斋武城侯夜宴於来薰亭听通守公与云舍赵抚州说诗槩以读书为本领其言深严微婉具有节度而於寻常容易者无取焉君家所有更赠君敢举此语庭茂宜猛进深造以钩其元会见摆脱窠臼超入悟境

侯诚翁清啸集跋

诚翁为人温柔敦厚有诗人资质为诗清丽激壮合诗家律度閱清啸集星輝雾霭醒人心眼而古体更有风味至若赋独孤琴台序甘克俊诗则造詣益深余子落下风矣诚翁吾同里也同庠也又世契也而见君集独晚乌得无媿抑予老气鼓不作愿为深林不语僧久矣君如不弃尚时起予不然请谢曰无人为视昭华管自卷秋芦片叶吹

跋道堂壁间诗

门前尽日走黄尘夜叩山房寄此身在太极先元有道除神僊外少闲人沙填方石千年梦水绕南台几度春纵得桑田谁解守海枯尘起更伤神

右至大戊申元夕後四日霁景清酣詣南山访友信步陟巘謁玉虚寮见壁题此诗风味可人因记而钞之不着姓氏友曰某人作也顾某人者村中一譚民乃吟笔如许故曰不以人废言

附录宿南台道院

门前满眼是黄尘夜叩山房寄此身在太极先元有道除神僊外少闲人沙填方石千年?水到南台几度春纵得金丹真不死海枯尘起更伤神

记十年前闲步到南台僊宅见壁间新题一首不着姓名兴致高远句律清雅恨不知为何人所作又不见其他作春赏翫桃园邂逅危诚可出示吟卷首篇即前所题始知出翁老笔余爱慕已十年矣捧读尽卷余北面欲和翁首篇而笔秃墨残诚难对垒因一笑效欧公语曰且教退之独步云

官文翁所作性命论跋

性命双圆之妙大明一录披剥见髓莱山官兄静彻妙悟融二教而为之评圭堂复生一笑首肯然二圭四真重关密意从何下手盍为我言之今世妙龄俊秀无不蒙头塞耳钻入污泥中寻死窟子独超然自拔求脱桎械所谓百花鬧处松千尺羣鸟声中凤一鸣抑细玩评论似伤浮虚刊削就实乃善近见王月田一诗谈性命简实可爱他日当录寄为一助

跋吴贯道所藏邓月巢与吴云卧书

月巢云卧二先生俱昔江西诗伯也月巢冲澹闲雅云卧简洁清修而诗各如其人焉予生晚犹幸获亲二吟翁而月巢獎爱之尤深夕阳在山风吹海立安得复见乡邦有如斯人者贯道示予此幅怀旧凄然犹想风流老泪一洒

跋吴云卧与包文肃公荐士书

云卧翁清高简澹翛然如蓬闾间人学问精深为包门高第弟子文肃公特敬异之此书真淳笃实见前辈风范而拳拳荐士意尤足厉俗矣计此书当是宝佑戊午春公以秘阁修撰为江西转运副使兼守隆兴其夏以事归里云

徐孝子诗卷跋

建安徐氏子和幼有至性尝刲股愈二亲疾以是得孝子名时贤为诗文美之是诚可美也而或疑於圣门毁伤之戒矣予曰事安可执一律论邪孝经所谓毁伤意其为鬪狠危父母者言非必为忘身救亲者言也亲疾委顿命县丝髮医弗痊祷弗应为子者惊忧震栗旁皇窘束不获已而出此庶几伏一念之诚延一旦之命而遑恤其他天地鬼神犹为之感格回生起死如鼓应枹谁忍复以毁伤议之其得孝子名固宜或又曰为是事者天知地知鬼神知然不必求人知

杨则阳覆瓿集跋

则阳杨君临汝名士也里居与吾盱壤接犹台雁然予故知君未识君识君乃在劔谿上相看俱老色矣恨见晚也出所着覆瓿集示予予快覩疾读其文如广长舌谈微妙法横说竖说奔霆卷海而理趣特深其诗如老将持重之师营垒部伍各按节度而时出奇兵邀截取胜执此以往纍藉圭璧荐之清庙宜矣顾曰覆瓿窃所未喻拟起吾家歆於九原而诒之延佑甲寅中秋【时公年七十五】

黄蘗屋?玉楼记跋

记玉楼事唐人寓言尔黄君为文以补阙寓之寓也辞清意远真若登丹霄而与之遇良工心独苦哉然反覆玩閱辞有賸处更刊落熔链峻洁峭紧即神聚气完又尽善也赞以诗曰白玉楼成记不传至今人惜锦囊仙美君独步萧台境携取琼章下九天

文丞相家传跋

旧钞文丞相纪年一帙正与此同今蘗屋此编比旧加详岂当时相从兵闲目其事不忍遗从而附益之邪丞相至公血诚贯金石而耀日月居然与张许二顔分席追数仗节死义之年倏閱三十有三矣昔人有云中原之於晋日远日忘思之令人陨涕恃死不朽赖存此编其广传之使忠臣义士流芳千古非民彝世教一助乎噫可哀也已延佑甲寅三月晦题【时公年七

十五】

跋曹忠达公守汴奇策

宋靖康中金再入寇既渡河御史中丞曹公辅奏谓去岁敌寨城外西北地势卑下不知决水灌之最失策今宜分城中兵数万出据东南劄连珠寨以接外援候敌营西北引水以灌必获利钦宗以为然宰相唐恪曰水可决兵留为根本不可出公曰兵留城中用兵之死法尔恪坚持不出兵反先决水灌西北而东南乃无兵竟被敌据遂絶外援以致亡国悲夫曹公之策奇策也奸臣误国颠倒妄施可胜诛哉公字载德南劔沙县人龟山杨文靖公时志墓书此事足以发千古之愤志又书汴失守後敌再邀上出郊议未决宰相何?奏事出云车驾翼日出郊公遽云敌意不可测此行恐与前日不同?厉声诟公公又率冯澥同说盖谓澥乃?同乡且齿长冀幸一听?不从及驾幸敌营帝果北狩然则二相庙谟若是弃君卖国俱奸臣也後百世忠义士犹宜奋笔诛之时公签书枢密院事尔讎能夺宰相之议或谓此时驾欲不出亦不可得盖事势溃决至此已无可为者其失在不用公之初议出兵据东南引水灌西北此为误国之大者延佑乙卯九月晦日书其家传後以寄三叹【时公年七十六】

梅湖道人墨梅跋

自和靖香影句传天下遂令梅增万世重乃知西湖寒碧是此华成名处今老僊濡毫吮墨为此花写真而以梅湖自号盖是本色展卷一览粲粲万玉神采逼真只形色缁素别尔客复微予下一转语予无语只朗吟曰近来黑白无分晓墨作梅花卖得行

题范蠡泛湖图

老范霸越沼吴功存宗社盖一代智士也世论率谓有大勲劳宜享大富贵顾乃虑及乌喙翩其鸿冥不旋踵弃钟鼎等敝屣何大早计邪噫以功名自见易以功名自终难古今功臣弗令终正坐挟勲吝权不思勇退儗此老亦然即黄金之铸将易为属镂之赐焉得智易曰知几其神乎蠡也得之老子曰功成名遂身退蠡又得之展卷快靚神采如生故为之赋诗曰霸越功成早见几春风一舸泛鸱夷丹青半幅人千载胜似黄金铸就时

赵宗丞奏稟跋

大宗正丞白云先生赵公崇嶠忠鯁如汉更生词华如唐太白幼尝挹其光霁蓬瀛崑阆中人品也记宝佑乙卯岁犬马齿甫十有六时朝野推公奏牍切直愿见弗获厥後临汝侯高安公从容出示屡见之今云居翁卓犖济美重加缙袞又悉取陞对封事钞纂弗遗复使愚得见而垂白已望八矣慨乡哲之益远幸遗稟之仅存直气棱棱重我哽咽不觉形之咏歌且语翁曰此君家隋珠和璧也非君不能存此惟君之曾元能永宝此後或有编前代直臣传者将采诸此其诗曰六十年前梦渺茫宗臣谏稟墨犹香夕阳影落肠空断门掩东风看海棠

曾从道诗跋

年时閱曾君思道诗爱其珠明玉锵心目为快今又閱金昆从道诗觉元丰稔更胜曲阜集何曾氏羣从多材艺也荆华萎蕤重我吟社细读五古佳处造詣似韦七古佳处部勒似韩杜律虽小劣句亦多佳虽则云然予更有肘後为君助混合陶韦柳三家以昌其五古孰复少陵诸大篇以昌其七古则又取法少陵五律以昌其五律取牧锡浑沧诸作以昌其七律如登华岳不止於中峰寺解包驻锡必登絶顶望见沧海日出处不亦善夫属有远役无暇剧谈他日归来畀我新句

题渊明漉酒图

若复不快饮空负头上巾達论也然亦何至用巾漉酒不避污垢漬葳邪韵人胜士托此寓高致乃认为真即痴人听说梦耳微茫杳霭中露顶运臂急酒之状宛然一展卷知是名笔动人醉兴舌本流津

济川吟稟跋

吾州谿氏多诗人有南牕澹稟有桂舟遗稟今又有济川欵乃集盛哉南牕兴致雅澹不尚雕镂桂舟功力精深妙入梱域济川兼二体而时出之且徧游南北名山洞府与僊官贵神默会紫霞翠雾中故新吟更挟清气唐宋诗人山出碁置率一鸣即已今独谿三世有集岂非盛哉予生晚不逮识南牕老诗伯幸识桂舟翁其与予讲评毛郑诗必上溯江沱汝坟下逮匪风下泉探索深音神情倾豁今老矣诗已束阁读济川集洒然曰周礼尽在鲁矣

题陆生贵山吟稟

贵山性情集韵度清而句律妥熔鍊所到无欠无余予客闽久罕见善吟若此问何人曰尤谿陆某也问何在曰年甫二十有五歿已三载矣悲夫不及半面也灵葩异卉不耐风日此李长吉邢惇夫輩所以令人悲愤慨惜者乎生儿难儿能诗尤难诗工而壽永又大难吾意怜才览卷欲泪延佑丙辰孟秋陈子正出此集因志数语聊慰九原魂如有知当日幸逢身後知音更胜生前识面【时公年七十七】

蜀江图跋

右颍川德英父所藏蜀江图也广仅半尺修踰四丈西起威州东迄江陵跨十有八郡其间山川城垒人物聚落僊宫梵宇风飄浪舶历历在眼真奇笔也忆少日閱輿地志极爱西州风景形势雅欲溯巫峡阨劒关周视古英雄争战处略慰胸中之奇顾蹉跎浸老付来生矣展玩伤怀因寄一叹并赋之谁挈坤维入画图东西川合汇荆湖金汤夹岸提封接玉帛连檣贡赋输劒阁几烦豪杰梦锦城曾是帝王都如今混一兵氛息闻道烟花渐似吴

读曾丹潭梦吉家谱【名申本里人徼职】

余家宅西里与先哲曾南丰先生子固南轩相距数武自江楼居士以来与诸曾世讲有婚媾之好焉一日梦吉元吉昆季步余水云深处叙寒暄道今故已出世谱视余曰此我祖文昭子开先生元丰所手编而从祖文肃所参订者也追惟遭罹衰乱分崩荡析园庐荒废旧业萧条独是编出入必俱岿然灵光某等绍承无状藉此少逭不孝之罪公其为我序而存之俾我子孙世有考焉予三薰沐读之则见编辑犁然整比有纪至存献一录悉当代名公钜卿之作披对不觉起敬顾谓曾君曰斯谱之存人事乎天道邪夫以有宋仁厚之泽垂三百年大经细目绸缪曲尽非有浚削也一旦风飏惨动半壁谁撑岂无文武大吏张韩岳陆之俦效命贾勇九死不回乃竟弗能留祥兴之社之不屋何也岂非皇穹易向人力无如何哉公家哲祖父既谨緘眷固局鐻力岂尽軼诸君子上而用能保全永世者天赞之矣余居同里閤知公家世以忠孝长厚相传绳绳勿替间尝一再展文昭祠下精爽昭回与谿光相映发祖德孙谋真可为百世祚天之默相曾氏岂有量也既书其尾并录展墓诗遗之

水云村藁卷七

卷八

<集部,别集类,金至元,水云村藁>

钦定四库全书

水云村藁卷八

元 刘埙 撰

墓表志铭

始祖工曹刘公墓表

南丰刘氏之始祖曰工曹郎中讳希逊世仕南唐曾祖濠州刺史讳金祖清淮节度使赠太师諡忠肃讳仁瞻考怀州刺史讳崇赞怀州而上未有葬南丰者葬南丰者自工曹始故南丰刘氏祖工曹以为始也工曹歿垂四百年迹远且湮历官行事不复存存者一坏之土可哀也已按家谱书工曹葬九陂耆牛头坑地形若蛇蛤然国师陈孟阳实卜之坐离向子癸书之记其墓也又按旧史大师南唐廉镇寿春周世宗拥重师来攻大师抗节死守与城存亡世宗哀其死而忠之追爵彭城郡王诏改清淮为忠正军以旌厉於万世而唐主亦赠公太师封越王赐諡忠肃故今子孙称忠肃世家示不忘也呜呼五代远矣数百年间位将相列方面英杰材武靖軋頔颀一再传或数传即荡泯渐断吾宗幸不陨坠汔于今荐更乱离文献犹相仍为臣死忠天实昌之不然其曷克如是之久亦曷克使诗书一脉常緜緜也噫其盛哉工曹子二长曙次昭昇州通判孙三人长元亨次元常次江楼府君讳元载是为三位三大位析二十一派二十一派存者五而出于江楼位者四焉至今存也大宋宝佑中埙等常侍诸叔拜工曹墓下思有表之後三十年为至元丙戌岁三月又拜焉念昔甫冠今望五矣岁月几何人事难齐惧浸老无所复能为负追远志凄然执笔刻石墓上用昭来裔墓距城三里孔迤且便风日佳时一往展省曰吾始祖也世世子孙宜勿忘是日叔长镗前拜埙次之孙龙瑞麟瑞鸾瑞凤瑞又次之五月朔日九世孙埙表时公年四十七

昇州通判刘公墓表

埙既表始祖工曹之墓自是而下墓远且湮者将例表之以彰先德隆世本也於是表通判公之墓焉公於工曹公为季子於埙为八世祖讳昭仕至通判昇州歿葬南丰河东之驷马窠今为昌厚耆冷水坑夫人黄氏祔其左钜阜隆然丛萃蔚然至元丙戌岁清明节率诸幼剪荆棘访兆域突起坡陀中堂封不坏意山灵诃护之剗削平治罗拜酌奠荐楮饌野老环视骇叹曰墓古矣何後嗣长远乃若是也公德善政绩无所於考我後人蒙赖余庆数百年文献弗坠非积善不至此此固可考也呜呼盛哉曾祖讳仁瞻唐清淮节度使赠太师諡忠肃祖讳崇赞怀州刺史父讳希逊工曹也母邵氏葬郭北僊君岭子三人长元亨次元常次江楼府君讳元载

孙男四人长曰汝舟次曰用滋守秘书省著作郎次嘏登宝元元年进士第?州石城县尉赠屯田员外郎次汝霖曾孙二十有八人其可稽者十七长某次某次某次某次某次辅尧次某次某次某次某次灌次德纯次德?次仲轲次德輝次溉次湜儒林郎秘书省校书郎南劔州都曹次洵儒林郎洪州新建县主簿次况福州宁德县令终通直郎赐绯袋银鱼次德象次某次源次某次济次容次演汀州户曹次渭次潼重刻石寘塚前曰昇州通判刘公二府君夫人黄氏墓而别买石书此以表云世世万子孙毋忘八世孙塤表

本州教授曾月崖墓表

故南丰州儒学教授曾君歿期岁葬州西长者耆之神窠行有状墓有志矣老友刘塤哀其平生复为文以表诸墓曰自唐?进士科宋因之成俗凡齿章缝亲觚翰率以词章科目为儒者之极功而它不皇务其得之也於人家国正亦未知其何如而偶失之即愁苦怨抑如不欲生如学佛而不臻疾证如修僊而不遂冲举甚至垂絶犹耿耿凄断为终古之恨若吾故人曾君者诚可哀也君名友龙字云叔家南丰之市山曾故望族也七世祖曰偕裕而好施施久寢贫贫犹施弗厌厚德耆龄里称曰长者及见其子发决科为名进士孙樽亦踵决科善积庆縣而君出焉当盛年时颀而皙仪矩颀昂犹班行中人也器识开扩不为拘儒局士而所笃尚专精赋律践世科颀固沈酣犹嗜饴蜜咸淳初特荐书试礼部銳取一中不利益奋发期再进则世俄易而科且废矣科废犹琅琅诵哦舌本流津曰吾志也间遇尝擢第成名者辄倾倒礼敬曰吾羨也君素重厚至临事处变则定且果方南北兵交篲啸震野有司藉君声望进乡社既被命即严保伍束丁壮有白昼攫医囊者廉得实送官尸诸市凶狡破胆一方以宁至元丁亥行省命教授本州学?佩得师者五年剡上将改调厌烦径隐其小试止此大德甲辰岁年六十有九一日怅然曰吾试礼部时吾与某人俱吾赋与某人正同然某人得之吾竟失此一领緑衫吾遗恨也吾闻之流涕盖距科废已三十年距属纊几日耳愤闷未平犹若此吾故曰可哀也繇唐虞迄洙泗圣贤迭兴其垂世立教良有在人之所以为人士之所以树立不朽疑不专在科目得失间彼电火槿萼何与千载顾流俗驱靡之致令吾徒坐此郁勃至于老且死犹悲愤憔悴不自解盖世之通患而亦未有若君甚切者滋可哀也公歿是年七月之十日葬以次年八月之九日其世次与其它可书者志已具不重述述其所重者着之以慰吾知己於九泉而申之词曰

苦思长哦胡不高科归来乎神窠遗恨不磨天乎奈何

宋太史刘公墓志铭

予宗兄太史公方石先生既葬十有五年其子镇访予盼城南寓舍出尚斋刘君所为行实惨怆而言曰先人之冢木拱矣顾未有铭铭先人者不在当世达显人而在深知先人之文者抑知之於生者趣附焉耳特浅之为知今先人歿且久昔知之者希趋附之情见矣叔也乃且网罗先集片幅靡遗深嗜笃尚犹韩与柳是真知也已铭非叔而谁予力量不敢当顾其情悲其言当而予真深知公之文者矣故铭弗让公刘氏揆名信翁字方石其别号世为南丰人幼英敏嗜学读书深根极能赋有风骨丹霞张先生自明居吁江从朱陆明性理尤精先天之学鸿

文大夫名为学者师一见奇公纳为壻尽倾所学以授公公繇是尽闻过江与老儒言论宗旨文章大法语出心契警发融畅当是时项平庵安世柯东海梦得方孚若信孺陈鲁叟曾景建极诸公俱东南奇人而公游从其间充其识度以昌其文遂大有名於世既荐於乡而累不利於春官乃退而深求圣经贤传诸史百家益肆力於古学其进如川其文如渊当路争致礼聘公气岸峭劲自持若冰雪与人交必惟道义不徇时俗好尚诸公贵人以是加严惮晚用累恩授迪功郎监建康府粮料院宝佑初有诏修中兴四朝信史於时元老大儒木石先生尤公焞以端明殿学士提纲史館得自辟属一时鸿笔名流咸豫笔削公特起远外入館为校勘初南丰自曾文定公典元丰史事越百七十余年而公继之里人以为公荣公不慊也公时年七十有四矣龐皓登畿肃然泽耀而刚直之气见乎顔面既挟老笔分修诸志传成同館英隽俱倾伏礼下之甚尤公以公高年言于台免朝参行香异礼也明年书成将奏御而公故有寒喘疾疾大作四月六日卒於位朝野知公者啧啧窓惜悲夫吾宗文章宿老所施奈何仅若是也子镇护其柩归卜抚州之金潭葬焉予於公为羣从尝一再相见时年甫冠固未知公之学之文也既壮则知之而公已逝然其後尽读公之文知公之心盖公之言曰儒者之学不专文字要在识本体济世用文章之妙司马子长不必论也近世惟韩曾风味不可及故公所着往往倡之呜呼公已矣吾宗三百年文章家不乏人然能如公者几人今也又特无人恨不逮从公考质也傥今而幸获从焉公当不予靳予亦有以受矣每读公冰玉集方石漫编慨然思吾兄之不可作则思瓣香卮酒以拜公墓而未能也故叙其生平而为之铭予知己云舍赵公次山见而矍然曰予昔侍先宗丞识此老敬此老亦以晚後未知湊泊故不及参此老今殊恨失此老也子为铭吾为子丹书可乎予谢不敢当赵公竟欲书之其世次则刻之碑陰铭曰

世贵者文而孰为祖惟韩惟曾与经作辅公本二人展也高古笔削汗青猗嗟迟暮悠悠金潭苍苍宰树悲夫呜呼是为宝佑太史公之墓

先母揭氏孺人圻志

先母揭氏孺人世居南丰生於宋开禧乙丑岁六月十有五日終於至元甲申岁十一月十六日享年八十吾宗自宋初昇州通判生江楼府君以德义儒雅大其门子孙擢科列仕文献相承至我曾大父登绍兴第为道州宁远县丞没於王事以承事郎致仕大父与先君世济文学为三百年诗礼故家先母归于我先君先君没不孝孤甫五晬依外氏寡母孤儿凄凉万苦先母勤妇工致束修遣从师问学率自督课每孤灯青荧母纫缝儿讲习迄夜分或鷄鸣乃已尝曰汝家世名儒吾望汝毋失为儒也是时仁圣在御世运文明不孝孤既长获以斯文受知魁儒名卿硕师胜友常车盖盈门先母闻其讲义理评文章退辄喜其获齿士流免沦落由母教也常以严毅总家政以勤约理家务以肃洁奉家祭而於坟隲时省尤谨会权奸覆国三宫北迁先母流涕曰噫无望矣抚诸孙必谈旧事切切以徇时废书为戒素多疾常露祷觐临终无重苦八袞庆寿视听不衰是冬俄盛寒喘卧疾五六日历历嘱後事不少乱医进药似少瘳忽顾不孝孤曰觉颇怳惚亟扶坐进鬻复就枕而逝於乎痛哉男不孝孤塤孙龙瑞麟瑞治命卜兆於塘原耆恩口之汪山乙酉岁九月丙申葬焉先母令德寿考法应得铭顾鸿笔故人凋谢殆尽乃忍死纪实掩诸幽永惟养志有亏志圻奚益吾负吾母惭愧痛心昔也嫠孤茕茕相依为命世未有此悲也今也儿无母怜堂空景寂世未有此哀也呜呼痛哉哀乎已矣哀乎已矣

吾母不可见吾哀与天终矣呜呼山灵守护百世不堕陵谷或移有见此碑谁无母乎尚封崇之

自志

江之南有州曰丰丰之濒有民曰刘垞字起潜父家浅村水云间性宽静忍辱然浸成堕弛见事迟而课效疏所丧败常什九初不改其尤骇特者无位而思救时无责而喜论事无财而乐施予道不行守道不易学不用嗜学不厌衆迂之自亦迂之终不改早参名辈大老槩有闻故於书不务拘束章句惟圣贤深旨是求曰书以理身心达政治也穿凿破碎无益也用即治经博士身耳诗不求甚工亦不轻示人曰寄吾兴陶吾情奚用人知读易至革读诗至黍离匪风诸篇常凄怨不胜情曰孰知我哀自恨孝养不尽当生旦即晨拜祢庙香一炷泪数行曰哀哀劬劳忍举觞乎世易道隐羣弟子率改化奔放乃独倏然理残书训饬如素深夜寒鐙父子谈古今商义理槁乾苦澹非人所堪犹欣然曰陋巷读书对圣贤语未为非乐其迂盖如此生嘉熙庚子岁年六十有三矣诵陶诗自挽美其达成自志且成示二子曰生弗克显扬吾亲死毋葬先人墓下葬道旁当有识者曰是非痴人耶不易节媚世取富贵而止於是葬于是邪吾或有知聊志吾媿也自始祖工曹葬南丰一传昇州通判通判公六传曾大父讳铎登进士科官承事郎大父炎父严俱治经教授州里母揭氏昔太史慈临终叹曰大丈夫当佩七尺劒升天子之堂奈何而死乎悲哉斯言抑穷达命也死生理也安命顺理正也正而毙已矣而又何悲铭曰

生何来死何归百无成顽且痴岂无奇命制之有不死者後天巍巍

赵深道墓志铭

呜呼运祚迁革臣子不奋忠力回危机哉成败天也自襄失守江左东南日夜告急议者疑必亡忠臣讳言亡亡矣复图存仅存卒不免亡崎岖万险期有所建立眷命不佑川决水消使人沈愤郁郁抁手就尽至于无可奈何而後为不得已之举盖志士所不忍言而千载所共哀也初德佑乙亥冬毗陵以不屈屠苏湖风靡明年孟春行都震文丞相使北营谋讲解兵羈留不反而辅臣吴谢刘贾辈献玺输国矣丞相至京口用义士刘汧策得逸去走西淮涉东浙遵海趋闽从景炎时则有抚州幕属赵公深道亦由赣趋闽从丞相丞相异之留佐都督府江淮劲勇多恋旧亦趋闽入广公部军且募义丁为助示以赏罚激以忠义间出偏师复故地屡捷於是岭南云合霆震撼动江西东公美髭髯敌称赵胡子名喧一时惊谓异人也已而精健日集南下萃全力攻一隅丞相掩袭北去公收散卒鼓行转鬪将进卫厓山行朝逮己卯春厓山倾覆公羈岚雾中四顾傍徨曰孤臣畴依乎然犹强自立至庚辰岁则至元之十七年矣度无可支柱始提其精兵万衆内附皆恸哭投戈闻者为公悲怆呜呼公逝矣日远日忘谁知之予老且死不书谁书之故今特为公表之公讳孟灏深道其字宋秀安僖王六世孙也建炎自汴徙南丰曾祖师拱承忠郎祖希赵朝奉郎考与则广州通判公以经学登咸淳乙丑科进士为江州湖口县主簿兴国军司理德佑初元计院赵公必昱守抚州辟为节制司干官罢归里急警报奔赣未几南趋督府凡三年累擢要职主兵事最後请换武授澧州观察使龙神卫都指挥

使左金吾卫上将军兼江西提刑都督谏议官改福建江西招捕使陞闽广制置使久之兵解北覲赐宴赐袍授通议大夫礼部尚书徽州路总管兼府尹不赴再入覲授杭州路总管再授桂阳路总管罢归里大德乙巳岁九月二十有一日疾终於正寝享年六十有四娶曾氏子男二由崧由楷女一浣奴陈公谅其婿也明年四月丙辰葬染原耆天心坪之先莹又明年求予铭予夙厚公义应铭公之始任州县也以勤敏受荐举晚而为郡也洁廉自律秉清於吏拉朽于奸譁荐者表公风宪予谓是皆常事毋容详予所详者为其初心有足辅民彝扶世教也公起儒绅闲将略精扞頼出意气轩轩於文閤肆劲伟援经据史於事明銳勇果中机合变於财也素轻其抚将士周宾友率倾倒不计乏絶至宴享必丰耻作寒俭态也由是从之者皆意满少善格鬪击刺尤精弯孤又能跣践榛莽如履坦故于兵间艰阻荐经恬不为病性习则然而亦诚异哉其赞抚幕予适诣赵抚州署予掌书记与公共官舍会制置使驻抚予日游闽郡间目公调娱帅守绥辑诸将饬城守理戎器绰绰有策昼夜即与予閱军书论缓急兴亡为之相视以悲尝曰脱有不幸予当拥衆保险少延庙祀耳予悲其言暨归自粤谈景炎祥兴事尤悲或时相顾堕泪也噫非烈丈夫奇男子也乎而九原不可作矣深文者犹曰诛杀多滥曰操执不完悲夫书曰责人斯无难诚使诸君易地而处之能为公所为乎吾有以知其不能也不能为公所为而訾其所未易为诚何心也今夫提孤军起坠绪既非素拊循且迸裂溃决时苟弗戢即自焚矣谓诚滥耶嬰疾委顿中得无魏其侯之守田蚡者乎何其神宇属纆不乱而歔若嚶嚶有弗间也至评公出处则箕子商之胄也臣于周范质周之贤也相乎宋圣人固列箕于三仁而考亭先贤亦跻质于名臣之録何也孟子曰男女不亲授受礼也援溺权也亦天也吾如天何姑舍是而论公尤有大难者厥初一郡幕下僚耳正何与军国事直忠愤坚劲汔至鼎移祚终既三四年厥後不当小恕邪事既久而论未定何由得释公初入见钦承宣谕有曰而非看家狗乎主人歿矣犹守着一片田地不去乎稽首三复令人陨涕盖千载犹有余哀也吁流俗不见知明主独知之请以是间执议者之口铭曰

才英且奇而时不逢志閤以銳而施不洪家国阻江丹心有冲南服膺扬敌慑髯翁期晚西颓复于旦中哀哀彼苍运数易终傍皇畴依惟时之踪於赫明训独识孤忠湘南再麾绥良戢凶曷不驾牡曷不乘骢曷不迭鹄超然太空生也奇男没也鬼雄其升於天灿然长虹老友作铭直笔生风

建宁推官邓公墓志铭

邓君元实讳德秀世居南丰生而早慧未冠俊声着矣性坦率不务炫饰而谈词英发精神流动閱书双眸历落数行俱下为文飞翰翩翩靡待构思其明义理推治乱皆穎出深诣由是两取乡荐登咸淳戊辰进士科初景定庚申辛酉间三山陈令君琥来莅邑令君成均名流邑之士望琴堂希一盼如渴令君鑒裁特精拔尤加礼敬焉时辈如汤斯立曾唯仲及君俱列上宾余最钝朴亦厕蹟末坐令君尝曰诸君异日皆?笏中人也已而斯立无成先歿唯仲亦徒四举礼部亦无成予更落莫独君取青尔初调澧州司户参军事宪使青阳公梦炎器能策略号西州奇杰於僚属靳许可察君廉敏独委任无貳案牘非经君閱不署也宪兼郡事檄君决常德狱狱有冤根连充斥君一閱得实纵舍殆尽澧阳尉逐捕弗获应黜君怜其初仕白宪使寬之止校尉吏人称长者制置使李公庭芝郡守赵公汝兰亦知君遂与宪使交荐於朝会考满留

君助而君以便养丐归调建宁府节度推官需次国事去矣悲夫君乃祖素厚我先君故予与君弥厚聚辨倾豁无尔汝也君齿长予才敏复胜予予每多君君乃不自足记癸酉岁予家盱城中君从湖外沿檄归省因过予曰近得君策一篇真可读且可法也其谦獎如此丙子兵交大势未一有仗名义图兴复者君与其谋军声震邻君语予曰一兴复即一糜烂奈何予不敢应居数日益震且逼君笼鐙夜叩吾门决策予曰兴复义也抑乌合非素练势必扰盍少避乎君曰然俱散避已乃果扰且溃败明年复见君相对欷歔而已又明年君避地□山俄疾终至元戊寅岁七月四日也年止四十有七官止从政郎君所厚如月厓曾教友龙正心彭倅履道清逸赵使君孟澱躬吊皆悲吒失声知君深者复称君孝事母母所爱诸女诸孙君能顺承加厚岁入惟母命弗私又称君勇为善邑吏吴宗忤令尹罪且死哀祈君救君为昭雪得不死馈谢拒不受人益贤之呜呼才难古今所叹如君温蓄何可多得哉傥不以时能不卓卓树立以自见鰲动鲸奔淹郁就尽彼妄庸人无赖子起鼠壤蚁垤间乘时昼昏梟鸣虎啸至于丰大輝赫埒封君而侔世卿何德致然耶东郭先生谓西门子曰汝之达非知得也北宫子之窮非愚失也皆天也非人也而盐车服骥章父荐屨贾傅亦尝悵愤於此君其奈何君葬九坡耆之杨梅踰三十年有孙继昭轩然振立一日袖君所着秀山小稿蘄予詮次将镌梓且丐铭予喜君之有後又念君之不可无述也遂铭之曾祖达祖玠父应祥母任氏娶张氏男显孙先卒继昭次男子也治命为显孙後铭曰

黄文节公有言王良秣驥子而问涂气已无万里矣未出门而车轴折可为陨涕吁嗟元实不幸类此岂曰无才岂曰无志时隕命制一第中废不朽有铭千载少慰

王氏夫人墓志

夫人王氏讳延童其先渤海人徙居京兆资德大夫浙东道宣慰使兼两淮都转运使阿里布其祖也武德将军琼州路安抚使图噜布哈其父也至元中宣武将军超尔守南丰安抚公来为判官僚谊素笃会宣武公纳禄其子绰哈忠翊继来领郡因请婚於安抚公故夫人归焉夫人生长世家而寬慈慧淑克尽妇道事长敬训子严治家有度恤下有恩组绣缝织无不精习至於服俭勤甘劳苦乐施予踰二十年不懈至大三年四月一日以疾逝年四十有一忠翊公哭之恸谓予曰已矣今而後无复为予助者矣顷予连岁留京师无暇理家事吾妻纲维户门增广贍产应接旅费无乏絕予处万里外无後顾之忧皆其力也今也已矣又谓予曰吾累世家宁海礼应归葬於先茔顾官守无敢离次也卜兆南丰州新源耆之僊君岭将以是月十有三日从权殡焉先生为我志之予闻夫人歿之日无问中外亲疏称其德怀其恩皆恸哭失声而忠翊公以失助尤悲予是以知夫人贤行为不易得也遂书之子男三人哈喇布哈彻尔布哈实喇布哈女三人秀儿玉儿钮钮惟玉儿许嫁栾某余在室孙一人玖珠是为志

聂母曾氏墓志铭

至大元年岁戊申三月某日里友聂自得母夫人曾氏歿明年五月乙酉祔其柩於先茔又明年自得袖圹志踵吾门泣请铭夫人儒家女也世居州西之峰岭其父江泉翁翔龙尝受经於乡达尊华谷先生严中书粲宋端平甲午岁举进士翁齐家有礼子若女俱循循服庭训里称

之夫人讳庆云适南停聂君某婉淑俭勤克相夫子尤笃义方训尝篝灯夜绩课儿书不怠其事尊抚卑睦内辑外惟儒家矩度是循里益称之大德甲辰岁以八袞该赐帛恩会生旦自得率卑属拜舞称觞嫺族闾党咸在赋咏成巨轴里又称焉曾几何年乃一旦无疾逝矣悲哉自王泽既息内则弗修贤淑贞顺往往罕闻於天下然尝閱汉晋以来诸列女传时有足为闺门法者未至防决川奔经沦纪蠹若近世之不可道也当是时独有号为儒家者犹或笃守古迂时以先王之教私淑家庭故儿女薰陶未与俗混至於妇道母仪有若斯母得非圣经有法戒在邪由是推之斯母可铭也乃翁亦可敬也已子男某某孙某铭曰

蹈父训贞以静寿且康全正命子光昭孙继盛世诗书勿替隕

陈仓使墓志铭

吾州里近岁称善人必曰陈月卿询月卿所以善必曰急义出天性不矫昆弟同堂二十年其赀产不私由役赋输率先奉令不懈族嫺交朋假贷或疾丧乏絕周恤不拒岁歉发廩辄杀其直不校乡隣忿争讼鬪常持平排解不激館师加礼踰倍不靳游士与凡挟术艺踵门各满意去不厌至自奉即缺然褚衾敝絮一榻不侈也噫如是而曰善斯可矣圣贤以善律人其纲条固不止此然度君所能至复何以加此愚夫鄙人吝一金至亡躯捐命其抔噬无厌足若饥虎者安得不媿此也月卿名评世居南丰之桥南能拔起洗濯大其家声复能观书识大义教子习文事尤喜与方士游郡尝选为丰储仓使以材称卒不愿仕年五十六以疾终至大二年十一月七日也明年七月丁酉其子奉柩葬集贤耆之黄家塘与厥配徐氏同塋而异坎既葬来求铭予闻古有马少游者以乡里善人着名汉史君善人也吾铭以补史铭曰

流光未頽而遽重昏歛其福报遗留嗣昆善人之坟以铭永存

孺人傅氏墓志铭

予妻傅氏建昌南城人宋都官某之孙云麓隐君某之女母罗氏宋咸淳丁卯岁归於我归附後大德癸卯岁十月七日終於正寢年六十有三至大辛亥岁闰七月己未葬于州北二都韩坊之蕨廉窠男三人龙瑞麟瑞鸾瑞而龙瑞先十五年歿孙男二人浑深而深为龙瑞後女一人德三娘尚幼其山龙自兑来坐未向丑与僊女峰对书此所以记其墓也其平生贞淑柔静不妄言语孝事姑敬待夫教子寬恤下慈廉取而乐予勇为善而好观书与夫缝紉绣组精巧过人烝尝馈祀丰洁靡惰是皆可书而未有名世如欧曾者请之书予不得不略书也悲夫铭曰

三十七年同我甘苦所愧为夫何辞铭墓

前将仕郎赵伯宣墓志铭

皇庆壬子岁秋八月予坐延平广文舍小暇览谿南诸峰有佳色动吟兴俄经生赵若洽趋而

跪惨怛而言曰吾先君不幸歿未克葬将以九月丙申葬不孝孤思欲阐幽潜示光昭然傍皇无可托也敢以托先生先生而念吾先君之隶讲下也赐以铭非私友情乎予哀其请为述焉君讳时播字伯宣宋广陵郡王裔孙也世居福州今为延平人曾祖公芾金紫光禄大夫祖彦挺武经大夫父澹夫泉州观察推官终宣教郎伯宣尝举进士咸淳癸酉岁试福建运司中其选明年援登极恩授将仕郎甫待铨值革命径归隐至大四年十有一月某日以疾终年七十有一娶林氏子男一若洽也女二孙二卜兆剑浦县之黄煎坑予所书止此若洽复来前曰吾先君平生宽慈而谦谨勇为善而乐闻过恤族嫻邻社而乡誉归之居间三纪典籍自怡退然庠序间恬不作荣进想而士论推之盖其子之述如此故并书焉惜夫公族之信厚而止乎是也初予署事甫两月而伯宣逝其文会也不数故知之也不详然伯宣尝对予语惴惴不妄发有以知其非口给取憎者气质近厚有以知其非暴戾险谲者谓之善人人将曰可畀以铭乌乎不可铭曰

黄煎之山幽幽黄煎之水悠悠有美若人归全斯邱铭不磨君奚忧

中大夫延平路宣相杏林公墓志铭

公讳伊尔图呼兰其先回鹘人徙燕今为燕人所居种杏成林因以自号父某尝总治鹰房事世祖皇帝以才辨被眷遇仕至工部尚书公幼随侍迺清光因谋进尚书晓之曰儿乏词辨虑仓卒奏对失次适自累耳乃以中书选为蒙古译史博通诸国字语既慎且勤为时相所信用会攻围襄阳缺马公被檄驰河朔括马不踰月得驃骏数千赴军大得济又驰山东督饷遄告办复得济时相称信爱久之积年劳宣受完州达鲁噶齐年甫三十初筮仕即紫绶人羨早贵凡再任为许州真州达鲁噶齐入为万亿库提举亦再任出为江陵路同知七年授中大夫延平路达鲁噶齐乘传开藩延佑二年三月也政尚宽静不弛不贪不作威弄权尤不忍兴造烦民所专辖驿驲弓兵程督虽严无豪分扰邻郡汀有属邑曰宁化寇突至破之披昌振邻将乐元迺封也民惊溃空其邑公间亟提蛮卒驰救又萃诸邑义勇佐官军公指画分屯寇谍知不犯公坐镇两月绥招逃散邑复全乃还府府仓受粮岁委长贰更迭监临类有私觊是岁公适当次严禁令铲宿蠹廩无敢以私进故输送速办公私忘譁明年台察临郡多所纠摘风动冰立廉知公无玷善待而行公笑谓予曰继今慎而益慎矣又曰吾齿寝迈吾将自休吾圭租自贍外节其羸堪谋生而逸老矣入夏纵啖冷瓜暴下不饮药五月十五日卒年六十有七邦人贤而哀之其家发遗篋乃见无所蓄藏随身适用而已人以是益信其果不贪也夫人某氏子男四曰玛哈曰大都律俱未成丁余二尤幼歿三日礼殡于谿东二里之小沙实葬也构亭覆其上九月亭成夫人使子来乞铭曰我公雅敬惟老师父师父亦雅知我公益为公述平生大略传之子孙乎予哀其请辄述弗辞因思西北人材率雄杰悍鸷尚武而嗜杀意者天地劲气攸萃耶而公独禀和易趋尚文雅通儒书礼秀士喜谈僊佛善作大字绰有中州风度其鍾天地之仁气者欤胄出西土而种灵特异者欤噫善人亡矣可哀也乎铭曰

仁气笃生西极异禀譬彼璞玉天质孚尹地分千里秩崇三品施也弗閔霜木凋陨民怀循良士颂谦谨燕云超超托此旅殡双谿徵镜九峰挿笋桐乡之思百世弗泯

前朝请大夫邵武郡侯黎公墓志铭

公讳靖德字共父永康军导江县人初仕闽壻于南劍将乐之黄因家焉遂为闽人曾祖棻登绍兴进士科知成都府新都县累赠少师祖伯巽登淳熙进士科夔州路提刑赠正奉大夫父自昭知惠州赠中散大夫叔祖伯登直显谟阁知泸州兼潼川路安抚使爱公醇谨务学奏补将仕郎淳佑丙午试吏部中选调南剑州沙县主簿满授常州録事未赴服中散丧既祥监行在端平仓又监交引库干办江西运司公事侍郎鲁公穎茂尚书洪公焘踵为部使者二公俱当世吏师於属僚无所假借独奇公连剡推举由是赴景定甲子春班迁京秩知抚州宜黄县避亲改邵武军邵武县用季劳赐服绯鱼公邑政清慎四封安和既授代通判建昌军时郡守多急政公佐以寬简民便之公余杜门勤书纂次晦庵语录分类成编刻诸江西书院士便之移通判邵武军授代趋京会贾似道出督溃遁王陈二丞相更化公封事极陈缺政切直无避且献救急策王相閱视大喜署其後谓凿凿皆精实语拟擢丞相掾适邵武寇张民呶郡守遁庙论谓公两仕邵习知情伪除监登闻检院出守邵武军免陛辞兼程至郡绥靖整飭帖妥德佑乙亥八月也是冬江西制帅黄万石遁入闽陰怀异志兵民汹汹公虑污玷解印绶去隐将乐县之珠岭葺斗室将老焉明年冬十月三山行朝除公军器监丞都督府参议官不赴俄剽寇蠭起有魁渠伍姓者衆掩至公寓所空其貲而火之公遂不免十二月三日也年止五十有一官至朝请大夫子男二逢原将仕郎奕原继嫻家邹浚孙男一仲仁公遇害之明年逢原哀诉宪府部使者陈公元英捕伍寇梟首刳心为位以祭公其文有曰世之治也君子在位为守为牧世之乱也君子在野为鱼为肉侯死贼手何祸斯酷又曰我兴吊伐取贼刳腹剖心以祭侯其瞑目逢原既复父讎奉其柩殡僧地未襄事逢原亦歿惟仲仁存流寓光泽矣呜呼悲夫昔公之佐盱也廉静简俭自处如寒士挥屏尘俗不苟交接予特以斯文相契辱爱等骨肉焉其守邵也礼聘荐至予以亲老辞弗克赴及其隐处也犹间道驰书相劳苦且曰暂寓劍邵之间若欲使予知而尝相闻者噫孰知一旦颠隕至斯极乎公歿且四十载予忝仕闽尝沿宪檄行县至将乐首访公遗踪无存焉既代还经光泽物色仲仁幸见焉而亦中年矣仲仁曰吾父葬光泽吾将迎吾祖而就葬便时省也出行实请曰葬必有铭非先生其谁铭予于是怆然缙袞以归归而孰复则公之平生历历在眼忍不铭乎自古海播尘扬时荐绅大夫士不幸罗墮凶逆者何限而公尤可哀者清规奥学廉声惠政宜有载云旗射天狼以相翼佑者顾亦若是惨则理之所不可推也理不可推亡所归咎则奈何诤曰数尔呜呼悲夫铭曰

蜀文献家珪组满门奕世生贤清修而文时危抗章朝野倾听专城几何朱光西冥辽东避世吾慕幼安狼虎血牙闻者辛酸踰四十秋魄始复土生死交情为公铭墓

梅谿范隐士寿基志铭

延平古多幽人逸士或繇僊佛成道或用方术著名予宦是邦谈经余暇尝愿交一二不可得晚乃得一人焉曰梅谿隐士范君挹其貌肃而和聆其言质而通询其世则宦家叩其学则昔为士而今游艺者也习儒术弗讎习修鍊术尝结庐空山终岁入静尤喜习青囊术谈龙穴卦应甚神常为好事者延致自言曾历东南山水间覆验古僊人所建立若城郭若寺观若阳宅陰穴无一不按经据典故祸福兴替无一不响应又自言吾家生理微而冢嗣息因求诸地理

以救之得于其乡之东谿一以瘞二亲一以瘞子妇既而毓孙三俱秀敏可望而家道亦渐昌又得其一于龟山留以藏吾蛻也其说皆精实入妙自信不惑谓景纯筠松决不誤来世谓人间成毁升沉决由陰阳风水出予素迂僻不通解然闻君言若此固亦深服君之笃信此也延佑丙辰岁夏五予将乘驿还江西小驻城西之招僊一日君过我曰葬必有铭礼也然铭之美?死者何知曷若未死而得铭乎吾死期迟速未可知而死之必不免也吾知之矣幸未死又幸辱知能豫赐一铭乎予曰古之人有自挽者有自志者有谀墓中人者乃若生而刻铭非古也是殆不可且葬也而铭盖逆虑夫世远墓湮或至暴露故刻金石着姓名纪言行庶几後人哀而掩閤焉此孝子慈孙事非墓中责也是殆不可君曰自我作古庸何伤且以此彰吾达又何玷予强应曰诺遂为志曰君名起莘字希尹世居南平县上芹乡之梅岐里因号梅谿曾祖某某官祖某某官父某某官母某氏娶某氏子某蚤世孙三震良坎君今年甫六十有三寿未艾也故缺其文以俟曰歿以某年月之某日葬以某年月之某日异时掩圻即填而刻之铭曰

龟山聚气强龙献瑞未葬而铭何太早计吾铭不可妄得于以成人之美斯文斯邱千载弗毁

前贡补进士宜川叶实夫墓志铭

叶于抚宜川为闻家宜川于吾丰为接壤以故予少尝识其先世字季武为邑丞者其人忠信而文有德人雅士之风予窃敬之别一周甲子逝且远矣已而吾孙辱壻其门视丞公妻祖也公有子三长字实夫于吾孙妻伯祖也予不逮识实夫然知实夫盖端厚执礼如乃翁勤敏笃学如乃翁也蚤岁驰英声尝试咸淳文场两中选赴成均辄报罢又尝随侍仕康庐膺礼聘讲洞学当是时实斋刘公汉传负朝望领郡鑒裁特精与山长孔君某俱异待实夫资其谈经用淑?佩久之将振厉銳进继躅前芳会溟緇埃昏修涂芜蕝于是韬閤芒□浮游消摇庶几乎马少游之为里善人而龐德公之遗子孙以安也又久之邻封啸篁蔓延踰境乃至庐毁囊空震蕩窜匿无宁岁有司病焉采里望堪屏翰者得实夫檄授乡正实夫应接绥抚舒卷中机远迹卒帖息实夫性至孝奉八齡之亲于锋刃纷纠中常怡顏不违性复嗜学当科目一新时督儿孙日诵习不倦既寿且康意若有待于振家学绍祖风乃不幸而年止七十有六延佑乙卯岁二月五日逝矣实夫讳天秀曾祖某祖某父同德临江军清江县丞母某氏娶某氏子某孙某後二年丁巳岁十月某日葬其乡治命也先事其子述家传来句铭读之辞迫而意哀予窃以为毋庸哀何也夫承家为孝子居里为善人处儒林为吉士昭质不亏歿无媿矣而又奚哀宜畀之铭式慰尔後铭曰

昔人有云虽拱璧駟马华屋翕赫于生存之前不若片文只字断石漫灭于零落之後旨哉斯言人以文寿呜呼实夫展也不朽

皆山黄隐君墓志铭

予仕闽久告老归询乡社年相若犹存者几咸曰某垂八齡某踰八齡俱康健也而黄君子荣与其一又询里吉人擅令誉享厚福者几咸曰某好善崛兴也某积善寢昌也而子荣亦与其一窃喜夫里之贤而寿者多吾犹及见且诸老犹待吾归见弥足喜也雅欲合从选胜稍娱晚

节乃倏闻子荣逝未之信也已而其子君厚摭行实来丐铭信矣又窃悲夫风镫之易零乐事之不可期也岁既晏而孰华予其何忍执铭笔耶将固辞顾畴昔识子荣交君厚无容辞则采其实为志曰子荣讳必达先世繇洪双井析家南丰之白田曾祖某祖某父某俱务实趋善渐致丰裕子荣是承是懋滋充盈卒大其门为人魁梧有桢干质实无畦畛解纷周急环里倾依而有司亦才之凡盘错辄资其力当宝佑戊午乞德佑乙亥邻封荐警独能纠合绥靖屏翰东乡逮世易糜溃时复能弭凶植良民用安堵暨至元己丑汀畬绎骚将薄州州且溃独能部勒民义为王旅先由是声联势张州恃以完不憚劳不希赏有司尤义之丰之自邑陞州也奔竞成习往往挟货取名迂视儒术独能矫俗从文隆师训子无虚岁晚亦乐亲章缝有加礼君厚得以攀芳士林父教也所居池台颇占地胜有太守过从悦之为扁曰皆山故自称皆山翁延佑丁巳春正月十有八日疾终于正寝年八十有三娶乐氏先歿子男二天祥蚤世君厚需次吉安路龙泉县北乡巡检孙某三月庚申葬黄柏原之瑶坪阡嗟呼子荣善人也而止于斯不小待耶如小待即风日佳时山亭野寺靡皓三五倚筇携觞相与尚齿贵德俛仰昔今或扬厉月评扶善警奸于以厚里俗辅民彝盖太平时美事而止于斯不小待邪安能不使後死者之浩然长叹也按司马公书仪王公以下三月而葬君厚亟襄大事是之谓礼宜得铭铭曰寿且福无不足兆协卜安斯麓

贡补进士王君墓志铭

前贡补太学生王君正父讳守正家于南丰太平乡之三原年七十有七以延佑丙辰岁三月五日终于家之正寝以明年四月辛酉葬于里之莲华冈先一月其孙孟玮衔诸父命奉行状跪而进曰先大父虽未获交先生顾先君尝辱交矣先大父歿未葬葬有日未铭也敢援先君故好而丐铭幸诺焉是吾三世藉以不朽也敢请予因思正父居同郡生同庚学同业今其请也勤何爱幅纸数十行不以章潜德慰孝思乎遂应曰诺惟正父幼机警酷嗜学于学也根于恕故以如心自号于亲克孝历世变颠沛中未尝一日失欢心也于弟昆友让均于子孙绳约严于友朋敦信义死生无负于僮奴视才短长指授虽跛聋无弃于趋善勇往如家量出纳无二是也凡此俱状所已书予窃有特书者焉吾丰素称文献邦往昔无论城闉里巷东阡西陌伊吾声常相属化美成俗槩以不儒为耻故虽粟连廩金盈匱昂昂峙闾右然而诵弦不接于其邻章缝不踵于其门即清议卑鄙之曰何物俗子也率见摈于卿士大夫由是负资力知愧赧者争自愤厉涤濯粉泽缘饰冀以免守钱奴多牛翁之讥而曰吾士矣抑犹有狙服窜名姑惟诳愚掩羞而实不学即清议复卑鄙之资以为笑当是时诚意向儒斯文自贵惟三原王氏最虽宗茂支蕃慕向或殊而其专勤比于寒窶贬损忘其侈汰惟正父伯仲最以故伯氏通父试景定甲子中选上南宫正父试咸淳癸酉亦中选补成均久之通父逝正父衣冠俨立兀兀谈经义世易矣志弗易也宜特书状又言正父苦学由天性虽乱离荡析犹结茅依厓诵读琅琅虽暮色苍然犹构家塾祀先圣率子孙寅奉如礼虽利习澜倒犹建楼储书常留宾论辨为乐其富而好礼也又宜特书呜呼习俗移人贤者不免昔人尝悵悵于是矣壮老好修挥绝芜秽空山寒日郁然与简编相始终若正父者殆萧艾中之兰茝欤惜也不逮识君而止铭君也曾祖某祖某父某子某孙某铭曰

饮一瓢食一簞嗇矣唯克已好学也圣人贤之有民人有社稷侈矣谓何必读书也圣人斥之

猗嗟正父倾心儒门诗礼芳润昌其後昆後昆能勤亡也如存

赵圣清墓志铭

故友圣清赵姓孟沁名石塘其自号建炎自汲南渡始为南丰人承节郎讳师齐之曾孙运司贡士讳希康之孙吉水县主簿讳与访之子也前代王孙之遗胄庠序之秀士州里之吉人也不表暴以眩俗不轻儆以肆志而惟端谨寡过克循矩度者也不沉溺于曲学而惟专经属文志取科目虽时不逢而学不废者也不慕薄俗之华侈而惟守俭勤致丰裕退然务实自适者也其谦笃若是即怡愉寿康宜也乃仅六十有三延佑戊午岁正月某日逝矣悲夫昔岁予忝领乡校苦乏助采士誉资圣清为助当是时构剏一新学务丛委圣清谨出纳严程督调娱补苴绩是用集予固喜之比岁予仕闽久乃归归欲亟见圣清则闻病痲久谢客矣予深惜之今年首春造其庐圣清矍然迎待论心移晷见其神情步履若平素予又特喜曾几何日遽传疾复作不可为悲夫孰知此一见乃竟为永诀乎一日其子由□来言曰将以五月某日葬州里五都之池原未有铭也敢请予欲辞以同庠故无容辞圣清娶林继王子男四女四孙男一女一铭曰

石为塘兮齿齿塘之水兮清泚其潏也深其润无止何斯铭斯式表善士

宁海州仓使孙公墓志铭

郡少尹孙侯家宁海而仕南丰三閱岁将赋归语予曰先君仓使弃诸孤殡浅土有年未卜兆也吾反吾庐逝不亲它务惟窀穸是务庶其少赎不孝罪然墓必有碑碑必有铭铭必有所托托之先生能勿吝乎予谢何敢吝直愧弗文将无以称显扬耳于是掇其家谱而为之述按孙氏故复姓公孙也肇自辽西之令支世悠远莫考略见于史者曰度曰渊疑即其宗顾不知何年去复而为单姓又不知何年析其????居燕复自燕徙宁海遂为宁海人公讳公佑字翼之其讳希而力穡兴家者曾祖也讳福而仕金为评事娶田氏者祖也讳时英仕元为户部郎中娶沙氏继解氏者考也初户部公生三子伯曰公亮仲曰公佐并受朝命为商山铁冶提举儒书吏牒博习兼济俱时论所器重季即仓使仕乡郡不大显而其德义律身礼法齐家厚族睦婣拯难赙急能使州里称善人犹如二兄焉二兄徙家青社仕寢显家寢昌公处宁海故宅其子孙蕃家力裕亦如二兄焉提举公之居青社也家有木函备贮储岁在辛未有栢一根产函之底芳馨葱蒨聚观骇异公喜曰是谓寿徵其吾家眉寿之占乎时甫中年已而与长弟果得寿近九龄仓使公亦如之大德甲辰岁偕夫人郭氏同跻八十远迓庆羨颂歌聯轴靡不曰积善之报也公既享高年膺厚福及见厥子之荣官清时暇日夷犹乐天又靡不曰行地僊翁也以大德某年某月某日逝年八十有二夫人以某年某月某日逝年八十有四男好直承务郎同知南丰州事次好礼博兴州税使次好智胶州吏目孙男自恭至宁凡六将以某年月日奉公及夫人柩合葬于某乡祔祖塋也昔有从宁海来者间为予道孙氏世以德善着予固未之敢信今而福寿之报弥章世宦之荣弗替斯可信已易曰积善有庆书曰天道福善允矣不诬尝闻叔敖以瘞蛇致卿相鍾以设瓜感真灵派胄虽殊抑何孙门之多善人而天之于是宗又何其多显报邪彼有不信夫为善之必有报而天道之必不昧者其尚鉴于孙氏哉铭曰

孙起辽西蔓延山东有门其崇积厚报丰维仓使公棣鄂森秀双庆眉寿子荣孙茂考终有年
窆于新阡惟善故传永耀铭篇

奉议大夫南丰州知州王公墓志铭

公讳着字善章姓王氏东平人也东平文献郡自野斋李公集生徒讲家塾衿佩云赴若河汾
伊洛间虽赋资有敏钝进学有浅深凡一登门经指授无不取中于时往往资以致名声规仕
进公其一也公家世仕金为显宦有封国于鲁者已乃中微至公生而幼慧崛起屹立既长偕
同志事野斋日侍书策琴瑟间薰染成质駸駸颖出浸长习文事明法律得推择为吏至元中
繇尚膳监徙军器监典符移有能声久之出掾福建行省入领西山灰场积年劳登品从初授
平江路长洲县丞府命监视平淮库库官吏侵盗钞本至踰万锭上下互蒙蔽公白发其奸犯
者惧厚赂公公不为动事闻优陞一等授建德路遂安县尹元贞大德间授湖南道宣慰司经
历满授潭州推官不赴改授信州推官满宣授杭州路税务提举当丁未戊申间闽越饥疫露
骸横藉行商景絶由是课大亏督补急星火公倾貲均偿至贷负无怨言後更以最闻延佑初
擢南丰知州州闽赣接壤也地僻罕迎送民淳安耕凿户无豪侠里无推薶公顺其俗而抚柔
之壹惟以平恕为政本絶撝求禁动摇民用大和邻封南城县缘伪钞纵首?妄指株连州民至
数十尉领卒踰境会巡检掩捕若剧盗然田里汹汹公奋曰良民也吾知之宜急救不救即数
十人死数十家破矣累移檄驳止且戒巡检毋曲徇尉失意去民获全咸额首戴公郡庠礼殿
素雄峙一夕梁蠹栋倾貌像几仆亟议修顾役重力殫官士俱失色公曰吾有以处勿忧也稽
簿书蒐遗余得有司所封贮旧学租谬指为贡庄粟者凡四百斛请于省易楮市材免轮增耀
复饰衮冕像新棂星门士刻石颂功焉州东祠僊真曰王侍宸职雨阳着灵异岁频亢旱公才
往祷霪雨辄踵至或淫潦复往拜即云收日舒如翻覆手若此者屡咸骇异之公爲构山亭表
僊蜕以故雨暘岁农无旱涝忧由公力也岁首尝逆计艰歉先期腾牒丐早发官廩且重杀厥
直以优民逮耕耨时至则备豫而食足矣民不待哺亦由公力也郡有候卒抵罪狱垂成繇径
祈免主吏且陰助公曰不可事干刑名敢徇情曲法乎正其罪闻者叹服嗟夫公之于政绩也
小施尔假之岁年丕展素蘊汉良吏不分半席乎不幸缘小故往建昌婴暴疾亟舆还州廨甫
一日卒矣延佑己未正月十有七日也年止六十有七官止奉议大夫悲哉公之初领郡也予
仕闽未之识然游士延誉家书传音率称道公政由是知公名暨予代还甫谒入即倒 倾豁
若素交予不省奚以然也其咨访政理赓酬篇章无虚日谦和慎栗言洞肺腑一不作世俗矫
伪状且命长孙来受经焉予又不省奚以然也思公笑言历历在眼悲哉不可作矣曾祖某祖
某鲁国公考佑妣马氏娶李氏子男三子诚子达思文女一适同郡赵世显孙男二长英孙次
元丰是岁四月载柩归葬东平故里诸子来丐铭予坐老病固辞且晓之曰而翁故旧满朝名
世钜儒提大手笔者满朝子归而求铭宜也铭岂予所得为诸子请曰世之欲得铭者率陰祈
达官显人假条冰輝映不计生死交情也惟其然故序载失实而传播致疑徒自欺尔铭犹不
铭今而吾父所雅敬惟老师老师复深知吾父则夫以郡士而纪邦侯也公以知己而秉铭笔
也直吾父无知即已如有知也铭由老师出九原不慰乎予聆斯言而益悲乃为铭并书其近
事之一曰公义不忘师门尝逮请放鲁斋许公故事命野斋李公列从祀闻于行省是之转闻
于朝矣拟奏稟将获可铭曰

王为显姓晔奕东鲁言亢其宗有善章父鲁国之孙野斋之徒盛年亨衢才名于于秉麾南州政平民悦夷路?倾六轡驟蹶丹旄北归州人悲嘯畀此铭诗永世之思

李氏孺人墓志铭

里同姓有名希龙字浩可尝历吾州行用库副使者一日请于予曰顷不幸遭妻丧窆有坎葬有期而刻未有铭也闻诸士论凡歿而有足称者类辱铭于仁人不佞敢请予惟寢毫且昏将挥屏翰墨谢尘事安得复效唐贤谀墓中人哉即固辞已而其请益力曰吾妻非有封爵赠谥也亦惟是妇道母仪粗有足书顾弗获片言掩诸幽是堕大伦閤潜德仁人其忍诸予于是蹴然哀之乃俾述其平生曰吾妻同乡李氏讳妙静其先世尝试童子科至今人称李神童家家故尚礼法其在室也濡染母训贞静婉淑其归于我也能勤能俭能协和中外飭家务其于子孙能律以矩范勉以诗书其待嫺族能笃恩义得欢心其视乡邻贫乏能赙恤不吝而其于释教益能崇信常捐金构创不倦也歿以延佑戊午十月之某日年七十子男四长惟一後一年歿次某某孙男四女五葬以明年八月庚申实本乡之五龙坑若此皆其夫之述而不假于人之谀信斯言也少为淑女壮爲令妻而老为贤母所谓可书其在兹乎浩可家吾州里世称善人迄今羣从及其子若孙俱朴茂端谨弗侈弗矜而李氏复笃于善济美夫家其丰衍未艾也吾知之矣故畀以铭吾观古昔贤妇人其制行卓异者率载之史其不至于卓异不得列于史则托之铭铭而传犹夫史也吾铭岂轻畀者铭曰

爲妇而贤为母而寿归全斯邱式裕尔後

陆郡彭氏墓志铭

吾故人宗正寺簿宝塘黄公之曾孙曰瑞曾昔请婚于吾里故人提举彭公之长女孙曰德玉既获诺久之瑞曾承父命来受室于彭因馆甥焉甫三朞将于归行庙见礼拜舅姑堂下不幸遽以疹疾夭惜哉瑞曾尝从予受经一日踵门怆然曰薄命失助负吾亲望无以为怀矣吾乃祖乃父俾归柩于黄氏之阡而吾妇翁素鍾爱未忍遽弃捐也酌情从宜姑就窆而为後图惟是冢隧有刻敢以累先生先生能不替世好乎其赐之言以泄瑞曾之悲予老矣不轻志人墓抑二姓俱平生老友而于瑞曾同笔砚谊难拒于是閱其状有曰志女功执妇道平居无厉声疾色柔和俭勤罔有间言能事父母如舅姑能于弟侄加友爱虽未逮事重闈而岁时致礼省问必严必敬如亲见之故吾二亲之闻讣也相向而哭之哀疾驱百里临其丧予閱状至此不待终日足矣可以称贤妇当吾铭矣儒家女服习礼训养成淑质宜不与流俗庸妇同惟其夭也故可书者止此诚获永年供甘旨奉蒸尝宜家睦族宁不为瑞曾之良助今而止乎是也天也人其奈何曾祖日新赠宣义郎祖履道从仕郎瑞州蒙山银场提举父禄孙未仕母邹氏女肇娘甫半岁大德丁酉三月某日其生也延佑己未七月四日其歿也某月甲子其葬日也某山某原其藏穴也铭曰儒家之女为儒家妇结缡维新风鐙何遽驾言于归竟化坯土斯铭何悲为思厥祖

水云村藁卷八

卷九

<集部,别集类,金至元,水云村藁>

钦定四库全书

水云村藁卷九

元 刘埙 撰

启上

通谢丞相

上丞相印早从緑野之游随使者车来问洪钧之转行矣肃章服而进期於瞻绣袞之光斋心通名顿首纳贄某官真古人杰为今名臣以鲁论致太平复迈管萧之匹用周官立法度上媲伊吕之间揆路三年盘石四履正历阶而趋宰辅欲平地而作神僊遂挂神武之衣冠甘乐清音之钟鼓减声伎省辇从未数唐人之清居鼎鼎无楼台俨若寇公之俭於惟名德简在渊衷时咸思西蜀之英公复从东山而起寛夫百许岁重来军国之平章君实九分人宁忍园林之独乐某忝联宗籍浪窃世科闭户读书亦既蹈寒饿之水火研朱点易颇欲窥广大之乾坤适飞挽之眷知以画诺而辟置幸际洛社耆英之会辄修韩门弟子之恭念昔先人曾是相国之客讫至今日谁怜中散之孤归诚三台彻福再世华竹秀而野将窥五亩之园风雨安如山终庇万间之厦瞻依匪远归倚弥深

通杨提举

掩袂垆亭曾共听於夜雨分符侯甸喜采映於福星遥瞻礼乐之光愿托蕃宣之庇某官三湘奇气四海高风志在春秋学问传素王之正名若日月器能兼诸子之长以严明为莅政之规模以庄肃为飭躬之本领翩双鳧之入覲俨丹凤之来仪粲粲道州之声汪洋楚水皇皇周原之望洗濯瘴烟且将接大微之躔乃复屈泽国之节我闻在昔人亦有言谓关西之畏四知宜司食货若龟山之救一半合在朝廷然时方急於谏询故政姑烦于岂弟载嘉醒瞶有伟将明竞传歛散之适宜属无患矣亦曰激清之竦听职有利哉惟中朝方启於太平恐外服难掩於显用激西江之斗水已闻盛积於腐红朝北极之一星遡见入聯于荷紫某力微心在志广才疎奏上林子虚之篇激昂已倦听贞元供奉之曲感慨徒多身还黄叶之邨梦断紫薇之省敢谓清朝之垂念俾分巨屏以承流既体统之相维岂礼文之敢缺頼石三百里所愿息於叹愁广厦千万间终有祈於覆幬其所谓敬不在斯文

通谢都大

晖腾铸冶兼提数路之权职忝题舆远藉万间之庇久愿缔交而微介绍今欣备数而効走趋谁为先容殆有默相某官锺灵台岳挺秀相门季方难弟元方难兄允谓一时之杰太傅在前少傅在後相承数叶之芳独推左戚之贤最着右丞之政凝香而森画戟藹黄龙循吏之称入省而襮青绶伟贞元朝士之望惟时议政重在丰财子母相权每病阜通之无策君相共简咸欣幹运之有人暂违立玉之班往课流泉之绩文阁峻迁於寓直使轺广统於提封方日鼓於洪鑪遡山积於朽贯生财有道行彰坏冶之勲播物无垠式广钧陶之业某素无宦谱颇读儒书一科不补于辛勤老将至矣半世殆成於流落命亦安之适了邑劳遂佐郡事翠浪玉虹之佳处似有宿缘红莲綠幕之旧游已成陈蹟虽自喜经从之熟若为俾观听之新尚获私於幬幪庶其免於颠沛铁九州而铸错第怀跃冶之羞丹一点而成金愿溥在熔之惠

通赵大帅

开元帅府於昭鉞钺之威随使者车密迹旌幢之?虽号分台而涖事实均列属以受容遥瞻邃严敬叙归向某官机神明监文武威风蚤振江淮之名丹心若月生稟岷峨之气定力如山指麾已失於萧曹比拟自谦於乐管龙节英蕩镇真扬之提封燕寝清香壮金焦之形势乃陞华於邃阁乃导旨於机庭适长江风寒之区方严里疆若要地云屯之戍宜重中权资诗书礼乐以折冲觉营垒旌旗之改观洗足入船上岸击贼从容制敌之规酺酒临江横槊赋诗燕适巡边之乐鼓角譟亮波涛肃清羌人服赵将军永絶羽书之警辽吏畏司马相欢迎绣袞之归某筮仕无奇承家不竞棄下泽御□段每自安於平生叫閭闔呈琅玕觉难谐于当世顷幸邑滩之涉谩寻计幕之游顾皇华之在原何资画诺适红牙之开阨喜近照临谅不忍於壑邻尚或私於钧播詣大府而受约束溯风怅隔於一江裹章服而谒上官何日获瞻於六纛第严修飭遥听指呼

通徐提刑

褰帷入境耸瞻直指之威贊幕充员谬主将输之画实幸相维于体统敢云各异于司存矧再世以辱知辄三熏而修敬某官瑰伟宿望卓犖通材抱送麒麟生全光岳之正气巍登龙虎早垂宇宙之大名践敷华资培植雅器凝清香森画戟藹然循吏之称开黄道拜紫宸藉甚望郎之誉密勿汉廷之侍侵寻雍橐之聯适当钱楮之相权阜通是尚深軫官民之交病缓急失中肆命儒英丕宣帝旨残以寬慢以猛恃平允協于权宜下适重上适轻执法毕伸於冤枉不待效蕤轮之举自足彰持斧之尊小试激清遡归献纳日丽崆峒风酣章贡姑暂驻於翠轺雪残鵙云近蓬萊已催朝於紫禁某故家薄宦平世凡材昔我先君雅締陈雷之好惟予伯父复陪温石之游不图冰幕之贅僚又隶霜台而受察岂造物曲怜其流落亦机缘适契於会逢恪共走趋惠祈涵育孔融叙膺门之好愿私敬故之恩重耳徼楚国之波尚溥及邻之润誓鞭钝质祇服明条

通史提举

六轡观风共仰学斋之望一官赞画滥陪计幕之招虽各异於司存亦均聯於体统某官五史

名家四蜀奇气益州自蚕丛而後于今几年临邛从鹤山以来惟公再见堂堂人物表表声猷
聯太微之积星出泽国之簞节春斂秋歛奏报不待於申寅左鬻右饁喧呼了无於庚癸於此
见真儒之政夫岂若俗吏之为遙观长材因感时事天地中间莫不顺纷南北以来同国家闲
暇及是时宜中外之有托以仁义之泽坝箠羣有以道德之威泰华四维岂繫重名不列要任
宋三百载方重启于太平蜀第一流盍遂登於显用某生聯属籍壮忝世科闭户读书坐阅十
年之光景研朱点易欲窥三圣之精微詎期星使之礼罗亟上天朝之奏剡使易彼以就此将
舍旧而图新遂令海霞岛霰之缘转作山雨浦云之兴有严告至愿在受容楚材而晋用之盍
归块北秦弟则吾不爱也諒蔑町畦行赴台参先修函摯

通赵府判

昔拜龙门曾近尚书之台斗今随牡轡或依别驾之屏星一见如平生之欢相与笃再世之契
论心幸甚舞手跃然某官珪璋名流诗书道味凜清白操不染纨袴之尘为文章家自是衣冠
之秀共惟先正夙号儒宗德望名声独冠端平之诸老言论风旨卓为元佑之全人由学妙於
极先故名高於世表人仰善政知王氏之必兴天昌忠良果臧孙之有後是先世德丕阐先猷
维今朝野之升平将为礼乐之制作有如公等宜在帝傍孤鶩落霞之边暂分风月金雀觚棱
而上行曳星辰将宏试於经纶用丕昭於风烈某十年濩落一第沈沦林下读书觉难甘於小
隐牀头有易差未至於全贫詎期星使之礼罗忽上天朝之剡辟俾司画诺适近照临惟吾翁
而翁曾共论於莫逆今兄子犹子諒未忍於弃捐尚借余波庶全末路我虽异事覬闻药石之
规岂无他人愿广本枝之庇

通黄提刑

绣衣出使新风采於大江以西油幕从军望顏色于崇台之下幸末路遭逢之巧在洪钧陶铸
之中銜?不文抠衣而进某官大名揭乎日月直节凜于冰霜为天地立心实本经纶之有学使
鬼神破胆咸知操履之无瑕伟哉三馆之英儲信是四明之瑞稟抽书金匱抗疏玉阶陈孟氏
仁义之言不负所学严昌黎佛老之辨欲正人心引裾力冀於回天拂袖勇移於分月遄被十
行之宠来行千里之春富文忠大活饥民恩深青社狄梁公尽除淫祀声动河南使华兼領於
千仓帝意灼知其五善乃若春朝之元会毕然天笔之恩言谓吾民以食养生固资斂散惟本
朝以仁立国尤重平反申命諏询丕昭钦恤於粲崆峒之日不移益部之星然而时变采艰事
功何限岷山云黯京观未筑於鲸鯢蜀道天高介冑久生於虬蝨欲折此虏须用真儒甘泉论
思会趣登於显用天章条奏愿重致於太平某晚出单人早亲诸老半生迂拙欲潜窥往圣之
精微末第沈冥已消尽少年之意气锦正慙於学制琴乃使之改调比及三年齐瓜之告熟久
矣今既数月庾梅之献笑随之辟代已上於奏函稟命实承於闕檄惠徼夏庇谨侯台参一道
之瞻福星出处幸均於临照百谷之仰膏雨始终端藉於生成傥略等威尚私鑒哉

通徐资相

碧幢列属谁为东道之主人綠野栖贤赖有南州之高士昔歿身於化冶今顿首於师门不虛

此行敢恭所事大资相公四海典型之老两朝文献之儒伟节清风叔向古称於遗直全名盛福季昉见谓之善人固宜颢银台批敕之权当玉堂挥翰之选岂特鸿文钜笔一时鼓舞於风雷每闻梗论危言千载燁光於日月抗疏破限田之议腾章折阍竖之奸天为动容人皆吐舌至今谈者咸仰凤凰之朝鸣想在当时能息鱗鱗之昼舞荐绅楷写汗简流传虽申公老成举世方推其华皓而疏传止足浮言莫得而磷缁亟挂衣冠甘安杖履然而不有君子何以慰望治之心所谓伊人诂容袖调元之手帝方注想公盍遄归矧思青宫羽翼之劳宜正黄阁股肱之任独乐园琴竹之趣固适雅怀天章阁笔札之陈乃关世运亟其来只母或浩然

通镇江守赵总领

帝命王人就临重镇官称内史遥附属城执摯有严修辞以进某官两朝开济之业一家忠义之传文武威风西平有子机神明鑑南岳鍾灵若稽元勲畴似先正总八州而作都督屡立奇功率三军以定中原期摠宿忿载旗常而孔伟辞袞绣而弗居有鼎彝未了之功留坝篋後來之秀器能是侶善庆弥长古风萧萧久无此魁垒鸿硕之望世德继继乃萃为偶倪奇伟之豪四海仰冰壶之名一时如泰山之重其仕郡国则称循吏其立班行则谓端人羣公仗治办之能当宁倚干方之略六师饕餮赖周使臣千里蕃宣为汉刺史眷南徐之巨镇号东土之雄藩自本朝建总台实受江淮之财赋以名家兼郡绂密护京师之本根相望广陵城一水之间尚想信国公千古之烈宜恢伟绩增焕先猷岂惟表里于山河终藉经纶于社稷

通繆吉州

大藩易镇仰韦寢之凝清底幕服劳依俭池而泛緑以宦路驱驰之始在化钧陶铸之中遭逢甚奇归倚惟谨某官接永嘉诸老之????在咸淳君子之流真实身心寒露清水之凌厉光明正事秋霜烈日之肃严声华甚都步武孔硕晓趋闾阖方陪芻禁之朝日远长安遽请竹符而去试观汝川迹日之政允为江右列郡之魁治状既上於清朝恩旨俾迁於巨屏云间幡盖移来白鹭之洲雨外?蓑欣听黄龙之诏方开藩之伊始属艰余之隐忧富者拥红腐而坐观贫者擷乌麻而假息解剑指廩矧春夏之方交炊沙作糜恐朝昏之不保赖有仁牧苏此疲氓闻道途之传诵谓规画之精密文潞公置余场一十八所惠及成都富丞相活饥民九十余功高青社仰明公救菑之政得前贤济物之心共惟圣明邇求俊又谓结辈治郡国固可苏春陵之氓谓长孺在朝廷始足夺淮南之气趣登禁近共赞昇平某鐙火半窗齋盐六馆仕未能信乃俾着从事之衫谁适为容窃幸入大夫之幕念平生耻同於俗子兹一旦获事於吏师誓冰檠以求知望风霜之见赦推官理事不倦尝景慕於昔贤太守决郡如神尚庇存於下吏

通赵制置

大阬宣威屈金狨坐偏州假守依玉麟符念先世尝事於名门喜今日复归於化冶归心台斗顿首轅和某官文武威风机神明鑑有大力量实鍾南岳之灵号真英豪允谓西平之子功名赫奕忠孝光明自端平和战以来至开庆艰危之际寬先皇之宵旰多名父之勲劳军入洛阳雪列圣在天之愤威行沙漠折诸戎猾夏之心属岷首未靖於风尘而江面颇严於? 金陵江

南佳丽关上顾忧使君天下英雄赖公临镇感激受诏慷慨建牙总数路之赋輿授诸将之节制延州有小范西贼胆破於歌謡江上用魏公乌珠色动於笳押号令严肃气色精明方将输治法而出征谋亦且倣国人而讨军实深沟高垒绳聯而珠贯壮士大马云集而蝟兴丕建骏功於昭先烈百年父老争夸小忠献之威风三世祖孙行继大申公之相业

通淮东制使李端相

宣威旧镇丕昭斧钺之光分牧属城遥借旌幢之?昔尝忝走趋之列今仍依节制之尊敢以一笺彻於六纛某官天人风采王佐规模出只手以扶乾坤成功不有嘘寸肤而起海岱润物无声身系国家之重轻名动关河之远迩任兼将相而爱善类若圭璧身居边境而惜民力如体肤两晋以来惟羊祜在仁人之目三代而下独孔明用王者之师顷从渚宫暂謁洛社属?彻乎江上而襁褓徧於淮南上兴拊髀之思公重致身之义朔方将士想子仪之重来西夏羌胡惧希文之忽至感激受诏慷慨渡江大幕府之宏开平山堂之增重尝闻昔日广陵坐镇者十年其在当时淮上不惊於一矢今复借福力之镇压果又见边尘之肃清方将轮治法出征谋开诚心布公道无日不讨军实而申倣迨天之未陰雨而绸繆相视时机恢复疆宇

通吕保相

崇台督餉兼隆鉄钺之权凋全承流媿负摩符之寄畴昔仰威名之重乃今窃庇覆之私遥望旌幢肃陈竿牒某官名满九牧气盖三军传六韬书能答箠於羌虏佩四将印欲纓系於单于自结髮以从军每枕戈而待敌百战百胜志洗天河之甲兵七纵七擒声震江淮之草木登坛受节杖钺督师首巴蜀膺荆襄所至捐躯而自效脑夷吾髓沙漠誓不与敌以俱生顷者平泸之功与夫援鄂之勇书之史策纪於太常将入贊於机廷尚出临於统府岂风寒数处正欠蔽遮而天险一江实资守御非藉老熊当道之势孰折佛狸飞渡之谋肆劳元勲诞膺重寄竝授诸将之节制兼总数道之赋輿屹万里之长城增九鼎於吾国自西陵至白帝咸无羽檄之惊若蜀道上青天亦遂农桑之庆行鹰扬於锐旅即虎视於中原人思子仪若父兄直取神州赤县之旧天生李晟为社稷峻陟斗枢黄道之间某簪橐故家衣冠末绪摩盾草檄屡随出塞之行说剑论兵漫爱从军之乐兹忝分於陋郡幸遂隶於和门虽方严边鄙之防諒亦念民社之责给馈餉而不絶尚少寬程督之威安田里而无愁当勉竭拊摩之力

通交代邹通判

展骥足为别驾将催芎底之朝遗鲤鱼有素书来促瓜时之代结好允期於奕世纳交本自於通家爰致报函肃迎都骑某官寬裕有君子之德通练擅能吏之名庆元抡魁故家宛其文献武阳山水胜处鍾此材猷通籍明光之庭奏最河阳之县集玉京骑麐凤宜着祖鞭泛僊槎问斗牛乃题陈坐春台四境沂海一歌比者以长史之贤居然行大守之事兴弊补废适成凋瘵之余醒聵膏萎顿复升平之观行且被丝纶而朝矣何遽拂衣而去之厥今日月清明六龙在御风云际会羣凤来仪虽雅怀固在於爱山恐优诏未容於专壑神明佐郡深諒父老之思刚正立朝行庆公侯之复

通许船场

剡木为舟有伟重临之绩载书入幕谬陪画诺之游谊重同寅礼恭先甲某官志在利涉才若顺流扣舷高歌不逐浮波而上下转圜有力欲平大势之重轻兴念故家旌阳之僊来访古洪督府之胜时惟海宇未靖涛澜野渡而横孤月孰为樅柱江河而亡维楫宁勿沦胥行畴治舰之庸丕显济川之业所愿听渡江之击相与观越河之焚连樯五千双已办舳舻之衔尾破贼八十万要令帆樯之飞烟某身世转篷利名轻叶牵挽不上如槿果老之铁船积压空多不过米家之书卷素昧藏壑之志率常载月而归谁畀招旌俾参挽画独我从事正望中流之得壶及尔同僚毋若共舟之敌国行将系?即遂捩衣

通谢广西帅胡都承

桂府价藩方重宸旒之南顾棠阴旧部径烦牙纛之西行新受隆知冒申私贺某官辟历手段光霁胷襟特立独行鬼神亦为之破胆大公至正天地实赖以立心四海仰石壁之名一时如泰山之重孔明制夷人之变允谓知兵无忌辅晋室之兴咸云似舅盖衡岳独鍾於正气宜长沙多出乎伟人观所至之设施见平生之聚辨比下青冥之钺来临黄木之湾隶节度二十二州仰郑尚书之威德焚淫祠千七百所伟狄梁公之英明海浪顿清瘴云不翳适五筦谋诗书之帅衆切去思惟九重知文武之才就资移镇自东徂西而靡憚由近及远而翕孚将士欢迎喜我公之未老儿童歌舞夸吾父之重来仁义前驱威声丕耸元戎启行十乘小烦镇於带蓼宰相礼絶百僚行见催於绣袞某苦无奇骨空有壮心说剑论兵漫爱从军之乐摩盾草檄屡随出塞之行尝力战以全蜀城亦偏师而当敌骑幸逃万死已老半生荐假宠以试州俄纏悲於陟屺三年枕函身待尽於邱园一旦援琴恩许依於香火忽有来於吉语辱下采於孤踪念方辞西阕之招似难赴南辕之役冒致笺题以谢遥瞻旌节有严顾关公辞曹虽莫效驱驰之事然萧何荐信终不忘特达之恩敬在下风以俟他日

贺包尚书除学士知平江府兼淮浙发运使

从雍辍班临吴叠组曳尚书履方资顾问於清朝佩太守符乃总转轮於诸道帝屈儒臣之重民欣旧牧之来辅藩增雄国计顿裕某官学臻圣处名满世间中庸九经为国家本原甚正论语一半治天下绩用弥彰讲明禹稷之事为鄙夷管晏之功利独殿诸老以觉斯民持藻监上星辰茂着立朝之绩济巨川作霖雨思宏泽物之功适时有馈粮之忧以公当督餽之寄搴华舫阁宅牧苏台盖将用周典以阜民詎止如汉人之给饷矧是重来之城郭允宜润及乎京师田野颂包家式表功名之留远中国相司马遹观道德之成强某辱出师门欣传帝诏顾东南之民力竭矣孰与赐一分之寛今天下之大老归之愿毋急十年之蓄敢因私贺辄述公言

贺包尚书除端明枢密

峻陞紫殿密运洪枢来大老於海滨丕耸华夷之望用真儒於天下诞和朝野之瞻兵本尊强庙谟宏远某官担当宇宙力量掀揭日月声名有孝肃公刚方得大臣体由象山翁传授为学

者师两朝咸仰其仪型八坐独高于献纳淮南憚汲长孺顿寝奸谋江右有王茂洪何忧世事盖践履素根於诚实宜观听易见於感孚方圣明临御之初聿新治化念耆旧凋零之後尚有老成播告大廷超陞枢府人望翕服皆酌酒而贺范韩天声奋张可制挺而挾秦楚然而国脉未壮时弊日滋进取良难固无复神州陆沈之责太平自叱或者咎江沱宴安之非况救楮之策已穷而通财之务尤急仰惟魁垒之壽俊必有经济之远图成长治建久安初不出四书之外荷美名都显号会当跻三代之隆某辱在门墙欣传纶綍洪钧转一气所愿入於化鑑黄麻似六经尚竦听於宣布

贺邓侍郎除待制宫观赐金带

辞荣荷橐均秩蕊宫花底退朝宠畀环金之饰松阶候对寝聯鸣玉之班伟圣主之优贤许从臣之请老某官稟天地中和之气袭圣贤诚明之传若范忠宣一生祇用二字如司马相三代而後一人循良播重湖以南清节照普天之下顷兴思於宣室遡趣对於延英从容九陛之前密勿四几之奏华光劝讲尝启沃於帝聪吏部典铨妙裁量於人品论思未究决去何轻甘辞天上之班聯归作山中之法从诏札密封於泥紫服章光映乎腰黄緑野午桥月伴寻僊之棹青山流水春迷宴壽之堂方将苦节以养高且复观颐而自乐园林穷胜事入京洛九老之图丹青臆老臣踵申潞二公之拜某莫迎归骑敬走贺邮不善惟恐端明知正祈覆锦言仁相从先生後愿在执鞭

贺曾侍郎三除隆兴兼转运使

三锡纶函重临绣部甘泉上雍世瞻笔橐之尊南浦西山习见节摩之熟藩条诞布使指有光某官魁从嫡传公台伟器蚤仕承平之世谙练典章荐更烦剧之司兼该流略执笔密裨于公衮荷囊遂复於家嚮有伟践敷无厯赞述思昔先正拂衣不附於权门至今清名垂旒犹简於世胄适寇盗冯陵於江右叹士民疲敝於兵间畴咨伊漕之良往绥凋瘵历数在朝之列孰可镇临肆起耆英俾安黎庶遽殿峻陞於论譔价藩就督於转输虽园林胜事钟鼓清时方适午桥之乐然宫殿微风旌旗暖日已严聿诏之颁烦駟度於周原喜马谙於旧路昔阅道重来於蜀郡人美棠陰又魏公三判於相台衆夸粉社如公此出视古略同所希布寛大之书亦冀挽澄清之轡激西江活涸鲋共仰台府之尊严集北斗骑麒麟即侍禁廷之密勿某短檠鐙火太学齋盐羣试别头深惧有司之见弃偶逢具眼乃超诸子以先登莫钻刺於旁蹊尚陆沈於债邑风波之所激射汤火之所煎熬殆哉岌乎慨其叹矣兹幸二天之可恃庶期百里之小安誓竭庸材恪遵明训

贺曾运副除宝章阁待制陞转运使

峻陞次对仍总转输立西清法从之班光华维旧镇南昌都督之府号令重新益彰台治之尊式表使名之正某官传家文献经世材猷数端平诸老之余谁其存者负贞元朝士之望公独岿然敷历孔多设施有伟都司学宰相密裨赞於钧枢吏部掌铨衡蚤翱翔於禁橐燕适园林之胜优游香火之缘俄九重之兴思侈三锡而出命鹿輶凤驾指朱帘画栋之间牡轡载驰自

太清紫霄而下福星所照和气如春适兹满岁之期特畀进班之命宝储上映於奎壁超陟松阶龙光仍射於斗牛倍添棠景第恐聯飞於绀緑又将催侍於赭黄听文德之麻亟正一相处中之任续宣靖之谱遙駿两朝定策之勲某喜听褒纶莫趋贺庑地方千里江山又借于照临我独二天风雨端祈于覆庇

贺张侍郎宫观

恩荣银信班峻琳宫人亦有言何损仲尼日月公归无所盍依汉祖风云瞻緑底之飞来表清衷之简记某官人品第一学问函三有王佐材在廷无出其右真宰相器非道不陈于前方晓梦之听朝鸡忽浮云之变苍狗文潞本无嫌于质肃顾于我以何加元稹实自憎於晋公姑待天之少定暂卷班于碧落且寻胜於清时遯兴宣室之思诞畀真庭之禄行趋剑履入覲枫棱君王问长卿袞归不远中国相司马环召继来某欲趁庭趋恨拘官守芙蓉隔杨柳之路问讯无从江梅托桃李之场生成有望心思所及手笔莫殫

贺吴提刑

起家拜诏出节详刑礼乐遣皇华风采自生于牡饗兵卫森画戟先声已振于虎城既就第以建台即启途而行部某官匡庐间气洙泗正传数我朝自韩吕以来故多名族独诸吴如王谢之盛世有伟人积正心诚意之工夫裕尊主庇民之功业政事造化学问发皇何未闻廊庙之登竟复拥节麾而出维上所属望公甚深谓一夫不获予之辜惟良折狱若终身可行曰其恕有德惟刑是资丹笔之春以广紫云之训併镇临於统境兼节制於连营天落丝纶昼行锦绣褰帷以广视听想父老之聚观登车而志激清闻吏民之耸动岂惟万物之吐气遂令千里之宅生山为翠浪水作玉虹式布宣于寛大花入紫薇柳连青琐行趣召於禁严遂以中庸大学之书入贊庆历元佑之治某银津冷????铁砚寒生十年读书不可谓无心於学一行作吏竟莫能换骨而仙徒慨慕乎古人颇见怜于诸老为饥所迫试令此来汤火既极于煎熬疮痍又难于摩拊幸逢绣斧之直指法当弩矢以前驱往拜崇台有随柳傍花之乐愿传心印便吟风弄月而归仰止高山有如白水

贺印安抚除枢密都承旨江西帅

显奉明纶宏开大阍天枢维斗班通霄汉之间军声如雷欢动江淮之表帅垣既建敌胆自寒某官儒而知兵仁必有勇二难兄弟真为万里长城一时公卿不恃千羣武骑慷慨赴功名之会笑谈清边鄙之尘遙观厥成卓有所立方敌兵之飞渡致鄂渚之重围环而攻之直有鞬鐵趯倒之意确不拔也谁收只轮弗反之功惟内有贤牧以固军民之情惟外有肤使以趣水陆之陈翕貔貅之贾勇息鸿雁之哀鸣韩愈传宣遂解深州之难李回督战立成三镇之勲由今而观视古何媿上蓬莱殿宜侍翠华黄屋之傍驻琵琶亭犹坐碧油红旆之下遥导机廷之旨诞增帅府之光岂但为第二层之规模要当立上一着之根本必如陶侍中之机鑒必如羊荊州之绥怀必收人心必壮形势总十国而为连帅方重事权率三军以定中原式观远略某尝蒙軫念欣隶走趋吾皇皇将何之自甘流滞视耿耿者尚在未忍沈冥观鈇钺之遙临属囊鞬

而请事杀贼奴取金印顾虽非天下之奇磨盾鼻草檄书政可说军中之乐第陈忱惴敢略佞
谀

贺李都大

辍班立玉持节铸金赞会计於版曹增晖郎宿主阜通于圜府又焕使星昔辱出于师门今忝
陪于辩幕抠衣前贺衔袖具陈某官两朝文献之英四海典型之老斗牛宝气所稟得造化之
清凤凰羽仪其出为国家之瑞顾前辈凋零之甚矣独後林突兀以障之固尝裨赞钧衡综核
国政亦且参陪幕府谙练戎机历麾节者几迁佚园林兮累岁天固留之为耆壽俊国亦幸哉
有魁杰儒比驰原隰之六丝往访潇湘之八景动摇山岳衆方仰于丹轺庆会风云思趣还于
粉署虽申昔命实表殊恩观日鼓于洪鑪遡山积于朽贯於惟宿望素穆具瞻诵周访落之诗
属更图于新政听唐供奉之典矧寢少于旧臣上方畴咨史有故实炭陰阳铜万物式彰坏冶
之勲霖旱岁舟巨川行广钧陶之业某夙尝严事羞更重陈交大雅大忠辱深谅平生之素念
小慙小好尚未明力学之方甘安铅槧以校书乃缀铜曹而赞画当某戒书册祇戍之日适公
持英蕩出使之时若有天焉孰为地者故园桃李自欣春色之重来晚节栢松誓共岁寒而不
改第严修饬祇服驰驱

贺李提举

皇华司庾紫气随车一道瞻为福之星光为东壁六月遇可书之雨润溥西江念昔忝于侍朝
幸今依於属部具严削牒往候建台某官六馆儒宗九霄奎宿庐山高几千仞挺生人物之英
太白後三百年远绍文章之???不入洛蜀诸贤之党宛有乾淳大老之风共为名流夙载华问
清藜照夜已邻碧落星辰阜盖行春乃赋苍州烟雨试数近日循良之牧孰知当世慈惠之师
治状既彻宸旒恩旨遂迁簞节驰一棹传风行江右山川求千斯仓欢动田间父老时和已协
入境之始年登可卜揽辔之余歛散适宜激清有伟然时事正难於经济而清朝方倚于弼谐
为提举而活饥民固愿继紫阳之政绩位宰相而识大体盍亟恢文靖之家声丕阐儒猷式扶
世运某耕闲有味起废无心为南丰香而一来森兵何乐负东篱菊而再出食粳粗甘欢传驾
牡之新臆共听鸡之旧服在趋走惠彻底存消田里叹愁当勉效民庸之课闻山岳摇动终尚
希使指之寬

又

肃拥皇华来询红腐东壁之星主图籍曾是望郎西江之水活斗升新迎肤使曩幸接同朝之
步武今恪恭属部之等威褰帷所临骑屋争覩某官璧水儒英之杰出庐山僊侶之重来先朝
重李昉曰善人典型是侶前辈称文靖为名相学术可传仰平生抱负之不凡信所学宏深而
有用谓时贤多持论者徒言窥姚姒逮庄骚若吾儒不知政焉何必引夔龙陈尧舜是以甫班
学馆则去而佐岳才登秘邱则出以典藩流略兼该体用具备帝深嘉於郡最诏特畀乎使华
盖江右当千里旱之余地力瘁矣使田间无三年蓄之恃民命伊何上廛顾忧妙选諏度惟明
指固莫先於敛散而先声则尤系於激扬晦翁为浙右之行式观伟绩张相自京西而召丕对

殊褒遂挾丰年归报明主某违离輶轂困蹢林邱滹澠淒涼永矣断人生之乐土草簞啗居然忘尘世之思清朝未忍於弃捐便郡仍叨於关决絶叹贅员之落莫忽欣行部之照临记尝陪汉阙之衣冠幸今事周原之丝轡非敢恃旧知而攀附正深虞新令之森严挂笏看山其敢效晋人之放饮酒按事终尚希冀部之寬

贺安抚卢尚书

起镇价藩宏开大阬班高八座本北斗喉舌之司权重十连临南昌?带之地忝佐偏城而受察敢于记府以通名某官其学为诸儒之宗所立在胜流之日严霜烈日中涵天地之和威凤祥麇出作东南之瑞标准一世羽仪两朝凡闻梅坡之名真若泰山之重识其小者仅夸余事之文章见而知之当考平生之节概挥豪琐闥曳履禁班可继袁高李藩之风能典伯夷后夔之事谓且践台斗而上矣胡遽卷霖雨而去之然嘉谋嘉猷上方思于启沃而至清至直衆咸息其退闲诞放丝纶俾立牙纛接衡庐分翼轸欢迎仁牧之来说礼乐敦诗书丕聳元戎之令惟是时事之艰棘正赖儒术之经纶欧阳修何处得来式观谋断慕容恪为忧方大有赖折冲听笳鼓之归来步玃衡而直上某苦无奇节薄有虚名綴慈恩塔上之题悦疑隔山厠贞元朝士之列已是中年明时未忍于弃捐便郡仍叨於关决堪嗟淹滞喜际照临辄自布其腹心敢僭希于羽翼共月千里谁怜吏隐之寂寥得厦万间终托帅垣之寬大

贺鍾运使

观风驾牡练日滌龟自江以西咸仰激清之略从天而下有隆飞挽之权昔尝忝于走趋今复私於临照是严削牍以贺建台某官有愤世疾衰之心有学道爱人之政节操氷檠直欲障流俗之澜号令风霜端足落奸谀之胆顷辞紧路来守偏城听断精明吏饗摧折拊摩切至民气发舒其敏足以剗剧而拨烦其廉足以律贪而起懦条教肃而大姓不得以朘贫弱绳束急而羣譁不得以贼善良以至弛盐禁以便民出帑藏以惠士凡此异政俱可大书帝嘉渤海潁川之庸峻迂篤节公辞淮右湘南之役甘遁里门兹移奎壁之躔来隶斗牛之野虽无心于浪出奈有旨以趣行必将酌缓急以通转输权有无而通采餉聳动一道激昂羣心画栋鸣銮方欢迎於肤使红云立鹄会入筵於侍臣某涉世似痴信书成误壮年意气欲驱驰天地之间中岁功名觉沈堕尘埃之境

贺费总领除将作监

峻陞繕监巍建总台幹江淮之赋渊连营给足寬东南之民力数道欢呼辱隶照临僭陈庆幸某官天西瑞气斗北大名老泉论事而比贾生精通世务师鲁知兵而从魏国谙练戎机所立焕乎前规其学根於絜矩固尝更迭麾节谈笑鎡基山岳动摇应东国福星之见川云飞泳喜西山爽气之回朝武寢穹使华有耀适鏐鎡之未靖觉调食之孔艰万竈云屯炊沙之饱难恃千金日费破釜之策何时军声欲解於□□王事少烦於苞栩爰领外农之寄仍迁大匠之班王人所临边兵咸喜刘晏画笏算鞭之智亦可行乎陈恕题版押字之规正优为耳但使木牛之相踵会看铁骑之和飞随笳鼓以归来步枢衡而稳上某夙怀奋厉窃叹栖迟有味扶?颇自

适寬闲之野无心怀綬乃强临凋陋之邦兹幸事於通儒諒俛矜于拙守湟中之粟万斛愿寬程督之威杜陵之厦千间终赖覆全之賜

贺孙提刑

衣綉祥刑褰帷问俗青绫夜直方催北阙之朝丹笔春流丕暢西江之福风霜高洁原隰光华某官端厚而高明疏通而详练出尘标韵旁薄於玉京十二楼之间满腹精神流动于监湖三百顷之上才望夙推於俊伟文章是特其绪余践敷华资培植远器贰郡歌騰於沂海立朝班峻於太微自请汉符肯临蕃国清香卫戟御屏侈循良之书紫界宫墙优诏趣望郎之入乃就放於使节俾巍建於刑台盖惟江右憔悴之氓居多茹枉须赖天下端直之彦庶可洗冤六轡所临十城丕聳必将奉宣帝旨慰恻民情振风采以戢奸贪严教条以束豪猾威棱既肃刑政自平毋使一夫之向隅当令万物之吐气风酣章贡姑少驻於翠輶云近蓬萊遄催登於紫禁某奋身寒苦与俗酸咸臆当年鵷鹭之行悦疑隔世负终身乌鸟之养空抱余悲清朝未忍於弃捐便郡仍叨於佐貳堪嗟淹滯喜际照临辄自布其腹心敢僭希於羽翼深慙不竞负濂溪夫子之家声所愿前趋师泰山先生之正学

贺建昌魏守转官因任

恩来褒玺名在御屏河南治平之声冠於列郡胶东劳来之赏賁自九霄既迁文品之崇式表藩条之焕某官儒雅饰吏平易近民生贵游家无尘柄唾壶之习凜清白操有囊萤雪案之功倦熏画省之香来领红泉之胜埽空吏蠹劝课农桑二千石惟良寢以诗书之泽十万户受福霽然田里之春乃增秩以示恩仍凝香而因任关中既留萧相喜遂所依朝廷深知弱翁行闻有召即繇选表入陟论思某欣听除纶阻趋贺庑天子明见万里共赞先皇之知人刺史入为三公愿继汉朝之盛事

贺魏建昌改知袁州

疏恩晓殿移镇春台碧涧铜陵正蕩袴襦之咏紫泥金印又催旌旆之行地望采崇事权增重某官谦以自牧和而不流笏比甘棠克增光於祖烈国非乔木盖有谓於世臣由省府之握兰来盱城而分竹民依爱日吏立薄冰方兹蹈德而咏仁何期以大而易小虽仍饮西江之水觉难亲北斗之光羣儿迎细侯尚想无边之风月二州争杜老莫留有脚之阳春第弱翁深得於见知恐寇恂未容於久借不烦席煖又拜诏温森戟凝香更布宣於寬大簪笔持橐遄峻陟於禁严某莫造宾閤敬修贺幅鵬鹏运海悵难逐於扶摇犬马恋轩终尚祈於顾盼

贺钱建昌除直秘阁

课绩名城通班邃阁图书寓直於东壁朝武寢高旌麾留镇於南吁藩维增重诏鸦翻湿寢燕凝香某官寬以有容威而不猛发奸若赵广汉吏莫能欺击强如诸葛丰民有所恃桑麻千里襦袴万家微而残疾疲癯举无叹息愁恨民曰太守器能真当世之少双帝有恩言政事为所

部之第一峻迁中祕式表外庸金阙碧门遥接蓬莱之云气枫林楚水遡闻长乐之钟声某欣听褒纶阻趋贺庑宣室已思贾谊虽喜见於席前河内愿借寇恂幸姑迟于玺召

贺方寺丞除知建昌

觀天子所佩太守符衣冠拜紫宸亲奉九重之问兵卫森画戟试行千里之春窃自贺於照临实不胜其幸会欢迎五马远致双鱼某官文献相承风流是倡引夔龙陈尧舜尝吐露於昌言窥姚姒逮庄骚克表章於世学窃观新史历载名臣当端平间豁陰气而开日月伟铁庵老撻鯁论以抗雷霆由平生言论而观皆斯世纲常所系历陈几疏独奋孤忠四方传诵其奏篇万代深嘉其名节是生令德丕阐先猷适时吁母之江適资良牧仪图召父之政畴若端人将出拥於旌麾先入瞻於旒扆得循吏布郡国有同汉室之盛时诏刺史至京师爰举唐朝之故事想见殿廷之对务求田里之安仁声载驰羣听丕耸儿童候郭汲虽共欣阜盖之来君王问长卿恐留侍红云之侧某昔曾拜履今喜开藩埃及境以前迎豫飭函而往贺作中和之歌颂已沸欢谣宣寬大之诏书式观新政

贺段南安移镇建昌

朱轡移镇紫气随车襦袴腾歌春意满梅萼之国旌麾改观恩光新竹使之符栖身幸在於为僚顿首敢恭於执贄某官本领袖材具恢宏心如明镜之当空奸邪惕若家有怒笏之传世忠义凜然其学则根乎典谟其政则行乎江浙蚤合鵷行之綴游劳鳧舄之飞凤闻诸老公言雅敬大贤伟节谓顾凯之为剧邑宰勇於爱民谓富郑公当新法行刚不奉诏一端甚美千载可书划天日之开明俨风云之际会意且近积星而上矣何遽远层霄而去之乃奉十行寬大之书而播千里治平之政发奸摘伏峒落震惊醒瞶膏萎田里欣畅德化既深於横浦仁声转入於吁江窃惟圣朝岂不望明公之入言念凋瘵正渴思贤牧之来姑烦汲汲以拊摩宁使徐徐而朝觀会有政绩大书贞观屏风遡近清光亲给天章笔札

贺建昌柴通判

入朝天阙出拥星屏乘柯山云霓而来光生朱戟分吁水风月之半喜动画堂自欣列属以为僚敢僭代庖而护篆栖身庇覆顿首候迎某官志业昭融器能恢伟笔端有口吐五千书传之香胷次无尘锤万叠谿山之秀簪黻晖煌於奕世埶箴倡和於明时垂髫试中书堂盈箱尽读唾手取进士第挥翰如飞定当寘台阁之间乃荐劳州县之内既飞鳧之直上犹展骥之平迁信知儒者安行之规不为世俗速化之举吁为支垒故自存曾李之书公驾别车端足佐龚黄之政然时事正艰於经济而清朝方急於招来言观温纶靡待煖席某奋身良苦为学亦迂每嗟勋业之栖迟滥魁晚榜空阅年华之晼晚来坐寒毡适逢关决之虚强任摄承之责方虞躐等窃喜戒严敢敬摯於笺函冀亟驱於驹从遥瞻紫气行当奉印绶而还愿挹春风凉许侍屏篁之坐

水云村藁卷九

卷十

钦定四库全书

水云村藁卷十

元 刘埙 撰

启下

代友上太守求辟

凝苏州燕寝之香承流有伟对蓝田鹜行之立居摄何庸昔未契於登龙兹僭希於附骥遂修小楷以叩大钧某空抱古心素无奇骨少时鐙火颇睥睨於文場壯日尘埃竟低徊於俗轍值豕蛇之蹂躪随鸿雁之流离命也奈何心之忧矣国破而山河在叹身寄於异乡城是而人民非空梦怀乎故宇一行作吏再转为丞闻之诸老海言厉以古人事业我心匪石惟履正以奉公衆口铄金乃为法而受恶肺肝洞见颊舌难争幸有为推轂之谋俾来试代庖之技吾斯未信若将惊曲於伤弓人亦有言讵可因噎而废食方重西江涸轍之苦敬为南丰瓣香而来见交朋竞相勉以新图谓前政已不该於旧职昉兹虚席曷勿改弦虽太守不可干无容出位然真王何用假妄欲正名惠冀陶熔就加剌奏舍皇甫而取居易抑又何嫌荐文举而辟慈明亦知无靳辄忘自售遂尔长鸣判府以世伟人为郡良牧半符分竹奉行寬大之书四境耕桑鼓舞治平之政相业将传于衣鉢民歌已沸於袴襦方恢夹帑之储尤軫同袍之念尚私造化施及么微失一老兵得一老兵傥成身之有望遇以国土报以国土誓没齿以无忘

混补中太学谢运使

雪案穷经几叹平沈於塲屋星台校士例蒙荐送於桥门被明君乐育之仁由肤使吹嘘之力抠衣以谢衔袖惟?某陋巷簞瓢穷年鐙火数寸管盈尺纸久无当世之知六国印二顷田每慨古人之志虽尝充宾而观国未能换骨以成僊鼓瑟於好竽之时不谐已甚戴笠於乘车之侧见弃宜然属当以喜以惧之年岂无为养为贫之志然功名路左何翅隔弱水而望蓬莱且幽忧味深安得梦钧天而游帝所我之怀矣命也奈何适公朝之议欲广羣才举京师之试悉归诸道既省买珠之费孰无献玉之思来从姑山直上滕阁第知小敌怯大敌勇何惧万人杰千人英咸疑寒谷之黍迟忽觉冷灰之豆爆謹驰榜帖喜动庭闱礼仪三百威仪三千且不孤於家学初是什三终是什五姑勿恤於浮言意其遂显扬之心是以有幸踰之幸孙业鼓篋即为帝学之诸生教子明经差慰高堂之二老不妨奇特稳趁扶摇都运侍郎武城名家甘泉法从昼锦行部荐增粉杜之光昕陞畴庸宠畀松阶之峻共惟先正有伟清名魁躔尚见於輝煌世官克宣於久大兹烦劝驾遄趣归班致令桑梓之微亦沾菁莪之数孰云朽腐忽尔神奇某敢不腾蹻天庠激昂风节举幡叱六馆士慨想何蕃之忠弄笔貽三子羞敢负盱江之训

谢庙堂给假

元宰施恩曲怜羈困孤生銜恤暂释繁维还家遂负土之情出命由转钧之造惠均存没感极高深伏念某志攀龙鳞福轻蝉翼强支衰冷门户颇思激昂欣际清明朝廷荐叨启拟忽自天而擿福诚无地以诉冤集的腾章披?受责方风涛飞千仞而上殆性命寄半缕之间所幸天王明圣公卿笃厚顾朝纲关系虽重违霜简之言及造化斡回止近徙春台之境然受譴固非荒远难居之所而抱痛则异寻常负戾之人当其雷霆震惊闻者为之落胆俄而滃滃凄断怆然几致殒身祸机交迫乎一时逆境真成於万状使至此极不如无生几筵长辞举室皆爲掩泣衰絰赴贬行路莫不兴哀回首三年冥心一默虺蜉援絶分永弃於累囚乌鸟情鍾痛未安於卜兆流涕叹青山之远抚膺嗟素韞之终?惟庙堂寬绳束以待谪籍载在禋赦许谒告以葬亲丧陈情甫彻於六符予假讫寬於三月方将披荆榛而营冢隧植松檟以蔽阡原辽东之鹤来归浑疑梦里巴西之魔获放永戴恩私惟公所施与宋无极兹盖大丞相身佩军国手运乾坤以仁厚赞威福之权延洪社稷以忠义立勋名之本昭揭旗常每兴悯於流人俾自全於盛世谓御史执国法宁无风霜肃杀之威而大臣育人材当广天地发生之德俾克襄於大事获暂反於故乡某永誓糜捐重伸归倚所冀寬慈之量就施解纵之仁当此生中傥未答成身之赐尽未来世亦必酬造物之恩此语或诬彼苍可鉴

谢雷安抚辟充帅参

依夫子宫墙夙归化治陪元戎幕府允出礼罗甫被命於钧天亟攄忱於恩地卵翼其造手额知归某崛起单平勇思植立韩王谓道理最大服膺是言晋人云州县徒劳强顏以仕居常奋厉求实职业深耻矫亢窃虚名声然而问剑抵掌之雄固慙马武当走檄飞书之任亦媿枚臯分平沈於常科忽巧逢於元造殷勤说项特达荐韩内而翱翔学省之班出则关决山水之郡比解绶而归故里盍杜门而理旧书念人生盛时岂忍自同於草木况士遇知己亦欲少报於丝毫既着主家衣裳岂傍谁人门户方将九顿首而请已施一举手之仁天落除书俾陪鈇钺地居元幕堪赋鐙棊

谢吴提刑特荐

四牡劳使臣之功将催召驾一鶚腾荐士之表猥及别车轩然特异之知伟甚不求之获允谓奇事可无谢言?惟明台实号激按之任凡我属部以受荐举为荣欲旌别以报圣明宜简拔而得奇俊顾如某者何若人哉老色渐分已消尽英雄之气壮心未已欲独垂天地之间览流涕太息之疏而伤怀受抱膝长啸之吟而抵掌谓苟可以及物初何拘於择官起从空山来佐偏奎访麻姑方乎旧隐玩泰伯子固遗文闭户读书奚暇计寒饿之水火研朱点易颇欲窥广大之乾坤诸老深谅其持躬当路间委之决事奉三尺法每思特立以独行寓一分寬幸免羣嘲而衆怒顷荷崇台之出檄俾行邻境以虑囚乡人好恶何如两难於处天下道理最大壹断以公第求不负於平亭何敢僭希於赏识行部独悬清鉴腾章靡弃凡材决狱中情公过褒矣遇事能断仆敢当哉锵然韶钧之鸣过於鼎吕之重兹盖提刑秘阁五云绚彩万壑凌清详猷多功玉节驻斗牛之分陶熔有造金丹换鸡犬之僊似俛念於湮沈故特加乎披拂慨然推轂光

此题與某敢不祇佩隆知益坚素履幸入古灵之橐足重此生不叛韩子之门请观他日

上吕都大求举

熔台天近宝光上映斗间辩幕地遥金跃?归冶内幸在六路提封之数敢私一陶播物之恩冒然叫呼冀於造就窃惟士皆欲附名世人必有待先容元献知遇希文端自沂公之汲引欧阳獎进介甫亦由子固之推扬气类一时风流干载乃若说项既无旁噪荐韩又乏里言不自陈之其谁知者某素短奇谲空持拙迂读圣人书颇亦识其大者登进士第乃以困而得之每嗟万物之皆尘当思一命之及物入芙蓉府孜孜备竭忠劳问桃李蹊落落浑无主意当路虽加之刮目选坑岂易以腾身洪惟崇台所统几半天下凡我属部相与求入彀中矧荐额素寬宜痴心有望因念曩奉秋风之檄尝幸获亲霁月之晖官烛风帘尚忆夜堂星聚宝储玉节或怜幽谷黍迟虽隔龙猪妄希鸞鶚都大宝谟典型诸老经济通儒入登农雁之司月班清峻出总園府之任駟传光华宸旒渴想老成笔橐将还严近尤笃同袍之好常恢推轂之仁遂及我私愿窃有请亦既在鸞飞鱼跃之内所愿附牛□马勃之余吕公为相善用人傥垂恩而东拔何蕃正色不从乱誓尽节以报酬吁天而言指日以俟

再举谢段知军

朝廷右文聿求奇士郡国论秀又及陈人秋风姑慰其寂寥春色顿回於顛顚虽非差事敢废谢言某起从单寒妄慕高远更生昼观书夜观象心实忧时武惠左执印右执戈志期用世虽尝充宾而观国未能换骨以成僊念壮夫工篆刻之词聊复尔耳以科举妨义理之学岂所欲哉揭元龙百尺之楼聚邺侯三万之轴交韵人胜士竞勉以千载而自期游名山大川亦深思一试之可厌徒以亲年逾迈已志未伸从容随战蚁之尘慷慨动落鵬之兴汉将军出塞漠幸尔成功唐学士登瀛洲居然充数唤醒十年旧梦彊开万里修程疏景暗香问逋仙之无恙红尘紫陌笑刘郎之又来虽曰侥踰距非奇特判府真循良守为君子儒平易近民四境相安而成俗忠信劝士一榜多见於得人明扬韦布之精神勇赴衣冠之期会某敢不力惩奔北期趁图南窃慕昔人谓温饱非平生之志所冀异日愿功名成远大之猷耻循噉嚙姑陈梗槩

谢监试通判

圣主揆贤择新进士魁儒护试得旧门生昔未尝造请於公庭今亦非称谢於私室漫循彝典用摯斐文某起从?鉏误学书剑抚六经陈蹟厥有深思争一时虚名每成自笑早游场屋尝辱监衡方执鞭属橐而前自分禹门之鯢化及弃甲曳兵而走竟作宋都之鷁飞盍归来乎短檠可奈何兮长铗以科举妨义理之学夫岂本心如壮夫工篆刻之词亦怀媿色适别车之来泣喜广厦之可依子来见我乎岂不愿亲於臯坐人言可畏也第当力戒於瓜田所恃堂下见蔑之心不讶庭中无愈之蹟

谢州郡劝榘差充金幕

倒廩应公家之急幸追严诛走檄假议幕之荣猥叨华獎增户门之辉映动闾里之传夸顿首凝香笺心銜里某深居山泽薄有田园颇慕少游称善人故每奉太守都吏之条教莫效鲁连为国士故惟听里胥亭长之指呼思先世剏业之孔艰凡平日奉公之尤谨有来使命谓乏军储俾为实粟之图以继泛舟之役人非卜式焉得输财而助边世乏子文孰肯毁家而纾国况盱南当千里旱而後彼田间无三年蓄之存宁有积仓可供公廩然而良二千石薰然如召父之慈福十万家乐只歌岑君之化当酌缓急通融之谊式昭公私体恤之心顺流而东非有万□连檣之献从天而下遽膺一纸十部之班俾由民伍之卑径齿议曹之末惟通有无於上下之际本皆职分当然若论施报於官民之间殆似等威不辨固知忠信所以劝士然而名器不可假人虽则浮荣宁非奇事判府诸王孙之贵介郡刺史之循良来临小有洞天成渤海颍川之化重见太平官府如元康地节之间偶当郡计筑底之余深軫军食乏兴之虑命之输粟褒以泛莲某祇服宠光永铭恩纪清香画戟如今足庇於震凌茅屋苍苔从此甘安於耕凿

混补试中谢运使陈吏部

雪案臞儒低徊场屋星台肤使吹送桥门借桃李之恩光采菲葑之下体抠衣往谢衔袖具陈於惟我朝度越前代六馆突兀率聚养於英豪三舍选抡多贮储於公辅十四圣流传美意几千人成就大名逢明主之右文辟贤关而升俊十行下诏数路得人宜求博达经世之儒何取椎鲁不文之士如某者风霜容頽灯火梦孤壮志激昂颇亦自矜寸管流年晚晚居然坐阅千颿精神疲敝於三日之文意气销沈於四诗之学蹋秋槐共已屡折僊桂以何艰窃尝泣黄卷而问天悔不买緑蓑而耕雨伤嗟垂掖羞缩中眉适公朝之议欲广羣材举成均之试悉归诸道既省买珠之费孰无献玉之思扁舟下盱母之江斗酒上滕王之阁挟书□而贾勇整文陈以前驱弄翰操觚颇识诗人兴致之远造车合辙敢期有司裁鉴之精正怜寒谷黍迟忽觉冷灰豆爆便辞下土径到钧天矧叔侄之竝游尤朋侪之共赏太学生辞家射策谁启亨几清诏使揽轡登车实司文炳风雷变化星斗光芒都运吏部三山魁杰之儒四海耆英之老号佳吏部盖尝集北斗而骑驎为健监司方且邀西江而活鲋追忆当年鼓篋许令此士传衣俾小草之出山同菁莪之在沚某敢不磨厉风操腾蹋天庠念骑省故家虽粗习文章小技入古灵荐橐尚勉思节谊大闲

贺宰执正旦

三朝元会将回青龠之春四近辅臣独侍红云之表协扶熙运丕辑蕃禧某官气鍾阳和名揭昼日谋王体断国论蚤简宸衷究皇仪展帝容独持政柄亲被银罍之赐永观金鼎之调某行即解摩及逢换历千林有喜窃自叹於岁寒一气转钧尚密回乎生意

贺侍从正旦

风转青旗岁又逢於作噩云连紫禁班独峻乎文昌伟魁杰人膺炽昌福某官胷中太极笔底阳春金?玉珂密连芳於法从银罍翠琯亲拜赐於君王巍步星辰早施霖雨某解麾将代换历有慙芙蓉不向於东风自怜顛顚江梅愿依於朝露尚借发生

回太守惠壽词

露电余年宁复久生之羨宮商雅韵宠貽初度之褒借卫戟垂光添門弧喜色判府儒雅飾吏平易近民鳳凰行集於潁川欢传召玺龟鶴相期於壽域特制新腔句麗阳春氣增晚莫蕭蕭白髮忽聞正始之音寂寂紅牙難品清平之調某第瞻凝燕莫效續貂少太公三年自知耄矣頌魯侯千歲還以報之采積感衷曷抒謝語

謝郡宴致語

一牛橫笛方欣受許子之千騎專城乃辱設穆生之醴荷君侯寵遇覺樵牧傳夸判府東陽文章之家西京循良之吏秩中二千石試皐蓋之行春曾百萬兵報紅旗之破賊既肅清狐兔亦安集雁鴻適帶裘整暇之時宜尊俎從容之樂謂古者存問遺老蓋敬高年謂諸侯不臣寓公特加異禮肆啟黃堂之宴倍添白髮之光揮哲匠雄文托伶工俳語从太守游而乐欣聆歌管之和均笑山翁醉似泥不覺纶巾之傾倒

賀錢守生辰

天開瑞節月紀誕辰入千歲為春式占遐筭十萬戶受福丕霽欢声适又對於垂弧行入躋於持橐某僭陳頌語阻綴賀班欲永歌之恐難入紅牙之拍為此詩者愿常觀綠鬢之新

回黃堂長投獻

捧檄錄囚暫寓弦歌之治峩冠枉駕遽同翰墨之盟便相忘一見之初真不啻三生之遇有文相接陳誼甚高堂長丰骨昂藏詞華奇怪宜州太史之裔必昌於詩南丰先生之鄉忽有此士諒欲黼黻乎王度奚為領袖於湖庠嬉笑怒罵皆成文章何軒騰之小晚趨趨嚟嚟羞處汚蕤信抱負之不凡見諸公咸稱之謂一第特溷耳孤鐙窻下毋忘黃卷討論羣玉峯閑曾掌丹鉛點勘某竭來折獄虛枉貽緘相遇邂逅而子偕臧知為善士多有平反而毋必喜自愧古人虽即言還尚圖往謝

謝陳總領惠壽词

年華尚晚痴頑恋駒隙之陰韵語生春流麗援鶴山之譜交情无斁初度有光總領戶部魁儒嫡傳王人雅望書破萬卷每鑄出偉詞文成一家獨埽空衆作遊戲小有丹霞之鏡归来甘泉上雍之班兴念陳人适臨生旦度尊前白雪溜亮宮商剪水上浮雲淋漓翰墨華哉短韵期以長年某方禱山川莫垂弧矢傳來樂府虽難期銅狄之齡流入教坊应可品玉簫之調

通判回諸縣賀滿考

共千里月愧莫積於年勞飛五朶雲辱過褒其歲最蒙成幸矣稱賀宜乎每惟迟鈍之踪深負

平分之寄汤火交迫第怀玩愒之羞泉石自佳宁有啸咏之乐蹉跎累日侥幸及期敢图宰邑之贤特轸同僚之谊念司马青衫老去幸免旷瘵辱谏议白绢飞来曲相獎饰九顿圭诵一意篆铭第既忝郡股肱正自赖公羽翼动陶园松菊之兴尚远戍期借潘县桃李之春允资寅协

招陈总领会

夙幸登门每厯县榻天下士惟陈正字信足当涪翁之言山中友劝老东坡久欲效黄人之饮兹卜月圆之夕正逢秋立之期泛埽行窝欸延都骑愿振飞霞之佩庶聆屑玉之谈

回罗检阅求书入京

猥荷深情宠贻妙语志在千里喜将赋子长之游文成一家初何待孔融之荐意者游戏翰墨居然宠畀琳琅检阅昭谏诗材公远仙韵城南鐙火颇闻警悟於昨非笔下波澜时见流传於近作破除湖海豪气亲炙文章巨公然且自怜虞翻之屯恨无知已盖有争说项斯之善惜未逢时乃今不憚山川阻修而欲往观京阙壮丽脱穎而出诸公定放一头挥翰如飞即日会逢具眼某素加心敬苦恨力微窃幸有志之竟成敢不以言而为赠辞家好去未须动庄舄之吟得意归来定见佩苏秦之印薄相从與未写绸缪

贺翁中书知贑州

诞膺温诏出镇巨藩岳牧用词人辍红药苍苔之步儿童迎太守回玉虹翠浪之春千里宅生万物吐气某欣闻涤篆莫遂拜庭顾比辱於貽笺且重厯於致馈敢因庆语就控谢衷送司业酒钱自惊暴富依杜陵夏屋犹赖庇寒

代谢送物赴试

浪游南浦正怯望洋送上西雍猥厯借润璀璨饯行之觥殷勤助噪之言拜嘉堪醉於潏红贾勇无愁於曳白第慚不振恐负相期仰天大笑出门吾无患矣入学孙业鼓篋君其许之感哉未央敷陈曷既

代贺赵京尹生辰

铜陵石磴之地清实鍾间气玉露春风之秋早喜际诞辰爰集懽声肃陈善颂某官斗间瑞采天上灵根都民腾前赵之歌尚思神政诗人咏保鲁之寿永重宗盟春动彩庭恩来紫禁某幸依仁里盍诣庆闕属方倚於药鑪遂莫扶於壽罍进长生曲虽媿非白雪之音祝不老僊愿永见朱顏之润

代送车新昌赴任

鼎来迓骑趣驾飞鳧花景一帘坐想弹琴而治芝亭百里又传制锦之新靡待政成即闻诏召某莫陈祖宴辄贡赆仪因緬思乎旧游怅已成於陈蹟媿无遗爱顾扬秕之怀羞倪有余情尚匿瑕之是望

代邹倅任满经从招会

海沂歌满行趣簞鵷泉间地佳小烦驻马方欲少叙子孙之好诂容弗尽宾主之情辄拟诒朝僭邀卜昼作文字饮虽无楚舞劝酬待老成人定有萧规授受愿言临贲用笃交承

代回乡举诸贡元

独提健笔伟新刃之发硎勇夺荐书俨轻车之就道盛传秋捷大旦评某人经明行修声飞实茂【赋云赋声摩空书眼如月】品流高胜信红泉碧涧所鍾意气豪雄以黄榜緑袍自许已看横鹗会应龟某忝此分麾幸哉劝驾辱戎冠而枉顾惊衿袖之暗投希夷谓天地间无全名所愿力培於远业挺之云科举外有理学幸毋自足於斯文相期者深是所以报

代回漕魁赵主簿投谢

名芳镂牒伟甚仇栖文压镇厅居然祢荐喜报冰台魁捷祥开天陞牖传判簿学入几深文多神变被飞龙新渥早列簪纓慕题雁荣观克勤笔砚若昔名父尝夺儒科景运又逢成年世胄定登甲榜重书淡墨真同辽鹤归来稳趁飞黄行见溟鵬直上某猥厯临访虚辱谦词云云

代邹连州经从招会

解组价藩还锦乡社旌麾临宠荷不遗先世之交尊俎献勤僭欲叙通家之好辄以翊日迎於下风举酒细论值桂华竞放聯鑣枉顾瞻棣鄂相輝

代回黄堂长贺冬

阳回缊室有开吾道之亨春入书帙丕衍斯文之福聿来华翰如挹高标某人雄辨生风老柯雪少年能赋剪裁天上之云晚节耽书组织胷中之绣对灰飞於葭管看恩下於蒲轮某欣承庆言倍感高谊何当会面共浮竹叶之觴姑此写心为寄梅花之驿

代知县再任招客

久矣赋归居然因任重上八节滩之险拊髀自怜空怀五斗米之羞脱身无计欲邀福於寅协期听海之丁宁爰卜明朝欲修小集非敢饰豆觴之宴盖觊闻药石之规

又

再鼓听逾淡已无高山流水之音万间顔俱欢又托凌雨震风之庇辄涓翊日祇屈飞霞非欲
事於虚文盖图商乎实政技止此耳孰怜重涉於峻滩忠勿悔乎尚俾早离于沸鼎

又

水益深火益热欲脱去而不能监之明衡之平於听断乎何取徒赖鸣珂之贵或怜沸鼎之难
敢敬布其腹心愿相为於羽翼辄涓明日祇屈飞霞

又

智穷力竭不堪面具再呈政拙心劳那得戏衫善脱所幸邹鲁之俗居多董贾之贤必有忠规
裨此实政辄涓翊日祇屈飞霞

代回魁星醮请拈香

问秋风消息已愧陈人挹杓宿光芒愿陪胜彦肃拜裁云之翰欣闻涓日之期当展敬於夜坛
冀聯题於春榜步虚声里豫占来岁胪传集英殿前共叱今朝魁讖

贺娶妇

庆袭鲤庭吉谐凤卜孔雀屏芙蓉褥輝煌花夕門闌鸂鶒杓鸚鵡杯烂漫椿闈风月欣逢好事
薄贡贺仪

贺端午生辰

节临重午日纪生申蒲艾浮香正值锦标之揭桑蓬裘喜式增宝牒之晖凡与照临孰不欣快
僭陈微礼仰祝修龄齐国之生孟尝恪逢是日汉朝之诞胡传愿见同年

摯鲁山臧廉使

绣衣行部亲风采於大江以西素服拜庭望顔色於崇台之下积久愿瞻英槩投老始契奇逢
若有数存敢以文摯某官孟氏刚直之气孔门宏毅之材竖髻脊梁担当宇宙具法眼藏区别
正袞四海鲁山之名万仞乔岳之望自居廉察每志激清广汉发摘如神小民气吐葛丰刺举
不避大吏胆寒比福星重临即陰氛顿豁虽猿惊鹤怨不遂闲散而狐号鱣舞稍知伏藏方且
竭蹶暑行宣朝廷之钦恤振扬秋肃消田里之叹愁万口谈百年几见惟天地中间莫不顺兹
惟极治之朝然国家闲暇及是时犹有可陈之事若偏州下邑僻处尤疽根弊蠹多端傥明公
问俗不遗则他日更仆以对沈痼非常剂能瘳赖遇神医败局有妙着可寻正看国手此书生
好论事之癖恃君侯有容物之怀太平之期当今允宜建万世之策真儒之用无敌会见垂千
载之芳某場屋陈踪山林薄命所学甚苦徧参名輩大老之间於道无闻竟堕文人曲士之数

目昏头白心在力微有时自击缺壶未忍遽甘堕甑备员乡校授篆久闲遁迹里门着书自遣
乃幸迎於华使真见识於伟人三生结来有披雾睹天之快一语提醒便吟风弄月而归恍借
春晖足夸晚遇

养子启

江梅无实照孤景以自怜僊桂有香分一根而何幸敢通吉语愿践初盟恭惟簪纓世家实毓
阶庭奎秀咸称麒麟抱送之瑞卓尔不凡窃慕螟蛉速肖之功冒焉有请悦异日遂亲传之望
亦均受无别爱之憎三生因缘虽他人即如同姓一家庆幸谓此儿当兴吾宗奉币而请致书
以告

谢春谷学正惠壽词

年华逾六衰穉隐流水之邨韵语无双妙丽协满江之谱感宗盟意厚惜初度日非恭惟某官
正学为师多情爱友书破万卷每自铸伟词文成一家独埽空衆作游戏南吁军峯之境归来
东观石渠之班兴念陈人强推生旦度尊前白雪溜亮宫商翦水上红云【谓满江红也】淋
漓翰墨我辰安在君意故长某骇突如其来如欲福我兮壽我传来乐府荷期铜狄之龄流入
教坊可品玉箫之调薄言酬谢惠冀鉴融

代回夏友兰

某误被国恩冒沾世赏山城分月媿弗称於题輿艺苑挥云辱远贻於褒袞如见谏议之面足
知君子之心某官机鉴不凡器能自许与人为善粟万斛以救饥取友必端兰九畹而自媚襟
度湖海名声朝廷谓宜腾翔霄汉之班横金取贵然且宴适园林之趣怀玉久淹独崇笃交情
特铺张庆语红光照室白璧入怀某谨藏裘篋中容奉呈膝下秩六百石顾关决之无长厦千
万间尚庇全之有望未殫感谢且冀照临

回黄渠屋求复职

居广文舍杜门叹佳客之稀迎长者车衔袖增老夫之重丽词唾玉高义断金藁屋徵君龙首
华宗龟山正学笔锋銛利粲双剑神光腹笥丰盈蘊九峯秀气正厉看花之志俄兴离黍之悲
抱膝芹西敛元龙湖海之气着书藁畔乐渊明田园之居盖尝窥编摩钞纂之文固知为博洽
专勤之士昔来游庠序期私淑佩?铺张纸上之云云吐露胷中之郁郁然作阙实由旧政其责
备何豫後人事已久而难追时不利兮奚怨况一饭先书籍皆前定而靡待求虽五斗不折腰
恍有分则将亦获少安毋躁其终必还某徒虚辱雄文曷?酬嘉惠率尔而对语焉不详谓羊叔
子鹄人孰云知我就谢仁祖索食当亦怜君安得无情尚图见意

水云村藁卷十

卷十一

<集部,别集类,金至元,水云村藁>

钦定四库全书

水云村藁卷十一

元 刘埙 撰

书翰

答谿桂舟论铭文书

某辱赐书赐挽章意厚甚哀感弥甚某幼孤事先母四十年天怒其不能尽孝一旦夺之??畴依痛毒酸楚既葬既小祥思亲之泪未乾罪逆媿悔弗释也人事俱废不特取疏先生先生哀怜愁苦勤勤惠绥不孝孤曷克当谨忍泣叩首以谢高文下教若以某为可与於斯文者益佩深情承欲为邓尉作铭此意尤古阐幽垂远固朋友责故旧雕零中年增感某亦尝欲为三数知己发挥平生恨学浅笔力弱未能为先生幸慨然为之或辱教某以共为或互相为冀万一或有传也某固不善为倪先生教之或能为母问其传不传要亦尽吾心逾於不为耳窃尝谓古今文籍以来凡数千百载圣哲豪英凡数千万人声蹟磨灭富贵湮没所建立操挟乃无一足恃恃者数行之铭托之金石岁月悠长土草翳蚀石泐字漫乃亦复不足恃恃者文学之士录之书册昭垂不朽世无千年之石而有千年之书故乃世代寢远圣哲豪英犹可彷彿知其心想其人者以此近世韩欧曾王多为人作铭章虽其名甚微其铭刻已湮漫而後世閱其集犹知有其人者亦以此钜人硕士蘊抱瑰特不忍随世浮沉刮条振迅以自舒展或出意气立事业皇皇焉为民彝世教计期以久传者又恃有此也传不传不足计愿命之曰人与鸟兽异矣为其有足传也概曰不传不力於善为鬼蜮为梟镜为狐鼠为虎狼为天地蠹为民生贼倖以尧舜亦死桀纣亦死取快瞬息甘为愚鬼莫之恤是庄列氏怪诞陷人心之说吾圣贤位天地福生灵意不如是此春秋作而乱臣贼子惧也天地无全功能生人不能使斯人之有传传者以文章耳文章造化当与天地造化分功文章在世间顾可少哉熏天炙手翕赫震动曾不能当数十年日月之运寒暑之变炊粮未熟梦已觉矣回视平生竟何所得想见千载英魂亦自一笑惟陈编墨蹟炳然如见尔则文章在世间乃诚不可少矣而托文章以传者又必其人德义志节无忝铭笔乃幸或恃以传韩欧曾王节行配古人德业着当世世托之传者以此也乃亦不独文章也近世陋俗以名位求文章不揣其本署銜位列名氏直寸晷矜宠终不传也则又不若山林枯槁德义志节之士大公至正诛奸发潜如是而为之铭乃足恃以必传也夫其富贵权力之不足恃而赖金石以传金石不足恃而赖书册以传必传矣顾非德义志节有足恃文章亦不传也噫其难哉噫其难哉某自少从诸老学为铭章老矣而无成今先生志乎是而德义志节高隐山林乃适与某之言合而某亦山林枯槁也故愿相从以成其学焉哀疚中不作他文近为人铭二墓未知有合於盛意否也故因复书以请正焉某叩首再拜

内幅

近世铭笔推永嘉叶氏为宗某少之时因诸公宗尚尝熟复焉十数年来深味其文乃有不大愜於予心者往往崇华藻而乏高古不免止是近世文章尔若夫独步千古方驾班马则愚谓止当推昌黎一老而继之以南丰先生而已尊见以为如何

回宜川黄亲书

某罪罚痛毒中辱展亲甚宠止哀读来教数四何谦勤也古人於所自出每笃叙焉而不忍遗班班书传诗歌间熏然其慈谓不复见今也乃幸於仁亲见之昔我先老姑之适顺伯氏也是生尊夫人以归於尊公而执事生焉义至厚也某生也晚幼也孤不获侍先老姑其於执事又以异县而不获亲某则媿矣书焉先之意繾綣甚盖今世以为迂濶不切而高朋娓娓若不能以宁岂其诗书同原风味自别某不惟媿也感慨系之盛心古谊已可想见清材敏识固应不羣以仁义培其根原以事物链其智识惟不失其良贵与造物游虽緼袍环堵自然常伸於万物之上岂必纁青拖紫号当世公卿而後为贵要之政亦何足贵也拔起西江万滩中共垂不朽吾亲勉之某也未五岁而为先君所弃事先母踰四十年不能尽孝天遽夺之倏越期祥哀痛彻骨恨不即相从地下属有三儿二甫冠一垂髫闭门味书老意转拙畴昔获交海内魁奇鸿隼固自负风云万里之气今则心堂堂而髮种种矣苍苍傥私我更几年住世间或可有以藉手见古人不然自分与草木俱朽而已虽未能见君子以写我心幸因复书而得以论心犹未若覲面情话为慰此心也贱累辱问多感并此附谢因书来忽臆先母谈笑间有时述先姑及尊夫人令德历历在耳乃今言不可闻俱化而为土矣执笔怆然泪堕而废不备

荅友人论时文书

客中荐承访问良恠继承时文新作下教尤恠今承惠书徵赠言则某媿惧不复能恠矣文固文而时非时君何情而犹工之不置愚又何说为君赠邪念君意厚不可负亟细读尽卷瞻丽如云敷空圆熟如丸应手俨然景定咸淳程度傥国不亡科目不废挟此鼓行芥拾青紫惜也贾用不售盖特可曰举业而不可曰时文矣愚窃有以广君意夫士稟虚灵清贵之性当务高明光大之学然为昔之士沈薶於卑近而不获超卓於高远者盖宋朝束缚天下英俊使归於一途非工诗文无以发身而行志虽有明智之材雄杰之士亦必折抑而局於此不为此不名为士不得齿荐绅大夫是以皇皇焉竭蹶以趋白头黄册翡翠兰苕至有终老而不识高明之境者可哀也今幸科目废时文无用是殆天赐读书岁月矣寻求圣贤旨趣洗濯厥心先立其大岂不油油然有颜曾自得之乐顾复沈汨於此则宋人拾郑人之遗契而曰吾富可待者也而又有重可哀者南唐书载金陵被围亡在旦夕後主犹命伍乔於围城中放进士孙确等三十八人及第史臣反覆哀痛谓其不识事势每读使人殆无以为怀而比岁襄围六年如火益热即使刮絶浮虚一意救国犹恐不赦士大夫沈痼积习君亡之不恤而时文乃不可一日废也痛念癸酉之春樊城暴骨杀气蔽天樊陷而襄亦失矣壮士大马如云轻舟利楫如神敌已刻日渡江吞东南我方放解试明年春又放省试朝士惟谈某经义好某赋佳举吾国之精神工力一萃於文而家国则置度外是夏又放类试至秋参注甫毕而阳罗血战浮屍蔽江未几

上流失守国随以亡乃与南唐无异悲夫爱文而不爱国恤士类之不得试而不恤庙社之为墟由是言之斯文也在今日为背时之文在当日为亡国之具夫安忍言之今君之言曰吾非乐为时文也吾平生长技止是舍是无以自见且无以应庠序之季考也此言逾可悲耳学以明理文以载道其妙在乎自得岂为銜友朋校短长计哉诚不得已而应课试姑用君所已能正亦自足奚必自苦而求深求深而擅场正不过三数入中取一魁亚正复何可语人人亦谁复推重吾侪一等俱非妙龄壮齿此去日减一日岁月几何不於圣贤高明光大之趣求得一二乃汨汨焉为是不切於用者以迷其本心益可哀也已异时将书以示後日有时文几十篇行於世则可乎君姑卷怀而从事於上上者愚将观其进焉不宣

与赵仪可书

某生长江西僻左处五十无闻劒炊矛淅媿不与孤竹臞僊东海高士翛然六合尘埃之外顾忍慚苟生为天壤间弃物目眇头白行且谢世缘而同太虚矣独斯文盛心曾未尘土每睹海内奇杰洒洒可人意辄笃嗜若饴蜜然至嗜之甚则必博访其人之年貌与其志节以想见其为人其人居远而不得见则或倚危阑登高峯目极飞云以寄其一日之思而又甚者即虽素昧或通尺书焉以纳交噫地老天荒今夕何夕甚哉若是其迂也或曰是奚迂天理民彝之正然尔某所以冒焉致书执事之意盖如此日社友陈君南居之归自鹭洲也冲风雨过我水云村中某迎问之曰是行见异人乎曰见之谁也曰某人某人而执事居其一又问得异书乎曰得之发其篋得青山初稟一帙以示时莫田已夜色亟篝灯熏香以读读一二惟恐其尽一读竟又反覆读至夜分读不忍休不觉瞿然语诸儿曰是古心老子复出邪何甚似也士登古心之门者多而文之似者盖寡往往高自标致无盐效颦正未必优孟之於叔敖也执事之文则似之矣夫文似他人未足贵似古心乃有贵於他人者是岂易与俗言且近世以文鸣何可胜算简洁华赡典雅雄豪虽各极其天分之所到人自名家而古心乃为独不可及者以味胜也雍容委蛇丰润畅达不磔裂不奥涩时有断崖崩湍点染呈露终不碍河奔泽滙之势虽其奔逸超絶处正如天骥籀云横视无际而其归沈鬱倡叹隼永牙颊何其旨也今执事之文抑扬开合萦纡起伏清不浮奇不怪简不失之碎深不失之艰是皆不必论其所以尤可爱者亦以味胜也新意坌涌恣态百出而沈涵吐吞一节三致意读者有无穷之思甚矣其似古心也某甚敬甚慕甚恨未一识故介南居致书焉昔欧曾苏黄皆不远千里以文字相师友此事今无执事其或振之也新着想益富便中希寄不宣

与陈中方教授书

某从地上望百尺楼突兀霄汉几年於兹恨不获一攀附比者夏五宗濂为容不自意得进臯比左右忼慨意气促膝倾怀走也何自辱此岂坐上之嘉小异故邪病且还山惜不再诣钦企重钦企斯文黯?久矣名儒硕师模楷吁庠如临淮入汾阳军中旗帜营垒俱变精采流风余韵及我邻封咸愿与讲下章缝均承教育秋堂风露弦诵益清坐使涧泉如在洙泗某重拜稽首某敝车朽橐为天壤间弃物慨思平生与海内豪俊游所志谓何五十无闻乃困蹶历落之如许虽其心堂堂而髮种种矣惟进学求道一念与时俱长亦惟见贤思齐一念与时俱长甚愿立下风请所以教顾未之能适友朋过从谓将布武堂下敬乘便奉书写别後怀仰心西风欺

人意度萧飒不佞愿闻金石一语以自壮

荅陈将军求谏先生铭文书

某冗阻造詣实深怀贤桂舟先生神游物表寢远寢忘谁复动死生交情之念独执事哀怜苦心欲志其墓此宜孝子慈孙之所汲汲而执事先焉闻者曰足厉薄俗真古义士矣此宜属之大手笔乃下采於区区废惰之人闻者又曰托非其人矣永惟执事相爱之厚老先生相知之深俱有不可辞者抑承命半载不及下笔非慢也一则以老先生乃江右大诗人二则以金石文一字关书法又俱有不敢轻者近方脱稟敬以上呈其间不止为老先生发扬且为唐宋二代诗家统纪略存大概未知果可拈出否昔欧阳公作范文正公神道碑及尹师鲁墓志竝招物议王荆公铭钱公辅母夫人亦然彼二公皆大贤名笔也犹所不免况仆乎傥招浮议惟在高明察之欧公有曰此文所以慰吾亡友耳岂恤小子辈哉不宣

与朴斋黄宰书

某托斯文绸缪之好踰三十年道同而言莫违心切而迹罔间所谓景仁兄弟也姓不同耳书馆分席文场共鐙每一追思如堕梦境昔若彼其密今若是其疎也何居逸少有云感慨系之矣比者两辱书两具答往往皆江湖递送能无浮沈否即辰春暖伏审亨涂有相台履多福雅学盛名宜列华要属拘近制聊此斜飞伏闻省台诸贤交诵名德将有携上嵒嶨者其集乌乘聽快我心目某衰朽踰六静味更深独嗜学一念至老不衰亦不自觉其无所用也甯伏深密顾景凄然每思乘兴一访知己又若有物厄之者学生来洪敬上起居问并叙渴心我悲所欲剧谈者不胜道也说与傍人都不杖藜携酒看芝山纸尽且已愧不宣展

通臧廉使书

时维孟春草木生意恭惟廉使相公鲁山先生正直所格神明翕扶台 履端多福去秋上状後遄往宁都逼腊才归归而会宪甫知州言相公荣被除音移节名部浙民何幸吾江西之民何不幸也辄成拙诗前寓赞扬後寓依恋伏希电烛惟是礼覆之请上累钧陶盖日夕俟之天下伟人斯文宗主舍是何所依归者第恐吏舍有望无力计置全藉相公维持恃以无恐宪甫知州仲春授代此时或追送至洪首图俛伏阶墀以谢不宣

再通臧廉使书

月正三日李舍人行尝附拙诗以进越三日宪甫知州出示珍染乃知相公軫记孤寒已为入选何修何饰如取如携此生恩未报他日目不瞑谨诵此语以谢区区前任为例革故短少月日若接补满考本自不须再行礼覆第去岁尝谍之省房则曰前度礼覆文书未为尽善恐入选有驳须要重行礼覆相应六字完备方稳有此疑虑是以冒昧攀祈而不知止今赖相公维持入选无驳何幸何幸然再三细思终须过此一关实欲乘今明使者在司特达成就即目合用即用否则存留起咨失今不图异日宁复有爱士如珠若明公者乎闲冷萧条出门如碍既

不能奔竞计置惟仗盛心古道曲成不遗尔去冬钞到儒选名字惟袁之萍乡州瑞之新昌州二正今犹未差恐有机便望相公於内造就一处则阙期近而士习纯或可藏拙待满为告咨地相公其图利之敢肃拜以请年时不肖尝以属之理问白公得报云 文书到选当为出力继又闻参政尚公廉正不阿怜才重道二君子皆相公所厚悦星聚次及之尤幸平生沦落晚遇诸贤子犯曰天赐也敢再拜以请

通李左丞书

即辰麦秋清润恭惟左丞相公龙川先生牙纛所临神明拥佑钧 动履多福某堕身流水村中安闲守分何日非云庇所及也年时里商来汴尝附拙诗转眼一春益勤穹仰相公德望勲名朝家倚重宣威布政驱驰靡宁继今以往必判中书不然其由鄂而还洪乎西江士民引领望之某累年困顿不能奋飞近者鲁山廉使到州一见懽然特加爱念许为出力造就亲索一宗文字去後随蒙分付省中入选正商量间而此先生移节浙东事机相左又成渺茫幸今相公造化在手悦念门墙桃李之旧宛转钩播拔之泥途不负大恩有如皦日今因程府便谨奉此上 起居复有拙诗一章敢尘电览江鄂相近甚欲一诣省下参拜少叙渴心虽行止非人所能然此念未尝一日忘也浩有欲言别容嗣状不宣

通赵桂阳书

惟使治在湖湘深处而乡邦又在江西僻左处两地悬絶夫是以尺书弗获时至左右也永怀取疏其颡有泚一日耕乐翁过我共谈乃知天杪归颿已驻云浦胥觐有日迎风跃如伏惟老手作郡敏健精明戢奸如束湿救弊如沃焦民曰太守百年几见而或谓惇嫠之所安者非譁猾之所便也虽然爱民一意从满腔惻隐中流出是为上不负天子下不负所学仗通天之肺腑行大地之风波夫焉往而不自适彼造物者岂亦若世间盲人哉六月一息七日来复矣其盛气以需某辱知心四十年如老兄弟谊当走数百里图快覩以濯郁陶门巷清寒贫病交阻亟墨此纸畀儿辈以前驱明公将暂还独乐按行华竹乎抑将舍庐陵而居颍弃眉山而居常乎环召匪遥寿福三祝谨上状

通问浙东臧廉使书

廉使鲁山先生阁下自使星移躔江浙道远屡欲修敬亡由也尝於有司榜文间知激清所至神奸扫空为之赞叹不已又为之引领以望重临盖江西父老皆然非特区区然也新秋渐凉伏惟正直有相台 多福某杜门着书盖羈困穷愁之所不赦前载独荷钧陶为致贱名姓上於省去载已获咨上於朝今春已入於选未知铨注之何时悦沾一命即水木本源一出相公所成就无可以报报以清苦自厉不辱师门而已尝窃自谓平居无营或藜糝不继或緼袍不完然且噤?苦忍以俟命若果得一受敕教授月俸廩粟视州判丞簿不大相远足可养廉吾将守冰檠以保名节其尚求多於造物乎某有一亲友欲图进身未有其机敢恃师门爱厚辄以籍贯具呈干大造为立根脚文书乞从所辖诸府取一保解就告体察完备移牒区用可乎盛传使节陞除江右荆湖果尔尤便当令斯人随马足就钧陶也有赀由径者大率结贪浊之奥

援无力发身者止得投公廉之主人惟明公哀寒峻之湮沦为开前程俾得自见是公成就无上功德赞叹何穷不胜归恳之至不宣

与刘国瑞书

春中辱访甚恨匆匆承许午节重来何为爽约也岂非进学之志稍倦耶韩子曰业精于勤切戒倦惰象山陆文安公曰我这里是刀锯鼎镬底学问富哉言乎盖必如是乃能折逗牢关径到悟境若是半间半界乍前乍却恐终无所益也博参硕师详择胜友毋以目前小见自足而求进高明光大之域其庶乎诗文数册久留左右早望发还为妙不久入盱足下何时来州若得会面数日更佳也

荅胡教授书【并录来幅】

来书云长孺之来盱也盖尝数承过顾又示以所为文章虽知其有意於古然未敢以为絶异於衆人也夏五月家僮自钱塘来持故人雪涧陈文书至具言为令南丰时与执事甚有交谊而其绩文操行衆所无有某然後瞿然不足於心以为前此知执事者浅也作教授穷僻之邦言语不为当路所识察然何以为执事道第今者又病更数日即满告期行且去此徒负故人丁宁意慚恧而已而雪涧老且病余日长短不可知某与其同产弟张养蒙为友其拳拳之情不可不令执事知谨以其书一緘二幅纳去旦夕即遣人还浙幸以手书报并示元书也病惫草草余惟以吾道尽珍重理不宣某敝车朽索为天壤间弃物邻翁社友或不相闻忽枉谦勤示以雪涧公翰墨别四十年隔千数百里犹拳拳於棠陰之一介士古道颜色已不可及执事申以顓臾增其光价是与人为善者也滋不可及恭惟盛心有感无斲追思涧翁之始至仆旅进退於广衆中朴讷韬潜无敢自异不意此翁何以得九方臯之法拔跻上宾是时邑政清肃威严若神虽同寮上寓非公谒毋敢进独某以斯文见亲重如兄弟然冰雪相看始终无间以迄於今世已易而眷不衰侯嬴曰人固未易知知人亦未易安得不怵然思悠然感也元緘归璧独留内幅永以为宝时閱其字如见其人就有一緘附往声谢使介复来更得其数字尤慰猝猝奉酬容侍臯比以谢谨上状不宣

通问雪涧陈提举书【并录来幅】

雪涧兴胡石塘书云处久仰恃襟度宏开辄忘僭躐直布忱悃未言先惧治下南丰郡有儒人刘兄名垞佳士也四十余年不见之矣今亦不知其人尚无恙否曾出仕否处久壬戌癸亥间试令南丰时每与文字交此兄笔端俊甚与之周旋两年余未尝有分毫事相干挠此最为难得至今敬之嗣是各景东西两下不相知无从访问生死兹幸老先生典教此邦处久可藉是徼福通名以勾余波之及处久不胜大愿愿先生以区区之请多为询问其人安在处久以其年推之恐亦踰耳顺矣或此士尚在乞从路学赐一公檄下之所属招之使来先生试凭几扣之恐亦不在籍湜之下特赐提撕振拔之造处久拜会实同他时其人或不如仆所举甘受欺谩之罪不胜皇悞之至

召使提举雪涧先生阁下坝昔幸甚以?氓事君侯辱盼絕异虽日月如流閱世已隔每一念及便觉神驰赤城霞雾间然自明公班授盐城时获一交书书不再寄久而閱邸报见盛名与菊泉大司马聯辟欲寄贺书终不可寄盖天旋极折矛渐劒炊出万死得一生虽相迹犹不相闻况浙水江云渺隔如许邪近岁间有方外自浙来者首以门墙为问问亦多不能对惟今夏有宣城沈德载自杭来亟以此问其人云孰游温台似能言陈侍郎府第事至询及雪涧昆弟动履复不能对於是倚危阑望长空凄然怅叹者久之乃不意石塘广文忽以书至缴示亲札见而惊惊而喜喜极而又悲贺知己之无恙辱念旧之不忘光风霁月飞动翰墨间持玩数四犹明恕堂侍坐时顾天壤弃物与俗背驰比邻同社鲜有问子桑者明公四十年之别千数里之隔岁寒心事不遗琴堂一旧客且忧其泥途期洗濯而振拔之盖始望所不及也或谓当於古人中求抑求之於古正未有也感激盛心没齿不朽恭惟贞元朝士既寿且康鸠杖蒲轮会有温诏第不审丙子以来曾为时出否亦止高卧看儿戏否宅府安靖否庄产有增无亏否兰玉有几年今几孙枝有几年今几有仕者否有在京者否令弟旧为临安税官者今为官否菊泉公康宁有佳子弟否盛干如尹如卢俱存否尚愿闻之慰此怀旧若坝则风餐雪虐鼎烹鑪鍛之余一不成而万有余丧使涤其创痍假之羽翼岂不略可自见於世抑今世所共为者或不能为或不可为不敢为且不忍为故亦惟安於无为惜也心堂堂而髮种种矣甲子别後至丙寅春宏斋先生入政府约与俱以母老辞其年秋丹山先生镇虎城道南丰复约与俱又固辞戊辰秋邑以寇毁移家盱城永嘉木史君天骏实客之矩斋曾西清竹谿易琼帅交相延致庚午科举忝魁亚榜决意明年赴京补期见明公於輦下有旨分试江西竟不果来是时後林李漕使邀往湖湘而南村潘史君起予又邀入闽两辞之已而木史君起饶州中山陈先生漕江西俱招致亦两辞之独与菊山赵史君周旋於建昌者两年便养也甲戌荷留远曾公与蒙川刘尚书易牒俾坝试胄闈值母病又不果行乙亥春客赵抚州依制使黄端明赐以官屋一区器具咸备其冬盱抚危急拔家还丰劫夺一空仅以身免丙子七月邑有变北师屠燎无遗幸而免甲申母亡己丑长子亡庚寅汀寇延蔓逼州又幸而免去年冬拙妇亡何灾难愁苦无宁岁若是也命矣夫今存者二子三孙阖门百指山田数亩虽丰岁犹不足两丧未葬百忧熏心六十五翁更复何道闭门着书坚忍清苦而已所幸平生粗识趋向未为乡论所贬而时僚之贤而相知者率温存而礼敬之岁在甲午州庠缺官当路不以为不才强使承乏既幸善解累岁退休前年廉使臧公巡部访问哀其陆沈慨然为致咨保於朝廷已入选未卜銓注之何时然使获一教官正亦不满知道者一笑贱迹出处大略如此明公有问故及其私石塘云有杭便然且急故信笔作家人语不修词急故也愿言以道自寿丕衍期颐嗣有便邮尚冀云烟一幅以自慰不宣备

再与胡教授书

二十七日才领所还尺牋亟加补完同日转发未知犹及使介之便否万一不及计华翰中亦必道甫问讯意矣州里某人士也秀美而文且熟吏事往年操数寸管隶台下监察者以为能拟署宪吏广东使者义斋公之道金陵也尝纳拜焉今将南游而四顾傍皇既无曹丘生为之扬名又无郑当时为之推毂事济否未可知明公雅厚义斋公而春风如海爱士如珠又人士所依赖不揆冒昧为此兄请伏惟一緘九鼎弊帚千金使此士稍遂始愿是执事有大造於西也此兄盛年好修家粗温饱当不至迷繆以误推獎二碑委教甚宠乃知大手笔世自有

人而士类所以敛衽名下诚有以也李密见秦王安得不服他日当抠衣而请焉

与程学士书

窃惟主斯文之齐盟必属之当世之宗工明公大名震乎海宇鸿名行乎中朝盖南北人士倚以为吾道元气者执文盟之牛耳微公其谁归某今者不揆浅陋着一二书以传远而惧其未足传也各欲干明公印正谨录所以着书之意副幅具在虽其书浩博未溃於成然念明公趋朝之日近惧书成而不获荐闻於左右且无以得公之印正也不得公之印正何以重吾书是以敢三肃而请焉人间万境万事犹槿华石火??俄顷间不可拊玩惟斯文长幅或可千载不朽耳仆以千载望明公明公忍不与埧共千载乎或谓子单人匹士也其为若此也几陵节抑太史公谓虞卿非穷愁不能着书自见於世陋哉斯言知道者所鄙笑着书垂世乃论穷达乎四书行世如日月岂弭貂衣袞者之为邪埧不佞愿闻金石一语以自壮不宣

与胡教授书

惟奎躔移次之日久驹从市余得无艰乎虽耿介絶俗固有以自处而使从者同其清苦则鬱鬱於我土地者某之所以顔忸怩而心不宁也薄奉饩禀助徒御之一炊而非以为执事献且区区之私非取诸学高明在所勿疑遽伯玉耻独为君子仆敢拜手以请

迓萧学正书

某幸甚壬辰岁获遂初识於洪继幸甚壬寅岁获遂再见於盱盖挹光霁聆博约之日旧矣今复大幸臯比巍峨重我乡校而不才适承之得以护红篆率青衿以待君子至非机缘之厚邪恭惟英济之才深醇之学山城何所乃屈范模将非天啓良会使穷陋之学舍零落之儒风从是而一大更新乎夜者东望奎光烛天若近在吾百里间者窃意前茅其将压境喜而不寐亟裁尺牋授闾隶疾驱以俟马首心香引领公来勿迟已饬诸生洗濯神观祇迓州东门外伏祈委照

通李左丞书

左丞相公龙川先生去冬欲诣参谒陈兄传奉钧旨云往湖口虑成背驰遂止开年卧疾又未能动仅数百里间一见之难如此更远其又何如重可叹也春寒伏审钧 多福令器监丞必已超迁次令器万户必已回任相公新除必有成命矣敝州时僚幸多贤民间安靖昨自相公抚治以来田里晏然盗贼不作十七八年於兹矣然生齿日繁田收有限虽当丰岁犹有散食於外方者大德四年至今连岁不熟蓄积俱空上年虫伤特甚截长补短仅及半收输官之余所存能几新年雨雪连冻市无可余乡村尤艰且穷原之地舟楫不通春耕在迓秋成正遥待哺嗷嗷景象萧索见已告州申省乞行开仓赈粢惟是下情未由上通耆老百姓知埧素出门墙恳求呈告不胜大愿愿相公兴念旧尝亲临整治之地百姓怀恩靡忘早晚省官会次乞赐鼎言为民请命左右司官当该省掾并勾不惜一语赞决早与行下粢粮赈饥使民命获全免

致沟壑流离之苦且以潜消意外之虞是相公有再造于丰也因仓官齋文解赴省仰恃钧爱
僭达民情不宣

与永嘉叶教授书

某间从诸公後讲论斯文统绪知水心公家学有传缙绅左次雅欲立下风考问乾淳文献而
迟莫囚山未获布武於堂下殊慊也清才雅望范模盱庠臯比谈经多士德色余波及邻而不
自知何时亲承沾此教雨某家盱南水云之村名迹湮微无以自通於时产适有琐瀆不敢以
未面为嫌而介吾友赵君以请於下执事曰往景定咸淳间东浙之英有宰吾邑者相知厚凡
二人焉其一天台陈德可即思道张学士同产兄也别四十年不相闻心常思之前年忽蒙令
代石塘公为转致其书念旧甚勤甫具报而闻陈公僊去殊用怅惋其一平阳杨山立也别亦
踰三十年不见闻思之如思陈而亦无由问讯今年乃知与执事同里也联姻也某不胜欣幸
幸假便以致书焉一緘奉纳傥有专使勾为传邮他日更得其回字尤幸干聒勿遽非所宜言
然交游情也谅不为罪稍凉入盱当趋讲席以谢

与胡石塘书

愿挹光霁有如渴饥都尉经从满期亲炙而侦伺不谨乃不知夜度昆仑为之怅叹无及伏承
志在康济靡憚暑行此其视饥由已之思溯千古而与之合世固有在其位不谋其政肥瘠秦
越独何心乎如公贤劳使我心敬深以弗获一见为恨敢奉尺书问安并谢不及 迎罪

又与胡石塘书

伏审神龙护舟祥鸾栖枳谊当走百里以钱衰晚栖迟不能以筋力为礼谨奉书以庆以别兰
玉留後当数有邮便期时贡安问亦望母爱片幅相温存也承问仆所着书大概放正宗例然
正宗止乎唐今则专主宋以接乎唐者也独惜山州屡经兵毁咸无藏书故心虽勤而事不就
年时尝写与曾兄德进欲於城南寻斗室假羣书日夜繙閱去取度三两月便可了事而蹉跎
至今竟未能动且笔札浩博非募书手不济又所选文字有关系朝纲国政者必须略载当时
事蹟首尾以示千载自谓此书若成则三百一十七年间元臣故老钜儒雅士鸿文大笔云合
星聚粲然不朽於宇宙间或者世道之小补也东望紫气神情黯然愿以道自珍倚膺特台不
宣

彭正心提举曾月厓教授祠祀学宫请陪位书

尝闻古有乡先生者其存则人咸师尊之其歿则祀於学礼也先丈某官令德雅望允为达尊
掌教乡校具有劳绩而祠祀未举是谓缺礼圯承乏摄官爰修旷典拟以二月朔旦为先丈某
官设位於州学之西庑岁时祀焉夫古人制此礼以待乡贤盖虑世代悠远人事不齐惟托之
学校庶克永久宣圣庙祀万世不废即乡达尊祠祀亦赖以不废然则此举关系重矣岂止寻
常瓣香卮酒斯须之敬而已今者豫告有文烦为焚白於家庙神灵有知庶其来格至日薄奠

奉安敢屈昆季陪位谅孝子慈孙所乐闻伏希照亮

与丹徒陈教谕书

仆家江西君宦浙右信风马牛不相及也然世好交情则与君有甚旧者孔李千载犹叙通家况亲承尊翁之训教而忍自外於象贤乎请陈如左昔景定壬戌癸亥间尊公雪涧先生之宰吾丰也坝实受?焉邑士如云无一可其意者独坝以斯文受异知其意气孚协形迹两忘盖平生未有也别四十年隔二千里尝相思不相闻辄为之凄怆不自己忽甲辰夏五建昌教授胡汲仲转示尊公癸卯岁所赐书访问死生哀怜沈浮不啻若骨肉然坝读而感感而悲即具笺幅托胡教转附入杭亦既久矣一旦忽以书还具言尊公已僊益为之凄怆不自己又久之乃克奉书自通於执事而就以郡志所刊尊公题名及政绩呈纳盖乙巳年事今者胡教报云其子至杭已将所附书托刘声之携至赤城声之报以足下已赴丹徒新任嘱之守舍者转附未知达听览否也适有朋友便舟过京口念此良便不可失敬修此书重申鄙悃大概俛叩前书之到否乃若心所欲言已具前缄不赘也六十老客光景寢積知此生机缘能获与执事一见细论再世情好否又重为之凄怆也有便寄书余惟珍重不宣

内幅

南丰先生曾文定公有弟文肃公布尝为右相出判润州既薨後不复归里留葬京口二百年矣烦为传询葬何乡村坟墓存否其家子孙田宅犹有世守者否敢望详报如有後裔宜与之言南丰先生位下子孙久已零散有别位仅存其一亦甚凄凉惟累世坟墓庵寺俨然无恙岁时官为修祭不废也南丰文集曰元丰类藁郡守新刊甚整谩知

贺承旨程内翰书

内翰承旨相公阁下春中展敬庵墅辱留欸意甚勤光霁倾怀谈到太极昔之亲承诸老也尝若此四十年来无此乐矣乃始复见於公安得不跃跃自幸山房有约尤感不遗拟自洪归即陪杖履乃不意抵洪而病病且剧滞留元妙凡七旬复不拟银信鼎来闻命就道当台斗小驻洪泮时仆正委顿中欲力疾一谒弗克欲奉字一问亦弗克又安得不鬱鬱自悼也兹审?坡导旨麟笔续经眷注弥隆弼谐有待不胜欣赞之至江西自南丰公被异顾典五朝史事踰二百年无继者今明公独当之平园公由承旨登政府踰百年亦无继者今明公将又当之叠是二美重我乡邦坝虽耄昏尚期书盛事垂不朽前值端便亟奉此书为斯文大亨贞贺又为吾道有依托贺也

内幅荐友

坝久安萧闲官境无梦延平阙到迫使之官虽精力粗支而旧学都废安能出新意与俱生谈经析理乎徒以闽地差暖稍便衰残尔荷令器少尹为我差声将以菊後驰驿梅前眊龟辄有片言或足为明公助伏承独受简知提纲史籍甚盛事也然昔之开建史局者往往妙选时才

以自助温公修通监则有刘道原范淳夫诸人元丰修五朝史则有陈后山邢和叔诸人宝佑修高孝光宁四朝史则有建昌张平齐与仆族兄刘信翁诸人盖不惟集衆思成鉅典而亦因是獎拔一二人才於以广丰芑之泽此昔贤爱君盛心也古今异宜固不相袭而近覩睿旨其间一语亦及於此即未尝不与古合有如公门桃李夹袋姓名南金北珠随取随有孰敢议其无人独以山林耳目所接则前辈不存後进不竞其堪是选者寡矣史非他文比也彼或沈錮於程文流连於吟咏驰骋於小小文词安足语此昔人论六经谓尚书春秋经也实史也则史岂易言欧阳公新唐书世犹议其不及於旧南丰公秃秃记何媿迂固颜鲁公祠堂记道山亭记直史笔也及夫太祖皇帝总叙则与裕陵圣颂不契矣史岂易言姑舍是即所知闻略评时材可乎草庐玉霄已【原缺】

相若不堪韡霜待漏矣若【原缺】宁海主簿胡汲仲博洽不羣史学尤仅今所罕见夫史者所以明夫治天下之道垂宪於後世曾南丰尝谓唐虞之世岂特任政者皆天成哲士盖执简操笔亦圣人之徒也史岂易言书生好论事老矣习气不除故论荐至此幸母曰子诚齐人也抑又叹景逼崦嵫且固寒喘非复田光盛壮时使减我数年少操觚翰从诸贤後则识马周於逆旅携浩然于禁中岂无一知己者今已矣尚何言尚何言引笔姑止是勿罪

水云村藁卷十一

卷十二

钦定四库全书

水云村藁卷十二

元 刘埙 撰

祭文

代祭陈枢密文

呜呼钜人长德孰盛盱邦犹洛社英巍巍堂堂宏颐二老清节直气竭来太晚弗逮执摯惟矩斋翁如鲁灵光亦复不久归白云乡犹幸千峯作擎天柱魁枢正明风悲?露公有鸿文寬平且柔俨类其人冠佩优游公有达识着龟先见斟酌肯綮与世舒卷公有盛福四顾鲜俦富贵备矣澹若无求呜呼四愿之疏世许以正晚节告君人心天命五羊之归南物不攜明月满舟见者嗟嘻心怀魏阙老益弗释匪为衮裳为国一出【古音拙】出必调鼎乃遽骑箕造朝几何丹旌翩飞仆也何人适仕洛社屡瞻履舄布武堂下幸依耆隼骤失典刑伤嗟诸老接踵凋零公之不出世遗感矣亦既出只哀哉止此椒浆桂酒敬酌一尊公兮归来为歌招魂

为吾母祭舅文

呜呼人生至痛莫如逆境以老哭壮情何能忍兄弟同处踰六十年如足如手曾无间言我迁郡城相距百里山川虽隔心则孔迩旬无音信我思悬悬岂其病邪忧虑万千避难来归幸聚匝月怜汝病深我心如噎尚期小瘳怡怡优游竟梦一枕长往弗留我老心孤望汝送死岂料此归乃反哭汝呜呼兄弟四人今丧其三老怀悲酸情何以堪我有疾苦每告吾弟我有肴核亦每远寄凡得汝书我再四观我书复汝闻汝亦欢汝常来城惟恐汝去汝别我归我泪如注而今而後永絕往来望断天涯独雁声哀三奠永决伤哉倒置栝中之酒皆吾之泪

自祭舅文

呜呼幼依侍侧事公如父公虽方严视甥犹子岁在丙寅甥方缔姻蹟则异处情谊益亲戊辰如城公不忍别我每思公音问不絕公实爱我凡事必咨我每感公奉承弗辞去腊兵戈避地还里复欣侍公公则病矣公虽伏枕见我辄兴口不能言心若欢欣公疾已亟犹顾谓曰以药救我世无卢扁遂隔古今我实负公痛悔弥深思公平生泪不可忍公如可赎何爱九陨垂三十年甥舅團栾永怀公恩令人心酸放牛马走为助丧望报公止此逾觉凄怆素车在途丹旌在门高堂空空谁能反魂一尊永决洒泣释手哀哉此酒能复饮否

祭母文

呜呼母子团栾四十余年母今往矣儿无母怜儿忧谁知儿病谁臆生我劬劳欲报罔极念昔幼日孤寡?然抚育成人酸寒万千孰知此悲惟母与子两心相通何间生死母恩甚厚母望甚深儿学不达莫慰母心养志多亏媿负吾母儿罪通天天诛以斧日吉时良归於高冈母不可留儿割肺肠母子平生决兹一奠哀哉痛哉泉下相见

祭涂教授文【名清甫】

惟公古心直道硕学雄辞皐比俨临士喜得师共期三载教雨其滋天乎奈何奄忽止斯悲夫药餌缺於奉侍棺斂出於有司虽定数之莫逃亦人事之多违内交一年荷公心知遽隔幽冥泫然伤悲沿檄承乏暂踵萧规祖奠柩前櫟舟江湄家山匪遥魂兮来归已而已而哀哉已而尚享

水云村藁卷十二

卷十三

钦定四库全书

水云村藁卷十三

元 刘埙 撰

杂着

记梦

丙戌岁秋孟暑盛一日书困假寐梦偃仰小榻上气奄奄欲死旁若有言者曰死矣已乃气果绝而死死时亦无所苦惟觉神意飘飘然如行云如飞烟腾上太虚间不知昼夜明晦不见山川人物鬼神形状不食而不饥不饮而不渴不扇而不热不衣而不寒鸿蒙汗漫荡漾寥廓而亦无附丽倚着者久之忽爽然自悟曰此其死耶於是小立於无人之境而凝想乎平生自襁褓鞠父母之怀而至於总丱至於冠且婚且生子而且将老矣其间若仰事俛育干蛊承家亲师取友读书作文运智谋竞名利其琐琐者若求田问舍蓄书备器日用饮食贸迁有无又若经涉乱离酬应世故生死聚散哀乐忧惧百种千态意必有一足恃以为长且久者乃今口欲一言而不能发手欲一操而无可伸平生积累竟无尺寸丝毫相与始终即不知四十年营营役役所成何事卒亦何所得乃且并吾之五官四体不得自为之主耶顾今之飞扬升降乘云御风若存若亡无声无色者又安知不日久日消寢以磨灭而人世纷纷正徒苦耳因一笑而觉记所梦如此度他日真死不过如此而世人之生死必且皆如此

汀寇鍾明亮事略

初明亮之首乱也汀州草间匹夫尔非有权位号召世资凭藉奋臂山泽一呼数万衆斩刈剽斂飘荡震汹揉江闽数郡之地动江闽浙三省之兵贵臣重将裨校士马因是物故者甚衆连城累邑公私供亿耗费者甚侈师之所经寇之所及男女老穉被执戮斃财庐舍罹荡毁者甚多上烦庙堂应接诸省奔赴竭数载之力仅得明亮至军前一面而诈降无实傲睨反覆气凌威铄未尝获一交锋决胜明亮竟偃然得保首领以歿既歿衆犹畏服止奉一木主尔藉其虚声余烈尚能统御所部不即降溃彼何道以臻此此之谓盗亦有道者欤幸明亮非有英略霸图止於作贼不过杀人民驱牛畜拥子女坐金玉堆中假息林藪又幸国方盛强兵力翕合故能磨以岁月待贼自毙傥若前古未造干弱不支复加他警策应弗及则漫溢胚胎如赤眉黄巾僊芝黄巢之乱未可知也有脱身贼中者具言明亮有威风多智略得操纵譎诈之术似非田野农夫比然残忍嗜杀异於人类其祭鬼常取孕妇刳剔为笑乐被其虜杀者皆淫刑屠割呼号彻天极痛楚而後得死每言必杀人则人始不敢近而其衆固可全也迹其所为直盗贼之雄耳元凶鉅恶腥闻昊穹顾幸佚罚曾不及显正刑诛寸脔缕脰以谢诸郡荼毒之民大可恨也南丰壤接闽赣适当其冲至元丙戌以来閱历六寒暑震撼万状虽城市幸完然军马经

从无岁无之至其急也则无日无之惊扰需求比屋俱敝村落殆有甚焉粟空於廩鱼竭於池犬鸡蔬果俱不得有加以捶紮淫滥视寇虐特不杀而已鄮都石城瑞金建宁诸邑则兵寇兼至祸尤惨烈至於庚寅四面蠭起明亮邱元之外赣吉有谢主簿刘六十乐安有卢大老南丰有雷艾江之徒乘时响应俱烦省官亲提重兵随处逐捕贼虽终败而受祸衆矣予闻故老道州里旧事谓丰於宋为上县炎绍南渡承平百年民不识兵繁庶钜丽甲江右逮绍定己丑庚寅间剧盗廖十六廖云廖雷辈起广昌闽寇刘四官辈又荐食汀劔邵武诸郡久而益炽出犯我江西己丑岁十月十有六日廖寇由广昌来犯西门王宰日宣备御无策斥堠不严贼已入关至三圣堂前一跛僧犹问曰贼在何处俄被一刀死人始知贼至居民奔溃幸其仅留一夕即去且不纵火故逃窜不前者或伏匿得全上司调江州兵百屯安禅寺戍守十有二月又调冯将一军至屯西门甫解器械衣装小愒十三日寇猝至石背舞皮繖张青盖持木扉以蔽矢石冯亟前迎拒而军远来疲乏未熟地利复衆寡不敌冯被杀所部溃奔多死寇长驱入郭是时居民恃有军来无恐逃者多还而不虞寇至也由是死者无数火官府民庐几尽数日乃去攻建昌明年王宰以失守罪被劾罢选南城杨尉应廉来涖邑杨庐陵人也号才能吏招集流逋以渐兴补远迓赖之朝命御前诸军副都统制夏训武友谅将池司步骑至又命蔡将某将荆湖步骑至又命张总管□将江西步兵至进屯广昌贼遁松梓山池司兵攻破之时又起复陈工部■知南劔州兼福建提刑江西招捕之职犄角平寇陈公有威名多方略招致廖寇俱隶戡下贼衆被官军剿灭者不胜计乱遂以平而陈招捕之名满东南矣杨宰应接军务抚摩创痍为尹六年百废具举辑荒残为繁庶化机隍为安平自是丰复为壮邑二十余年虽嘉熙庚子有上石谢八屠之乱淳佑乙巳有广昌符五十之乱淳佑辛亥有新城关社之乱然祸不至邑邑得以全逮宝佑戊午岁新城李尉复来摄邑郡吏赖青临之督月解钱帛峻甚青红由帖徵催东湿加以大家三谭二赵苛虐诸佃咸不堪命攀龙耆有张半天何白眉者啸聚起木瓜山石牛洞五月二十日舖时率百衆寇邑首吏余璋急断浮桥贼愒水东官民赖此得逃逮昏贼始渡留一夕焚谭之庐延燎城隍庙一带居肆明日乃归巢诸司调抚赣旗马军合寨尉卒进讨擒其魁渠赴建昌凌迟梟令继治激变罪李权宰以劾罢二赵徙潮惠州家属分徙劔邵没其赀以贍军三谭罚米赎罪赖青杖脊黥配死郡狱妻子徙外邑亦没其赀逮咸淳戊辰夏诸乡水灾乏食始则发廩劫禾终则啸聚弄兵永福作善耆有罗动天詹花五者率羣凶起峡村八月八日清晨以百余衆破邑驻半日焚治寺民居市肆杀略而去诸司又调兵讨平之魁渠俱凌迟伏诛治失守罪县令杨从政晬以劾罢首吏欧实死郡狱甫七年逮德佑乙亥岁十有二月江西诸郡受兵大执震扰尉寨凶卒乘时略邑而贼首陈捷江七龙辈起中和保则拥衆却村落是时南北未一有司招安之假以虚名使散其衆明年丙子岁七月初吴制置浚即广昌开柙府聚兵兴复诸邑咸应陈捷为制置司都统制率乡丁戊南丰江七龙从之八日晨兴有北兵七百马三百自建昌掩至陈江拒於东郊大败走其死於兵刃者甚衆士民之不及避者死尤衆横屍路衢府寺民庐廛肆一炬几尽自有邑以来兵火菑患无甚於此承平遺蹟埽地尽矣才十余年生聚未复而鍾邱相挺又如此距绍定己丑庚寅整六十载其间祸乱相仍肝脑涂地令人心酸有不忍言者何吾丰生灵独不幸至是哉因纪明亮事并载故实痛定思痛历历眼前後贤览观尚恍然而三叹也大德戊戌岁四月上吉聊述事略而其详则具於嘉禾御寇录云

乡饮酒议

按古礼冠昏丧祭有射有燕有聘有乡饮酒今射燕聘废已久矣冠礼间有行者然甚少昏与丧祭虽不废然不尽如古其准古尽合惟行乡饮则必谨焉三代之礼仅存止此可叹亦可喜也乡饮酒始於周以乡大夫主其礼故曰乡周礼天子六乡郑司农云百里内为六乡外为六遂司徒职云五家为比五比为闾四闾为族五族为党五党为州五州为乡则州为二千五百家乡为一万二千五百家也曰乡大夫每乡置乡一人其次每州中大夫一人为州长其次每党下大夫一人为党正又其次每族上士一人为族师又其次中士一人为闾胥又其次下士一人为比长而乡大夫则总之者也诸侯三乡卿二乡大夫一乡各有乡大夫天子诸侯之乡则君其国有其地也大夫士非国君未知乡在何所乡有乡学郑司农云乡大夫饮宾於庠序尊贤养老谓在学也乡则三年一饮州则一年再饮党则一年一饮凡乡学取致仕在乡之中大夫为父师取致仕之士为少师处於学中名曰乡先生以教乡中之人每年入学三年业成升於君若天子之乡则升学士於天子诸侯之乡则升学士於诸侯凡升必用正月将升必先为乡饮之礼乡大夫与乡先生谋诸学最贤者使为宾次者使为介次者使为衆宾乡大夫为主人与之饮酒而後升之故周礼乡大夫职云三年则大比考其德行道艺而兴贤者能者乡老及乡大夫帅其吏与其衆寡以礼礼宾之盖古者年七十而致仕老於乡里其为父师少师而教於学也常知乡人之贤者是以乡大夫就而谋之以为介宾将献其贤能则与之饮酒故乡则三年一饮也然乡饮礼有四若养老宾贤者特二事耳其三则春秋习射因而饮之以州长为主人故州则一年再饮也其四则国於大蜡祭而党中於学饮酒党正为主人故党则三年一饮也俱谓之乡饮酒

立宾以象天立主以象地设价僎以象日月立三宾以象三光三让以象月之三日而成魄四面而坐以象四时故乡大夫选其老而贤者立为三宾而立介以辅宾立僎以辅主三宾之外年高者为衆宾六十者坐五十者立六十者三豆七十者四豆八十者五豆九十者六豆

主人亲造三宾者之家速宾及介而衆宾自从之主人拜迎宾介於庠门之外而衆宾自入三揖而後至阶三让以宾升主人盥洗扬觶宾与主人升堂主人北面再拜於阼阶之上曰拜至拜訖洗爵而升宾再拜於西阶之上曰拜洗拜訖宾又拜於西阶之上以受爵曰拜受主人拜於西阶之上以送爵曰拜送宾饮酒既尽而复拜曰拜既然惟待三宾则然介之礼省衆宾又省主人尊宾故坐宾於西北而坐介於西南谓天地严凝之气始於西南而盛於西北体天地尊严之气以表宾之尊严也主人坐於东南而坐僎於东北谓天地温厚之气始於东北而盛於东南体天地之盛德以见主之仁厚也故曰四面之坐象四时也其礼则有祭荐祭酒啐肺啐酒卒觶致实之目其乐则有升歌笙入间歌合乐之即其官则有司正之职其仪则有宾酬主主酬介介酬衆宾之序而终之以沃洗又终之以说履升堂饮酒无算然後宾出而主人拜送为礼之终序矣盖饮酒之初皆立而行礼未彻俎故未说屨及旅酬沃洗既毕降阶而说屨彻俎而坐堂行爵无数至莫而不废事故经曰节文终遂安燕而不乱也党正饮酒则一国若狂无不醉矣

乐歌之节其始则乐工入升堂歌鹿鸣四牡皇皇者华每一篇而一终谓之升歌三终其以吹笙之人入於堂下奏南陔白华华黍每一篇而一终谓之笙入三终其次笙歌既毕而堂上与堂下更代而歌堂上先歌鱼丽则堂下笙由庚堂上歌南有嘉鱼则堂下笙崇邱堂上又歌南

山有台则堂下笙由仪谓之间歌三终间者代也谓一歌则一吹也其末则堂上下歌瑟及笙竝作若工歌关雎则笙吹鹊巢合之若工歌葛覃则笙吹采芣合之若工歌卷耳则笙吹采芣合之谓之合乐三终然後乐工告之乐正乐正告之宾曰乐备工遂下堂而出乃立司正谓乐既备宾欲去为有懈惰故主人使相礼者一人为司正以监之将留宾而行旅酬也其用诗之意则嘉鱼者取其以礼下贤者贤者累蔓而归之与之燕乐也山台者取其爱友贤为邦家之基民之父母既欲其身之寿又欲其民德之良也由庚崇邱由仪今亡未详其义愚谓必亦取其万物得宜如鱼丽万物盛多为太平之世可以待宾而兴礼乐也宾必南乡介必东乡主人必居东方谓献酬之际主人将西宾将南而介则矚其间也矚音间厠之间

窃详乡饮大旨主於尚齿尊贤以厚风俗以明政教而已古人岁岁行之以为常後世间一行之以以为异即见今之不如古矣淳佑丙午岁建昌尝一行之时则郡守王公侑为主人今六十年再逢丙午部使者始令再行之其难如此宜乎尚齿尊贤之风不接于耳目而民俗日媮也孔子曰吾观於乡而知王道之易易也夫王道大矣夫子乃因观於乡饮而知其为易何邪孟子曰尧舜之道孝弟而已矣二帝之道犹不过於孝弟况王道乎宜乎以此为易易也乡大夫三年一献贤能先与之饮酒则宋代乡举鹿鸣宴盖乡饮之遗意而其废又三十年并此意不复得见矣古人制为此礼法天地象日月三光四时至详且重亦有过於烦縟者则拜至拜洗拜送拜既之类是也谓宜於亲速宾介迎拜於门三揖让升堂之後稍节其拜则简而不倦矣且今一举礼其费甚夥有司以为病不知古人岁举此礼费当何取当考大德丙午岁闰正月间盱庠奉宪令将以姑洗行乡饮因考古而议其略若其详则见本义

策问【四】

问易曰积善有余庆积不善有余殃书曰天道福善祸淫又曰作善降祥作不善降殃圣经以善恶判祸福理也先儒谓其言兼报应何也大学曰货悖而入者亦悖而出理欤亦报应欤报应释老之说也圣贤不废欤有曰报应若有神司之者纖微必察诛赏不违何冥冥之扰扰也此殆以人事拟天道固不足论或曰祸福无不自已求之者惠迪吉从逆凶惟影响人自为之天理顺逆之分即人事吉凶之判是矣而亦有为善未必福为恶未必祸者何居或曰善恶未熟尔熟即验矣审如是颜子之善不熟乎何其夭且贫也盜跖之恶不熟乎何其寿且富也不宁惟是邓攸弃其子而全兄之子亦可谓笃於善矣无儿之悲使人流涕张汤杜周酷虐何可当也而乃俱有良子且爵位尊显至建武杜氏爵乃独絶史谓蹟其福祚元公儒林之後莫能及盖讶之矣善恶之验竟如此此君子所以愤天道之无知抚遗编而浩叹也羣疑满腹愿从诸君质之

二

问古者仕进之途盖非一矣周以乡举里选为正途至汉则孝廉贤良明经唐宋则词章科目皆正途也然其间有以货进者虽由径亦多通显何欤输财助边纳粟应令犹爲有说进瓜果人亦官之何义欤宋待进纳者最有节不过假以浮名使由场屋特优其取予差易进身尔不使骤入流品也非公私两利者欤无亦曰多田翁捐所余数百斛计直几何即获与正途常选

齿不?吾名器欤一蹴而躡升则彼之贤劳鞅掌积日累月者得无舛望且寒畯乏资者复何由升欤自古奔走才能鼓舞豪俊惟名器尔昔有以官颇易得人思侥幸为世道忧者非以其轻名器欤惧其轻加裁制焉将以抑奔竞也或曰昔尝急而求予矣今若此不虑後日复有急乎吾将微獎以示其信虚荣以慰其求则又曰数且夥其轻犹故也将若之何敢问

三

问学者之於书致疑多矣大者未易悉数也略举其细有言语背驰者有纪载失实者有称谓差殊者试与诸君商之夫子曰言忠信行笃敬子张书诸绅言之重如此而孟子乃曰大人者言不必信行不必果异时夫子亦尝以言信行果为硜硜之小人是言行不足为重矣无乃言语之背驰欤门人曰子罕言利与命与仁利与命夫子诚罕言至于仁则屡言不一言未见其罕也无乃纪载之失实欤唐虞夏周国号主一未见其有二也继夏者殷宜直曰殷而已然诗既曰殷士肤敏曰殷鉴不远矣乃有时而又曰商之孙子曰肆伐大商书既曰殪戎殷曰胜殷杀受矣乃有时而又曰商郊牧野曰商王受是一国而二号当时之人不知何从梁本魏也孟子之书易魏曰梁而齐晋则异乎是何於魏独然无乃称之为差殊欤三者虽浅近其疑则一敢问

四

问理莫难明於鬼神矣谓为无邪传曰幽则有鬼神谓为有邪孰从而究其迹也夫子曰焉能事鬼不过谓其未能事而非以为无也子不语怪力乱神不过不形之言语而非以为无也盖有之矣然求所以有何其茫如邪画歟嚶嚶世固有之抑以理而推有形而後有声曰有声矣必附於形形何在欤曰无形矣声何所附欤好言鬼神莫若左氏世多讥其诞至伯有之事又何若是着也然欤否欤审如是可谓之有矣乎中庸谓洋洋如在其上如在其左右如之云者其有无之间耶智不足以通幽明之故愿祛其疑

诗说

至元辛卯秋予与故友易雪厓闲游南城乡至欧桥访小谿周文郁【名从周淳佑丙午中乡举】因过坡下访彩野黄卫道【名阑登科仕为兴国军通判除權院】就往金谿县之曾坊访平山曾仲材【名子良咸淳戊辰登科仕至严州淳安令】三先生者皆予旧识也前修雅望绰有典型从容说诗各得一论足以补後学之阙漏今二十有七年矣雪厓翁壬辰岁先逝三先生亦相继僊去宰木俱拱惟予仅存而亦年近钓璜惧来日之有限前闻之易亡也因摭其说载家集以示吾孙

小谿翁曰昔在行都访白云赵宗丞参诗法因问何以有盛唐晚唐江湖之分赵公曰此当以斤两论如齐鲁青未了如乾坤绕汉宫如吴楚东南坼如天兵斩断青海戎杀气南行动坤轴如白摧朽骨龙虎死黑入太陰雷雨垂等句是多少斤两比风暖鸟声碎日高花影重即轻重见矣此盛唐晚唐之分江湖不必论也已而访苍山翁曾子实以赵公语质之曾谓赵公言是

适有一客从旁窃笑心怪之而未敢叩异时徐问客何为笑曾公曰有故盖白云之说虽当顾其自作则起未皆未是客之所以笑也文郁请问歌行曾公曰凡歌行止合以老杜为法其後又谒看云翁黄希声参诗黄公简默庄重不事庄辩止云诗止如此做来做去到平淡处即是又曰诗贵平淡做到此地位自知耳三诗人之所以语小谿者如此小谿以其说授予【白云讳崇嶠字汉宗居南丰之东门嘉定壬午登科仕至太宗正丞卒于朝有子云舍仕至抚州太守○苍山讳原一字子实居宁都金精山前仕宋为南昌县丞○看云讳文□字希声淳佑庚戌登科居建昌城内仕至浙西提干舟覆于严州城下遂溺死】予访彩野黄樵院年八十有四矣精健不衰气象温雅有乾淳遗老风致忠厚之味蔼然从容谈诗有曰诗贵平易自然最要血脉贯通有伦有序因举梅诗墙角数枝梅云云又举月诗腾腾离海角云云此二篇血脉贯通次序不差是一样子也越二日往金谿访平山曾公作诗多雄健於近世诗深取苍山翁且云少谒苍翁於行都翁曰君作丰大合作颠诗一番然後约而归之正乃有长进问何谓颠诗曰若太白长吉卢仝是已然性不喜为此体竟不果学今老而思当时愧不以已见横於胷次而从前辈之教用工一番则吾诗当不止此叹息久之

予以诸老前後言语参玩乃知前辈作诗俱有节度如今人率尔五七字凑砌成章遽名曰诗宜其不足传矣学不广闻不多其何能淑予窃媿夫造诣之不深而又虑夫前世之不传故纂其所闻以为诗说也日或嗣有见教者顾虽老惫犹愿读书延佑丁巳重阳日记於东轩

记安晚二字

颜蠋与齐王游食必太牢出必乘车妻子衣服丽都蠋辞去曰玉生於山制则破焉非不宝重也然而太璞不完土生於鄙野推选则禄焉非不尊遂也然而形神不全蠋愿得归晚食以当肉安步以当车无罪以当贵清静真正以自娱宋丞相郑忠献清之晚年倦禄自号安晚盖取诸此东坡尝谓战国之士未有如鲁连颜蠋之贤者也然而未闻道也晚食当肉安步当车是犹有意於肉与车也晚食自美安步自适取於美与适足矣何以当肉与车为哉坡翁此论尤高但蠋盖有为而言之与曾子彼以其富我以吾仁彼以其爵我以吾义一例亦不害其为闻道也

水云村藁卷十三

卷十四

钦定四库全书

水云村藁卷十四

元 刘埙 撰

公牋

代包尚书申省乞朝假状【咸淳丙寅】

昨准尚书省劄子云云给假一月 满前来供职者恩旨荐颁孤衷增感伏念某栖迟莫景眷恋明时清朝未忍於弃捐优诏仅蒙於予告恩纶稠叠宁忘魏阙之思药裹纏綿靡遂汉廷之恃今者年益加大病殊未瘳虽出入庭户以犹艰岂奔走道途而无苦辄陈私悃俛念颠危欲望公朝特赐敷奏更与给假一月少需煖淑庶便老癯实拜钧造生全之赐

代申省乞蠲租免余状

咸淳戊辰夏乡邑水灾远近艰余人心汹汹予日虑寇祸六月初迁避建昌城中未久果闻啸略四起八月八日贼破邑大焚略而去是时朝旨下江西运司於诸郡和余米数十万石颁降官诰度牒银楮四色为余本数内建昌合余三万石南丰与焉予闻之惻然曰邑虚矣何堪重余乎即思以救之适云舍赵公必岳新注零都宰归亦寓盱城居相邻因约其同谒乡达尊包枢相恢陈尚书宗礼曾侍郎颢茂黄侍郎万石易安抚士英请为联衔列上於朝祈免余又祈蠲租诸老俱然之陈公命予亟具藁以进即备公劄闻於贾平章似道未几尚书省劄下尽从所请租余两免次年春夏遂免艰食云

某等跼伏田里圉身化钩自安其愚詎容妄有陈述兹以事变出於乡里事体关於朝廷冒昧吁呼仰祈钧鉴某等生长建昌窃惟本郡山多田少素非富饶而南丰一带又接闽赣民俗慆悍轻生习兵才遇水旱无聊辄啸聚称戈负固挺乱致上烦于有司今年春夏以来积雨霖淫谿涧涨溢至四月乙巳大水五月壬戌又水拔屋宇冲田畴盖四县皆然而南丰则平原出水灾变尤甚东西弥望莽为沙邱牛畜种植多没巨浸廩储湿腐告余孔艰於是强民结聚者四起州郡为之调兵镇压遣榜招谕而後定曾几何日被水者修补庐舍未就葺理县市未成忽八月初本县管下峡村贼首罗动天等聚集凶徒焚劫乡落竟以初八日辰时掩袭不备长驱破县虏略财货妇女杀死宗室王民本县无兵无城徒手受寇邑 市肆悉尽于烟焰之中生灵老少多毙於贼刃之下仅得尉卒数辈短兵巷战而寡不敌衆莫遏其锋贼執既长好乱者衆邑距郡不四舍朝发莫至荡无堤防近城居民率窜城内傍连赣抚属邑如宁都宜黄无不震动弱者徙家远遁强者团结自防州郡始调厢禁寨兵结约隅总邱应禄胥广赵集义兵攻围贼洞幸擒元恶已正典刑同党羣凶或逃或捕既而宪司军马踵至虽可少安然郭内则瓦

砾荡然奠居无所诸乡则侧受寇毁茅苇相连生者骨肉流离死者肝脑涂地甚可痛也某等窃念南丰自绍定己丑廖寇兵火之余凡二十年创痍仅起而宝佑戊午之张寇起焚荡劫略一夕为虚郡家急於茧丝草草收拾甫及十年痛犹未定而罗寇继起四十余年三经残破寒厓赤子斩然无一缕生意秋成纳稼民食所关而始以洪水之漂流继以凶焰之焚略又继以军马之蹂践田畴刈获能有几何况邑之宿储空於水乡之积贮空於劫市井之生聚空於火疾痛呼天安得不仰祈一分之宽乎共惟宽大之朝仁恩旁达元勲当国泽及隐微凡州县兵荒每拜存抚今南丰水盗兵火交逼沓至尤宜兴怜欲望公朝曲垂轸念特降旨挥行下建昌军将南丰民户二税蠲免一年其本军和籴米年例四县总计三万余石并乞割下江西转运司行下本郡将南丰一县今年合籴之数特与除豁令运司收回籴本庶几宽恩所被民力获纾亦见本朝仁远之意颺望钧慈亟赐报可某等当与下邑黎庶永戴洪恩干犯钧严下情不胜俛伏俟命之至咸淳四年十月日右武大夫合门宣赞舍人主管华州云台观易士英朝散郎集英殿修撰黄万石通奉大夫宝章阁待制曾颢茂文华阁直学士大中大夫陈宗礼资政殿学士通奉大夫致仕包恢劄子

是年十一月尚书省劄子下建昌军仰将南丰县民户咸淳四年夏秋二税蠲免一年外仍割江西转运司行下本军将南丰县咸淳四年和籴米照数蠲免收回籴本并割送包资政等官准此

代申省为陈参政请諡状

窃惟圣经存节惠之文清朝有锡諡之典所以旌别淑慝昭示来今傥非依赖於钧陶何以燁光於泉壤伏念先君枢参政年垂七袞历仕两朝清介方严不混流俗平生劲直之节着在朝廷简静之政行於郡国为学官因冬雷上疏语侵大臣郑丞相恶之而斥为宰属因陈四大愿历诋时事丁大全恶之而又斥景定更化天日清明起散地乘轺传观风岭海一道肃清中间虽以诗语为御史虞慮所诬徙居二水而元宰当国察其非辜曾不踰年?叨擢用由庶僚而登言路由言路而升从班弹击不避贵权论思必主正大一时忠言谏议以之为首端人雅士以之为宗出帅羊城以清约洗贪风以安静镇远俗至今南人歌思靡忘暨登庙堂守正不变虽莫究大用而天下善类识与不识翕然以名节称之其持身处事治家居官皎皎无毫髮磨玷至若读书讲道勤苦自厉则壮老犹一日也公朝为之赠官加赙恩全始终亦既哀荣无憾矣永惟墓草已宿壹惠未章不肖孤零丁待尽弗克显扬深惧先君名实与草木俱腐无以赎不孝罪谨缮写行状一帙叩首百拜以请欲望朝廷俛赐矜念或蒙特达密启径降恩旨为易其名或蒙下之有司从公议諡岂惟不肖孤誓报洪恩九原有知亦将永永戴德其无斃某冒犯钧严下情不胜俛伏俟命之至

呈州转申廉访分司救荒状

大德十年丙午岁春夏间江浙大饥吾邦与邻郡皆然景象恶甚予不能安条其事上於郡适分司官至因以闻

窃惟民间或有疾苦学校所当开陈本州归附三十余年多遇丰岁民各安生亦曾间有艰余之时然止是小歉不至大伤惟有今年凶荒特甚岂非岁在丙午自古以为厶会邪即今饥民充塞道涂沿门乞食扶老携幼气命如丝菜色雷腹行步倾倒一村一保之间儿号妇哭所不忍闻盖缘此州本是穷原去处山多田少地狭民贫虽遇丰年犹有不给自大德四年以来连年不熟罕有积储至七年八年则旱损其半九年则虫伤尤多民户输粮还债之外所存无几上年腊月农家多已无饭度岁矣苦捱至春又遇雪冻闰月以後淫雨连綿至三月二十一日夜半西乡峯岭等处山水发洪冲田拔屋莽为沙邱如秧如麦俱已荡尽沿河一带弥望萧然常年犹有邻境可以通融今则邻路俱荒四境斗絕常年犹有蔬菜可以助食今则久雨浸淫蔬菜腐死常年犹有客船运米可以接续今则州民前往下江贩运多被龙兴抚建阑遏不许到州常年米硕价止中统钞一十两余户犹曰艰难今则价值日增倍而又倍且又夹杂水湿沙糠舂簸之余一斗仅得七升而已以此展计每硕乃成三十两之上小民久困钞从何来以至将屋宇园畚丝麻衣服牛犁器具甚至猫犬等物俱已典卖应急自春至夏历日滋久盖亦罄竭矣且粮多之户不免犹有缺食者耕农之家困乏可知弱者忍饥待尽强者率衆开仓或有百十为羣突入大家升堂入厨需求饭食必待烹猪给酒醉饱乃去既曰饥民谁能抵拒亦且数衆叫嚣震惊以此税户亦不安居往往搬移回避景象殊恶盖三十年所未见也居是邦者廩廩度日幸蒙省府矜恤累次发棠官粮饶非得此赈饥则饿死久矣又奉榜文委官劝糴伏覩辞意哀矜恳切洞察民病百姓见榜欢声如雷以至感极而泣然官仓所糴每户多者五斗少者一二斗而止略计人口不同大槩仅充五日之食所食既尽又只忍饥今才五月上旬相去秋成尚远兼本州山深地寒止宜晚禾惟有近郭乡村略种早稻通计十分之内早稻止有三分各济本乡何能普及近为大水冲田之後补插稻秧比常年栽插之时甚为迟缓恐至七月才见收刈况又未卜有收无收凡人一不食则饥再不食则困三不食则饿且死岂能空腹忍死待秋熟乎至如远村止种晚禾直到秋冬之交然後成熟似此饥荒正长委计利害今则未论秋後且虑目前若不多方措置不惟饿死者衆亦恐别生事端倍费有司处置伏见本州官粮除已糴出及存留年终支持外尚有余贍乞行照勘数目接续发棠拘钱还官仍乞申覆省府乞於粮多路分转拨万石僭运前来接济亦是损有余补不足之意就乞行下龙兴抚建诸路放行米船毋得阻遏均是江西地面一般饥民何忍妄分彼我瘠鲁肥杞也其有富户蓄米待价固是愚而无知不恤祸败理宜督勒随时平糴庶免後患可保家业至若奸民不畏官法乘时放强鼓动恶少不问物主擅取仓禾此风亦不可长所宜折其萌芽合无多出榜文严加禁治尝闻古人救荒有法凡禁治闭糴之户强余之民必将二事竝行盖以安富恤贫不至偏负如某所陈似涉激切然事急不暇徐行心痛不及缓声如言可采早望定夺实一州生灵之幸伏乞照详施行

是年省府节节行下糴粮又专官亲临赈济孤贫者分遣郡官下乡劝谕大家减价发糴郡侯聂公伯达名从政恳恻奉承秋毫无扰贫富安之又劝农竞种荞麦为明年续食计所收甚广暨丁未岁民得麦续食不复有饥由是两岁虽歉而获免沟壑者皆公家全活力也

建请改葬乡贤游澧州状

窃惟尊礼先贤国家之令典建明义事学校之公言伏见南丰志该载先贤数内有故澧州太

守游大夫讳少游文学政事为时名臣亡歿之後已行薶葬经今百年昨因至元己丑庚寅间兵寇扰攘将本官坟墓发掘破棺取物衆皆见其金紫俨然颜貌如生衣服俱被剥去尸体弃於道傍子孙凋零无人收瘞邻近怜其裸露就将浮土略为掩藏不复再行正葬今则又历年深雨水浸淫牛畜践踏此去日久必复暴露矣生前既是品官身後岂宜如此本处亦有善人肯为出力迁葬却为未曾闻官由此未能轻动本官元葬新城耆接连玉泉地面有玉泉耆儒人黄贡元名犹方读书知礼乐为义事谓宜委之此人倡率乡里仁人义士及游门宗亲协力维持制造棺衾将本官遗骸装斂入棺加以钉线灰漆如法封闭结砌坟穴用石盖压务令完牢仍於墓前镌石明书澧州太守游公之墓致祭安奉以表先贤则泽及朽骨风厉薄俗诚州郡之美事也

讲究堤备湖寇事宜状

窃惟江海湖泊水面濶远芦苇阻深致有盗贼出没从古不免而近年为尤甚剽劫商旅损伤官员非止掩其资财又且占其妻子??无处生死衙冤今者李某所陈件件皆实原其事理盖缘贼船盘据水中巡尉远在岸上追捕县隔力无所施又贼船民船混杂波心虽有智者不能辨认为今之计谓宜别立水路巡捕司验地面远近节节置立使声势相接首击尾应给以官船日夜巡哨其有雇觅民船装载者宜依李某所陈令本人经官告给印信勘合及用火印烙船参照相同见得某处某人管下附籍船户如此明白若或船无火印及无勘合即是贼船显然彰露自无所容而水盗因可弭矣至如船居之户规避差发则宜印烙其船及依土居粉壁例置立粉版开写户贯人口官为置籍时常点视非止官府得以役使而奸盗不至窝藏此又一举而两利也其要在乎讲之周密行之坚决又须严立法禁堤防巡捕司与贼交通之弊庶可戢水盗护良民惟执事者实图利之生灵幸甚

水云村藁卷十四

卷十五

钦定四库全书

水云村藁卷十五

元 刘埙 撰

表笺

寿节贺表【景定庚申正月五日】

献岁发春挺生真主与天齐寿恭祝圣人矧临启运之年有衍兴王之庆恭惟刚健中正神武聪明三纪四方无虞丕畅久成之化九夷八蛮通道克开底定之勲适虹电之交輝等乾坤而同永臣分藩有守造阙无繇艺祖开创於庚申愿恢令绪帝舜诞弥於甲子期迈修龄

谢赐历日表【景定甲子】

仰观天文协用五纪以为民极賚及万方蒙帝力以何知表人时之敬授恭惟诚参化育道妙裁成膺历数以在躬契合六十年之兴运察玑衡而齐政环循三百载之太平正朔诞颁车书咸被臣职司劝课志在布宣云云

绍陵诞嗣贺表【咸淳戊辰十月一日】

乾万物之资始式开有道之长震一索而得男丕衍无疆之历甸区嘉赖宗社奠安恭惟德泽延洪仁恩涵育忠厚成其福禄克底烝民之生孝弟通於神明宜接千岁之统告朔适当於良月流虹遂应於前星臣老佚里居远欣邦庆二十九得皇子同符先汉之颂歌亿万年敬天休永迈成周之历数

贺太后

德合重坤仰谄谋而翼子祥开索震爰受祉而抱孙宸扆来朝慈帟增喜恭惟得天久照应地无疆寿考万年用介福於王母本支百世肆遗休於後人遥知问寝之欢坐享含饴之乐臣身栖南亩心恋东朝诵太任思齐之诗於昭积庆效汤孙猗那之颂式衍丕基

贺皇后

宫帟雍穆肇美螭绳庙社灵长为生岐嶷仰离明之继照表坤厚之含光恭惟如月之常配天其泽审官贤佐君子助成化育之功帅嫔御祠高祿协应诞弥之瑞凡皇祚繇於百世由化基

本诸二南臣幸佚余年欣逢庆事祝帝尧之多子有伟貽谋颂太姒之嗣音永言齐寿

正旦贺表【咸淳庚午】

岁协祝厘颂九州之正朔帝临垂拱朝万国之衣冠自天降康与民更始恭惟日新盛德春育涵生六年受五服之朝混同文轨一气转八荒之寿增壮山河适当黄道之中宜处青阳之左臣归田身老恋阙心存王春受汉京之图莫陪正伏吉月布周邦之治第仰宽书

太后

月正元日尊临南面之居天下一家同致东朝之庆慈颜有喜景福无疆恭惟与物为春後天不老龙楼戒晓日膺问寝之仪雉扇开云岁举奉觞之典九重称贺万国具瞻臣归老邱园驰神集阙四时成岁欣逢交泰之期五色补天端赖重坤之助

皇后

王者大一统式迎泰道之亨太极有两仪允赖坤元之载欢腾柏颂喜溢椒涂恭惟化基二南仁育万物正位乎内助宣太皞之春申命自天均迓元正之福对龙杓之易次仰凤阙之受朝臣昔侍西清今安南亩想紫禁烟花之绕莫缀班联瞻黄道日月之明遥依魏阙

寿节贺表【至元戊子八月二十八日】

乾统天而乘六龙光临率土兑正秋而说万物瑞应流虹圣明挺生遐迩胥庆钦惟宽仁抚世神武兴邦如月之恒日之升同符久照际天所覆地所载咸入洪图福镇关河寿齐箕翼臣分藩有守望阙无由致嵩岳之三呼第瞻北极指军峰之万仞遥祝南山

又【至元己丑】

乾元御极运应河清兑正司秋节逢电绕万年介福四海均驩钦惟光岳储神箕翼同寿为天地立心生民立命共乐治平凡日月所照人力所通悉陶化育祥开诞圣庆衍齐天臣忝牧一州恭瞻九陛归美报上莫亲奉於玉卮以忠事君尚远稽於金监

登极贺表【至元甲午四月】

天子君万邦通符历数皇极敛五福诞覆幅员华夏欢声乾坤喜气钦惟与天同大如日方升聪明睿智以独尊登九五位朝覲讴歌之并集得亿兆心宗社安於泰山诏令聿乎率土丕昭祖训光御皇图臣叨守外藩遥瞻中禁又逢圣主逾殚莫报之忠嘉与远氓共乐昇平之治

又【万户府】

明帝御邦嗣累朝之丕绪黎民有主藹万国之欢声庙社奠安乾坤开霁钦惟纯粹中正濬哲文明鍾三光五岳之英天姿特异为六军兆姓之主神器有归奉烈祖之圣謨膺皇躬之景命时乘龙御光绍鸿基臣滥职柳营驰神枫陛爰飭采薇之戍谨守封疆敬歌天保之章愿绥福寿

寿节贺表【甲午九月五日】

虹电流輝适应九秋之候乾坤齐寿有开万寿之期瑞气氤氲颂声洋溢钦惟睿知神武博厚高明天日英姿鍾太极两仪之全气风雷嘉会协六军万姓之欢心当新政之御图纪良辰之毓圣诞弥厥月长发其祥臣分牧南邦驰神北阙瞻蓬萊之五色阻綴贺班效嵩岳之三呼遥伸善颂

又【万户府】

龙飞御极甫新一统之权虹流介祥咸仰九重之庆欢腾薄海瑞霭层霄钦惟载纘武功诞敷文德抚军监国久符重輝重暈之占应天顺人善继同轨同文之治茂介秋高之候有开帝出之辰臣縻职柳营驰神枫陛千官朝贺遥瞻汉殿之班万旅欢呼共上庄椿之祝

正旦贺表【元贞乙未】

岁颁宝历大一统以为元春度玉墀喜万年之介寿和熏海岱喜溢乾坤钦惟德与日新仁同天覆车书混一睿知足以有临正朔昭明华夏罔不率俾俭勤遵夫祖训爰敬说於亲闈茂对青阳益臻洪福臣职分藩服心恋阙廷膺贡受图虽阻陪於朝会行庆施惠愿祇布於恩言

又【万户府】

东风转律又新万物之輝南面受朝茂介九重之庆圣朝临御华夏瞻依钦惟稟睿自天性仁继祖修车马备器械八紘丕振於皇威开黄道拜紫宸百辟共推其神武当持盈守成之世逢考图数贡之辰寿祉骈臻基图巩固臣属縻军务阻綴廷班诗咏采薇恪守封疆之戍春融细柳常怀雨露之恩

寿节贺表【总统所】

华袞天临喜亲逢於明主方袍云集咸恭祝於圣人运应六龙之乘生同一佛之出钦惟慧通山海福比河沙累劫万行圆成为世界主大地衆生归仰居人中尊当秋高气清之时纪电绕虹流之节寿齐箕翼庆溢乾坤臣祇率梵徒遥瞻宸御真詮五千卷敬繙贝多叶以披宣睿照亿万年愿比须弥山而长久

又【九月五日】

虹渚纪祥九五适符于令节象筵启教亿兆齐藹於颂声飞龙御天生佛见世钦惟获无量福居不动尊因果圆成作大地山河之主智慧广大为当世天人之师先囊萁四日之期应昙花千年之瑞光腾箕翼喜溢乾坤臣寄蹟南邦倾心北阙领苾刍衆敬宣觉帝之真詮绕莲华台齐祝圣皇之上寿

登宝位贺表【大德丁未】

六龙在御初临南面之朝万象维新咸拱北辰之照皇图巩固甸宇欣愉钦惟渊懿聪明睿知神武鍾三光五岳之全气继祖嫡传得六军万姓之欢心受天宝命孝爱首尊於慈极寬仁诞布於多方膺讴歌朝覲之归副宗庙社稷之托臣忝纒郡戟恭被诏纶历数在躬所愿跨商周之世福威惟辟何幸逢尧舜之君

太后册宝贺笺【同】

神受宝册正万国之母仪帝奉玉卮开亿年之圣寿宫闈喜气穹壤欢声钦惟道协娲皇德高文母如天之运定大策於禁中挟日以升福羣黎於宇内既措安於神器宜诞受於鸿名盛典輝煌慈颜忻怿臣縻身南服稽首东朝拥佑有功永昌九重之侍养对扬无斁共欣千载之会逢

东宫受宝贺笺

帝临玉宸新膺听陞之朝天受宝符首正春宫之位庆縣宗祏欢动甸区敬惟机神英明性质仁厚娱侍太母藹和气於宫闈拥戴圣皇着殊勲於社稷宸眷笃怡怡之好渊衷定继继之谋瑞协龙潜祥开燕翼某身縻支垒心遡贺庭重光重晖喜羣情之有属同文同轨占大历之无疆

尊号贺表【至大乙酉四月】

南面视朝敞玉宸而临御东宫考礼焕宝册以推尊仁洽万方欢腾八表钦惟德配天地孝通神明得位得禄得名光昭烈祖重光重轮重润敷佑後人履端诞受於徽称涣号遡頒於庆赐圣朝翔见盛典增輝臣忝守偏城钦承明诏进官一列喜均被於隆恩祝寿万年愿常熙於鸿号

寿节贺表【己酉七月】

律转清商适金行之肇序位尊皇极纪电绕之呈祥福祿骈臻朝野胥庆钦惟聪明作后寬惠爱人天下同轨同文新崇徽号王言如纶如綍诞播洪恩勤问寝於龙楼永貽谋於燕翼式逢瑞节丕衍耆龄臣分牧南邦驰神北阙三呼祝寿阻亲奉於玉卮百拜尽恭愿常瞻於丹扆

东宫生日贺笺【三月三日】

瑞启龙潜光应斗枢之绕欢均鳌掖时当天气之新福祿骈臻朝野胥庆敬惟英明冠世神武安邦赞一日万几之权允熙庶绩慕二帝三王之学博采羣书欣际昌辰益隆寿祉某等属縻州垒阻缀庭班遥祝千龄衍本支而益茂恭陈百拜仰华鄂之相輝

延佑丁巳肆赦谢表【周王败後】

立爱惟亲特厚宗藩之眷宥过无大诞均甸宇之恩诏下九霄欢腾八表钦惟尧仁济衆舜德好生追怀棣鄂之华忍遗厥後曲軫茅封之贵弗丽於刑怜其诬误之情锡以亏除之泽宏敷旷荡溥及隐微臣职谨布宣心同欣跃雷雨作解同熙一气的春日月照临永衍万年之福

水云村藁卷十五